

CITAMPÌ CIISAMBÒMBÒ



Twinyikàayi mitù yetù bwà katanci kakesè cyanààna mpindyewu.

² Mukalenge, nyewù tudi badìsangishe cyàkàbìdì kaaba aka bwà mudimu. Nè tudi twela meeji ku cikondo, mu matùkù à ku cibangidilu, pàvwàbo bàbànda bwònsò ku Shiilò bwà mabènesha à Mukalenge. Kàdi mpindyewu, dilòòlò edi, tudi badìsangishe kaaba aka bwà kutèeleja Dìyi Dyèbè. Nènku bu mutùdì tulonga mu citùpà cisungùlùke cyà Mifundu eci nè, Mwànà wa mùkòòkò ke Umwèpelè uvwakù mwà kukàngula Bitampì, anyi bwà kuBikùtulula, nènku tudi tulòmba dilòòlò edi, patùdì twangata bwà kukenketa Citampì Ciisambòmbò cinène eci apa, tudi tulòmba, Taatù wa mu Dyulu, bwà Mwànà wa mùkòòkò àtùkàngwilèCi dilòòlò edi. Bwalu, tudi kaaba aka mbwà kuCyùmvwa. Nènku pàvwà muntu nànsha umwe pa buloba, anyi mu Dyulu, kàyi mukùmbàne, ànu Mwànà wa mùkòòkò ngwàkasanganyibwa mukùmbàne. Pa nàнку udi Mukùmbàne mu Byònsò awu àlwe àtùkàngwilèku Citampì aci dilòòlò edi, bwà twamònakù mwà kutàngila ànu cyanààna dyàmwàmwà dyà ridó wa cikondo. Ncifwànyìnekù kutùkwàcisha, tudi twitabuuja nàнку, Taatù, ditùkù dinène, dyà mìdimà, dyà mpèkaatù ditùdì nè mwoyi edi, ncifwànyìnekù kutùkwàcisha nè kutùkolesha ku mwoyi. Tudi mpindyewu batwishùbwe nè tudi tupeta ngàsà ku mèsù Kwèbè. Tudi tudifila twètù biinè, pàmwè nè Dìyi, Kùdì, mu Dìna dyà Yesù Kilistò. Amen.

Nudi mwà kusòmbaayi.

³ Mwoyi wènù awu dilòòlò edi, nwènù balundà bàanyi. Ndyèsè bwà kwikalakù cyàkàbìdì kaaba aka dilòòlò edi, bwà kwikala mu mudimu wà Mukalenge. Mvwa ànu mulwè pashìishe ndambù. Mvwa muyè ànu ku...ku bwalu bwà lùkàsàlùkàsà, bwà muntu mulùme uvwa upùnga nè lufù, bwà cidimba cyà èkèleeziyà ewu; mamwèndè ùdi, anyi ùtu ùlwa kaaba aka. Nè bàvwà bàmba nè nsongààlùmè awu ùvwa upùnga nè lufù dìbà adi mene. Pa nàнку mèmè—mèmè kuyakù bwà kumòna ànu mu—mundidìmbì cyanààna wà muntu mulùme mulààdika mu bulààlù, upùnga nè lufù, muntu wa wìpacila bukolè bwànyì ebu. Kàdi ànu mu katanci kakesè kàà dìbà cyanààna, mèmè kumòna muntu ùjuukila kuulu, ùfila butùmbì kùdì Mukalenge. Nè pa nàнку, Nzambi, bu twètù mwà kuswà kutonda mpèkaatù yetù nè kwenza cidì cimpè, kulòmba luse, kuMusòka, Nzambi mmuswè nè mwindìle bwà kutùpèeshaci.

⁴ Nènku, mpindyewu, ndi mumanyè nè kùdi luuya mwab'ewu dilòòlò edi. Nè—nè kùdi...To, ngèèla meeji nè bifidì byà luuyà

lukolè mbiimanyika ànu menemene. Nènku—nènku tudi . . .

⁵ Mvwa mumòne makèèlèlè dilòòlò awu, anyì leelù ewu nè, edi nditùkù dyànyì dyà mwandamutekètè dyà kwikala mu cibambalu cyà kaciyi bukènkè, ànu makènkè à nzembu, nwamònu's; mwikàle ndonga, nè nsambila bwà Nzambi àkangulèku Bitampì ebi.

⁶ Nè kùvwa bààbùngì be bàdi bafunde, mu kasumbù kàà beedi bàà nkonko makèèlèlè- . . . anyì nkonko makèèlèlè dilòòlò, yìvwa, nangananga, kayìvwa ànu nkonko menemene to. Cìvwàbo bàkèba mbwà kwenzakù disangisha dyà dyondopa's, twamb'èku twamb'èku; bàswe bwà twètù kushààlakù dikwàbò ditùkù dyà pamutù, bwà kwenza . . . bwà kwenza disangisha dyà dyondopa mu dimwè. Pa nàнку ndi—ndi—ndi mufwànyine, mvwa mwà, mu bushùwà bwà bwalu mvwa mwà kucyènza bu nè cìvwa diswa dyà—dyà bantu nè mbaswè kwenza cyôci aci. Nudi mwà kwelanganapù meeji nènku kummanyisha, kàdi nwènù ànu baswè kushààla bwà kusambidila babèedi . . .

⁷ Bwalu, ndi mufile cikondo cyònsò eci, cyònsò nkòong, ku Bitampì ebi, nè ndi mudilàme ku luseke bwà Bitampì.

⁸ Pa nàнку nudi mwà kwelanganayipù meeji, nè kucisambidila, nè pashìishe kummanyisha. Nènku mèmè, bu Mukalenge mwà kwanyisha, ndi mwà kucyènza. Cipungidi cyànyì cidi cilondà cidi ku Albuquerque, mu Nouveau-Mexique, nè neciikalè mu ndambù wa—wa matùkù kumpàla eku. Nènku bikèngela ngààlukilè kumbèlu bwà bwalu kampànda, bwà kulongolola mukwàbò mpungilu mu Arizona. Nàнку awu, dìbà adi, cyôci diswa dyà Mukalenge's! Nùsambilàayi pa bwalu abu, nè mèmè nènsambilè pàànyì, dìbà adi netùtambè kumanyakù ndambù pashìishe pa bwalu abu.

⁹ Kàdi nyewu ànu njandula. Mpindyewu ndi mmòna . . . Paùdi uditwa mu dyakula pa mabèedi, ke byòbì bilwalwà abi, nwamònu's. Ndi mmòna inàbànzà ewu musòmbe mwab'ewu mene. Cintu kampànda cyôci kaciyi cimukwàcishe to, yèyè's neàshaale apa ànu katanci kakesè. Pa nàнку, dìbà adi, nwamònu's, tudi—tudi ànu tusambila bwà Nzambi àswe. S'ki cinùdi balwilè kaaba aka, bafùme ku ntàntà mile. Pa nàнку, nwamònu's, Nyu—Nyumà Mwìmpè mmumanyè ànu kantu nè kantu, nudi numòna's. Pa nàнку Yèyè . . .

¹⁰ Kàdi, nwamònu's, ndi muditàcishe bwà kufila cikondo eci bwà Bitampì ebi, bwalu bwà cyôci aci mbutùvwa bacitèèkèle, nudi numòna's. Kàdi kwòkù kwikàle . . .

¹¹ Byòbì biinè, mbanganyì bàdi bàsaamà kaaba aka, bàdi balwè bwà kubàsambidilabò? Twànjàayibi kumòna byanza byènù, eku nè eku, myaba yònsò. Kaa, ekèlekèle! Hum! Èè, mbanganyì bàdi bafwànyine kwela meeji nè abi mbifwànyine kwikala bìmpè, diswa dyà Mukalenge, bwà kushààla nè kwenza cyôci aci, kwangata mu dimwè dilòòlò, ànu bwà kusambidila babèedi,

kwenza disangisha dyà dyondopa mu dimwè dilòòlò? Nudi baswè kwenza nàнку anyi? Nudi bafwanyine kukumbana kucyènza anyi? Èè, bu Mukalenge mwà kwanyisha, díbà adi netúcycènzè. Nwamònu anyi? Netwikale—netwikale mwà kwenza disangisha dyà milòmbò bwà babèèdi, mu diisátù, anyi, dyàlumingu dilòòlò, anyi, mu dimwè dilòòlò, nè kusambidila babèèdi's.

¹² Mpindyewu, ndi ntèkemena nè aci kacycèna cìcycàmakana kasumbù kàngiikalà mwà kwalukila naakù, kwalukila ku Arizona nànsha. Mwanèètù Norman, ùdikù kaaba aka mwaba kampànda anyi? Aci cìdi cìimanyika ndongamu webè anyi, Mwanèètù Norman, anyi cintu kampànda? [Mwanèètù Gene Norman ùdi wàmba nè: “Bwàlà.”—Muf.] Mwanèètù Fred nè nwènù bakwàbò aba, mbìmpè nàнку anyi? [Bakwàbò abu bàdi bàmba nè: “Mbìmpè.”] Nwamònu anyi? Abi's mbìmpè. Èyo.

¹³ Díbà adi, bu Mukalenge mwà kwanyisha, mu dimwè dilòòlò netúsambidilè babèèdi, ànu dilòòlò dimwèpelè cyanààna ditèeka ku luseke bwà cyòci aci, dyònsò dijimà, ànu kusambidila babèèdi. Mpindyewu, kakwàkwikala kàbìdi bwalu bwà Bitampì nànsha. Bu Mukalenge mwà kuswàku ànu bwà kubuulula Bitampì ebi, díbà adi tudì tusambidila babèèdi, mu dimwè dilòòlò.

¹⁴ Mpindyewu, kaa, bwà eci kaayi ndi mucisànkile cyà bushùwà, bilenga byà kacya, bwà dikwàcila dyà Mukalenge mudimu mu Byòbi ebi! Nwènù Eci cinùsànkishekù anyi, dikàngula dyà Bitampì ebi? [Disangisha didi dyàmba nè: “Amen!”—Muf.]

¹⁵ Mpindyewu, tudì mpindyewu twakwila ku Cìtampì Cìitànù, anyi Cìtampì Ciisambòmbò's wè, èyowà. Nènku aci cìdi cìpweka mpindyewu kuumukila ku mvensà wa—wa 12 wa nshapità mwi6, too nè ku wa 17. Cìdi cimwè cyà ku Bitampì byà bileepa. Kùdi bintu byàbúngi byenzèke kaaba aka. Nènku mpindyewu . . .

¹⁶ Twènzèku dyambulula dikesè dyà byà makèèlèlè dilòòlò abi, ncyenzè bu dyalukila dyà cyànyimà ndambù, musangu wònsò.

¹⁷ Nènku, twámbe nè, ndi—ndi muswè kwamba cintu kampànda, kàbìdi. Ndi musangàne, mu kashèètè kàka, bintu binaayi ànyì bitaanu byà mushinga wàbúngi bwànyì mèmè. Bàvwa bangambìle nè . . . Nè ncyà bushùwà nè ndi muswè bwà kulòmba luse. Mikàbà yà mèyi yidi munkaci mwà kukwàta anyi? Mukàbà wà mèyi wùdi munkaci mwà kukwàta anyi? Ndi muswè bwà kulòmba luse kùdi bambi naanyi nè kunùdi nwènù cisàmbà kaaba aka. Bàdi bàmba, dilòòlò adi pàmvwà ngàakula bwà—bwà Eliyà, pa díbà adi dyà pàvwàbo . . . Yèyè ùvwa ùdyàmbidila nè ùvwa umwèpelè uvwa mwà kuya mu Dyambwibwa, anyi yèyè ke umwèpelè uvwa mwà kusùngidiibwa. Mvwa—mvwa mwambè nkàmà mwandamutekètè pamutù pàà binunu mwandamutekètè. Mmwòmò anyi? [Disangisha didi dyàmba nè: “Èyowà.”—Muf.] Èè, cyà bushùwà nè ndi ndòmba luse bwà cyòci aci, bakwètù.

Mémè—mémè—mémè's mvwa mumanyè cìvwà címpè pa bwalu abu. Cìvwà ànu dipampalamuka dyà mwakulu cyaààà, bwalu mvwa mumanyè nè cìvwà mbinunu mwandamutekètè. Bwalu bùvwà nè ncìvwà ànu mucyàmbè mu cyòci to. Ndi... Nènku ndi—ndi nnwèla twasàkidila. Nè cyòci aci nciswè kwamba nè... Ndi nè disànkà dyà munùdi nutàbaleela bìndi ngàmba. Nènku nudi numòna's, díbà adi, cìdi... Bwalu, cyòci, cìdi—cìdi mbinunu mwandamutekètè.

¹⁸ Ndi nè tubèji tufùnda túbìdi anyi túsàtu pa bwalu abu, twambè nè: “Mwanèètù Branham, ngèèla meeji nè uvwa mutùpàkàne.” Cìvwà cyambè nè: “Kabìvwà binunu mwandamutekètè pamutù pàà nkàmà mwandamutekètè anyi?”

¹⁹ Mémè kudyàmbidila nè: “Ncyà bushùwà nè ncìvwà mwambè nkàmà mwandamutekètè nànsha.” Nwamònu anyi? Aci, ke pashìshe mémè... Billy...

²⁰ Ke díbà adi mémè, katanci aka, mémè kwangata kabèjì kakwàbò. Kàvwà kàmba nè: “Mwanèètù Branham, uvwa... Ngèèla meeji udi mwambè nkàmà mwandamutekètè.”

²¹ Nènku muntu kampànda kwambayè nè: “Mwanèètù Branham, cìvwà ncikèèna—kumòna cyà—cyà nyumà cìvwà nè—cìvwà nè nekwikalè ànu cifwànyikijilu cyaààà, nè wèwè ucyàmba mu cifwànyikijilu nè mwandamutekètè...?” S'bidì bìshiyà bantu mijilu mitàndàbàle paùdi uditwa mu kwela meeji ku bintu ebi, nwamònu's. Nè cyòci aci s'cìdi mwa kwenza, bwà nè, cìnshiyè mijilu mitàndàbàle.

²² Cintu kampànda ncyenzèke leelù ewu pàvwà Cítampì eci cibүүлүдүбwe, mu mùshindù wà nè kukèngelabi bwà mémè kupàtuka kukendakana ànu menemene mu bulà amu, kubanga ànu kunyùnguluka, pambèlu mu bulà amu bwà katanci kakesè. Ncyà bushùwà's. Ncyambè ànu kumpàtula mupùuyà wònsò. Nwamònu anyi? Pa nànkù, nudi nwakula bwà dibìnduluka? Kaa, ekèlekèle! Nwamònu anyi?

²³ Cìkwàbò cintu, nwamònu's, nudi nushààla kacya nwakwàta ànu ku bìndi ngàmba. Nènku Nzambì neàngoomèkèlè bujitu bwà bìndi mémè nnwàmbila. Nwamònu anyi? Nè pa nànkù kakùyi mpatà to ndi—ndi nè cyà kwikala mutwìshìbwe ànu nè mwànyì mwònsò mwà kwikala mutwìshìbwe, nwamònu's, bwà bintu ebi, bwalu edi ndíbà dikolè dyà—dyà dikèma ditùdi nè mwoyi. Èyowà.

²⁴ Mvwa ngèèla meeji bwà disangisha dyà dyondopa bwà mu dímwè dilòòlò. Aci ncifwànyine kukucyàmakana mwaba kampànda anyi, Mwanèètù Neville? [Mwanèètù Neville ùdi wàmba nè: “Nànsha kakesè. Mémè's nèngiikalè ànu nkaaba aka.”—Muf.] Abi's mbilenga be.

²⁵ Mwanèètù Neville wa mushinga mukolè! Nya' nnwàmbila's, bàtu ànu—bàtu ànu bamwènze umwèpelè, ngèèla meeji, kàdi kujìmijabò citentwidi aci. Cìdi... Ncyà bushùwà nè yèyè ùtu

bwànyì mèmè nyàànaanyì nè mulundà wa—wa cyà bushùwà, ndi nnwàmbila's.

²⁶ Tabernacle mmwibaka patùdì twakulangana apa, nè ùdì nè bibambalu byà kàlaasà kàà Dyàlumingu nè bintu byònsò bilongolola, mu bulongàme kaaba aka. Nè bàmwè bàà ku nwnèù bàdì basòmbèle mu nyùngulukilu emu abu, mu nyùngulukilu wa Jeffersonville, baswè bwà kulwa mu èkèleeziyà, nudi nè mwaba mulenga be, nè mwaba wà kwikala kulwa, mu bibambalu byà kàlaasà kàà Dyàlumingu.

²⁷ Mulongeshi mulenga wa dikèma, Mwanèètù Neville ewu, bwà kàlaasà kàà bakùlumpè, nè mpaasàtá wa cyà bushùwà. Ncyèna ngàmba aci bwà kumwela bilongò nànsha, kàdì mbipiciibwe nè mèmè mumupèku cilongò cikesè cyà rose mpindyewu pamutù pàà cisumbù cijimà cyà bilongò paanyimà pàà yèyè mumanè kuya. Nè Mwanèètù—Mwanèètù Neville ewu, mèmè ntu mumumanyè kacya ànu pancìwà nsongàalùmè awu. Patùdì twakulangana apa, yèyè kí mmushintùlùkekù nànsha kakesè to. Yèyè ùcidi ànu Orman Neville, ànu mùvwàye misangu yònsò amu.

²⁸ Ndi mvùluka mûngàakamumwènekèlà. Ùvwa mene nè ngàsà búngì bukùmbàne bwà kundòmba bwà kubàndaku mu cyambilu cyèndè pàvwàye muyiishi wa ba-Méthodistes kwinshì eku mu cimenga emu. Ki twètù kupeta disangisha dilenga dyà dikèma mu Clarksville mwàmwa, ba... Ngèèla meeji nè didi dibìikidiibwa nè ng'èkèleeziyà wa ba-Méthodistes wa Howard Park, mu Mùsèèsù wa Harrison. Ngèèla meeji nè mwómò amu ke mùvwàye nè cyà kwikala mukupètèlè's, muntwamu, Mwanèètù wa bakàji Neville. Muntwamu, bwalu yèyè ùvwa cidi- . . .

²⁹ Mèmè kwalukila, kwambila èkèleeziyà ewu, mèmè kwamba nè: “Wàwa ùvwa. . . Wàwa ngumwe wa ku bantu bàà maalu mimpè matàmbe's! Nè òmwè dyà àdì panshì aa nèngiikalè mwà kumubàtiizi mu Dìna dyà Mukalenge Yesù.” Cyàkenzeka's.

³⁰ S'ki yèyè ewu. Kàdì patùdì twakulangana apa yèyè nnyàànaanyì, ànu ku luseke lwànyì menemene. Wa bwalu muntu wa bàtwa mushinga, wa kuneemekiiibwa! Ùtu misangu yònsò ànu muntwè nyama ku mikòlò menemene ànu mùdì. . . ànu pabwìpì naanyì menemene nè mwèndè mwònsò. Cyònsò cìndì mèmè ngàmba, yèyè ùdì ànu ùshààla naanyì nè ùtùngunuka ànu nànkù. Nànsha mene pàcìvwàye ùvwilakù, kàvwa ùmvwa Mukenji musangu awu to, kàdì wàkaWitabuuja nè wàkashààla ànu mulamàtèKù. Ki ditwà dyà mushinga ndyòdì adi, ki kaneemu nkòkò aku, bwà mwanèètù wa mshindù awu. Ncyènakù mwà kwamba búngì bukùmbàne bwèndè yèyè to. Nènku mpindyewu Mukalenge àmubènèshè. Èyo.

³¹ Mpindyewu dyàmbulula dikesè dyà byà dilòòlò dyà makèèlèlè, mu dilamuna dyà Cìtampì Ciiànù. Katwàkwalukila

too nè ku ntwàdijilu dilòòlò edi to, netwàlukilè ànu ntàntà bule bukumbàne bwà kupeta Cì—Citampì Cìtànù.

³² Mpindyewu, tudi tusangana nè kùvwa mufwilakanyi nè Kilistò uvwa mwendèle pa kàbalù, nè kuditwilayè cishindaayi, byumùkile ku makolè àsàtù. Wònsò awu àkabwela mu bukolè bùmwèpelè, kàdi kubànda pa kàbalù kàà cisengàsengà nè: “Lufù,” kuya kabwela too nè mu ciinà cìdi kaciyi nè ndekeelu, mu dibùtuka, mwàkafùmàye amu. Nè pashiishe tudi tusangana nè pàdì. . .

³³ Mufùndù wùdi wàmba nè: “Pàdì mwena lukunà ùlwa bu nkwaka, Nyumà wa Nzambi ùdi ùjuula dibèndelà bwà kumulwisha.” Nè twacimònu cishìndikiibwe ànu menemene mu Dìyi makèlèlè dilòòlò awu, bwalu kùvwa Nyama yìnaayi yìvwà—yìvwà myandàmùne ku—ku misangu yìnaayi yìvwà mubandi ewu mwendèlepù.

³⁴ Nè yéyè wàkabànda kàbalù kashìilàngàne musangu wònsò, kàbalù katòòke, nè pashiishe kàbalù kakunze, nè kàbalù kafiike, nè pashiishe kàbalù kàà cisengàsengà. Nènku twètù kusangana nè, meekala awu, nè cìvwàwu nè cyàkenzàwu. Pashiishe kucyàluja buludi mu bikondo byà èkèleeziyà, nè cyòci aci menemene ke cyàkenzàci, ànu menemene.

³⁵ Ki bwà cinyi, nudi numòna’s, pàdì Dìyi dya Nzambi dìnwàngana, ke cidi cyùmvwijà nè Didi dilelèlè, nudi numòna’s. Èyowà. Ndi mèmè ngiitabuujà nè, cintu kanà cyònsò cìdi cìswikakanà nè Dìyi dya Nzambi citu misangu yònsò ànu “amen.” Nwamònu anyi?

³⁶ Mpindyewu, mùvwà muntu kampàndà wàmba nè ùvwa mupètè cikèenà-kumòna, nè wàmba nè cìvwa ncyòci. Kaa, yéyè mmumanyè nè Mukalenge nguwva mucifile, bwalu cìvwa cilwè nè bukolè bunène. Èè, cikèenà-kumòna aci ncifwànyìne kwikala cyà bushùwà. Kàdi cyòci kaciyi cikùmbànàngàne nè Dìyi, nè ciikàle cìbèngangana nè Dìyi, kaciyènakù cyà bushùwà nànsha. Nwamònu anyi?

³⁷ Mpindyewu, mpindyewu kùdi mwà kwikala kaaba aka, bàmwè bàà ku bàna bèètù bàà balùme anyi bàà bakàji bàà ba-Mormons. Nènku kùdi mwà kwikala bàmwè bàdi bàngatà mikàbà yà mèyi eyi, mpindyewu. Kàdi kì mbwena kwàmba nè ndi muswè kwamba nè. . . Bàmwè bàà ku bantu bàdi batàmbe kwikala bàà maalu mimpè bàndi mèmè ewu nè nwènù baswèku kutwilangana naabò, s’mbafwànyìne kwikala—kwikala munkaci mwà ba-Mormons; bantu bàà mùshindù mulenga bàà dikèma. Nè pashiishe mupròfeta wabò—wabò, Joseph Smith, uvwa ba-Méthodistes bashebèye mu Illinois emu awu, pàvwàbo mu lwendu bàpicilamù. Nènku ke dībā adi muntu wa maalu mimpè awu—awu, nè cikèenà-kumòna aci, ncyèna ngèlakù mpatà nànsha mikesè bwa nè yéyè wàkamòna cikèenà-kumòna aci to. Ndi ngèela meeji nè yéyè ùvwa muntu

wa meeji matòòke. Kàdi cikèèna-kumòna cyàkapetàye cìwwa cibèngangana nè Mifùndu. Nwamònu anyi? Kì bwà cinyi, byàkakèngela bwà kwikalabò nè Bible wa Mormon, bwà—bwà kukùmbananganaci. Nwamònu anyi?

³⁸ *Eci eci ke Èpele, bwànyì mèmè. Ng'Eci. Ke bwà cinyi, ànu Dìyì. Ke Dyòdì's. Nwamònu anyi?*

³⁹ Musangu kampànda, mwa—mwa—mwambi kampànda wàkalwa kaaba aka wa ku ditùnga dyenyi, ki yèyè. . . Ke mèmè kumumòna nè—nè. . . wènda wèndakana mu kàshinyi, aci kacyèna. . . mwikàle nè—nè inàbànzà kampànda. Ke kulwabò ku disangisha kampànda. Kì mèmè kujandula nè, bàvwa benzè lwendu lwà mu kàshinyi lwà matùkù àbìdì anyi àsàtù, ànu yèyè nè mukàjì awu, mu disangisha, bwà kulwabò ku disangisha adi, pàmwè. Nè mukàjì awu ùkaavwa musèdiibwe misangu yisàtù anyi yìnaayi mishìilàngàne.

⁴⁰ Nènkù mwambi awu kuseemenayè kùndì mu mwaba wà dindila wà cilàala-beenyi wùmvwà nsanganyibwa awu, nè kulwayè lubilu nè kungeelayè mwoyi ku cyanza. Kì mèmè kumwela mwoyi ku cyanza, kujuukila kuulu nè mwikàle nyiikilangana nendè. Mèmè kumwela lukonko, kwamba nè: “Pawìkalà musùùkàkàne, ndikù mufwànyìnekù kuyiikilangana neebè mu cibambalu cyànyì bwà katanci kakesè cyanààna anyi?”

Yèyè kwamba nè: “Cyà bushùwà's, Mwanèètù Branham.”

⁴¹ Mèmè kuya nendè mu cibambalu amu. Kì mèmè kwambila mwambi awu, kwamba nè: “Révèrend, mukalenge, wèwè udi mwenyi mu ditùnga edi.” Mèmè nè: “Kàdi inàbànzà ewu's ùdì nè luumù kampànda.” Mèmè nè: “Wèwè kwènàkù, anyi, nwènù nudi balwè ntàntà yònsò ewu buumùkile mu mwaba *kampànda*, balwè too nè mu mwaba *kansanga* ewu anyi?”

Yèyè kwamba nè: “Èyowà's, mukalenge.”

⁴² Kì mèmè kwamba nè: “Kwèna ucìinàkù nè aci mu mùshindù kampànda neciikalè mwà. . .? Ncyè—ncyèna. . . kî nnè ndi nkwèla mpatà to, kàdi kwèna welakù meeji nè necimweneshè bibi bwà luumù lwèbè bu mwambi anyi? Kwènàkù wela meeji nè bìvwa bìkèngela bwà twètù kuleeja cileejilu citàmbekù bwìmpè ndambù pamutù pàà aci nànkù anyi?”

Kì yèyè kwamba nè: “Kaa, inàbànzà ewu's mmunsantu.”

⁴³ Mèmè kwamba nè: “Ncyè—ncyèna ngèèla aci mpatà to.” Kàdi mèmè kwamba nè: “Kàdi, mwanèètù, bwalu bùdì nè, muntu yònsò udi umutàngila kî mmunsantu nànsha, wamònu's, ewu udi utàngila cyùdì wèwè wenza aci.” Kì mèmè kwamba nè: “Ndi mèmè ngèèla meeji nè mbipicìibwe nè wèwè mwikàlekù mutàlame's. Aci's cìdì ànu mwanèènù wàmbila mukwèndè.” Kàdi yèyè kwamba. . . Mèmè kwamba nè: “Inàbànzà awu's ùkaadi musèdiibwe misangu yìnaayi anyi yìtaanu patùdì twakulangana apa.”

Ki yêyè kwamba nè: “Èyowà, bwà aci ndi mumanyè.” Yêyè kwamba nè: “Udi mumanyè’s, mêmè—mêmè. . .”

44 Mêmè kwamba nè: “Kùtu ulongesha aci mu èkèleeziyà wa kwèbè kwàka to, mmwòmò anyi, bwà cyôci aci?”

45 Pa nàнку yêyè kwamba nè: “To. Kàdi,” yêyè kwamba nè, “mvwa mucipetèle cikèènà-kumòna’s, Mwanèètù Branham.”

Mêmè kwamba nè: “Èè, abi mbîmpè.” Mêmè nè. . .

46 Yêyè kwamba nè: “Cìdi cikutàcisha wêwè anyi?” Yêyè kwamba nè: “Ngèèla meeji nè ndi mufwànyineku kukulongolola ndambù pa dilongesha dyèbè pa cyôci aci.”

47 Mêmè kwamba nè: “Èyo.” Ki yêyè. . . Mêmè kwamba nè: “Ndi—ndi—ndi mufwànyine kwikala nè disànka bwà kucimanya’s, mukalenge.”

48 Ki yêyè kwamba nè: “Èè,” yêyè kwamba nè, “udi mumanyè’s, mu cyôci cikèènà-kumòna aci,” yêyè kwamba nè, “mvwa mulààle tulù.”

Ki mêmè kwamba nè: “Èyowà.” Mêmè kumòna, díbà adi nè, cìvwa ncilòòtà. Nwamònu anyi?

49 Ki yêyè kwamba nè: “Mu—mukàjàànyì,” yêyè kwamba nè, “ùvwa wènda masandi nè mulùme mukwàbò,” ki yêyè kwamba nè, “kàdi mwikàle ùnkùtakaja mêmè pèndè mwikàle ùpàtuka nè balùme bakwàbò.” Ki yêyè kwamba nè: “Pashiishe kulwayè kùndi, kungambilayè nè: ‘Kaa, munanga wanyì, mfwilèku luse, mfwileku luse!’ Yêyè nè: ‘Ndi—ndi—ndi—ndi ndòmba luse bwà mûndi mucyènzè. Nèngìikalè nè lulamatu kubangila ku mpindyewu.’” Yêyè kwamba nè: “Mu bushùwà bwà bwalu, mvwa mumunangè bikolè mu mùshindù wà nè, mêmè kumufwila ànu luse cyanààna, mêmè kwambva nè: ‘Èyo.’” Ki yêyè nè: “Pashiishe. . .”

50 Ki yêyè kwamba nè: “Udi mumanyè mùdi bwalu anyi? Pashiishe mêmè kupeta dyumvwija dyà cikèènà-kumòna aci.” Yêyè kwamba nè: “Ùvwa nyèyè mukàji ewu.” Yêyè kwamba nè: “Ncyà bushùwà nè, ùkaavwa musèdiibwe, nè—nè bikwàbò, nè misangu yònsò eyi.” Ki kwambayè, nè: “S’bìdi ànu bîmpè bwà yêyè kusèdiibwa, bwalu Mukalenge ùtu mumunangè bikolè be. Udi mwà kusèdiibwa misangu búngì bwònsò bùdiye muswè abu, pìikalàbi ànu nè. . .”

51 Mêmè kwamba nè: “Cikèènà-kumòna aci cìvwa cilenga cyà njààjàmà, kàdi cìvwa kule nè kule nè Kajila katuuta aka.” Mêmè kwamba nè: “Ncyà—ncyà mashimi, wamònu’s. Kabìvwa bikèngela bwà wêwè kwenza nàнку nànsha.” Pa nàнку aci. . . Nwamònu anyi?

52 Kàdi paùdi umòna Mufùndu wùnwàngana nè Mufùndu, cìcìvwija ntùngunukilu wa kacya wàngatàngana mùdìbi bidìsanga. Mifùndu ayi, mùdi Ewu nùнку wùshiila mu njila

apa, Ewu nùnkù lwà apa wùlwa nè yinwànganamù, nè yizòla cimfwànyì cyònsò mu kaabujimà.

53 Bu mùdì kutwàngaja kwà tuubintu mu dinàyà dyà ntandula ndìdimbì, cileejilu. Upeta kantu kàdì kàkùmbanamù. Kakùyì cintu kampànda cikwàbò cìdì mwà kukùmbana nànsha. Dìbà adi udi upeta cimfwànyì mu cyòcì.

54 Nènku kùdì ànu Umwèpelè udi mwà kwenza aci, ke Mwànà wa mùkòòkò, nè pa nànkù Yéyè ngutùdì tweyemena.

55 Kàdì tudi tusangana nè pàdì yòyì eyi, mubàndi wa pa kàbalù ewu, ùvwa mubàndi umwèpelè uvwa mubànde pa tùbalù etu. Ki pashìishe twètù kumulumbata too nè ku ndekeelu, kumòna cyàkenzàye nè bikwàbò byònsò, nè kusangana nè, ke cyàkenzàye ànu menemene munda mwà bikondo byà èkèleeziyà amu.

56 Pashìishe pààkapàtukilàye pa nyama kampànda nè kwenzayè cintu kampànda, tudi tujandula nè kùvwa umwe uvwa mutùmìibwe bwà kulwisha cìvwàye wènza aci.

57 Kùvwa umwe wàkatùmìibwa bwà cikondo cyà kumpàla, cyà mwànà wa mùkòòkò. . . anyì nyama wa ntambwe. Cìvwa n'Diyì, mu bushùwà bwà bwalu, Kilistò.

58 Cyàkalondà cìvwa ngombe, munda mwà cikondo cyà m̀dimà, pàvwà—pàvwà è—èkèleeziyà mudìvwijè bulongolodi nè mwitàbe mèyì maswìka pamutù pàà Dìyì.

59 Nènku vùlukàayi nè, cintu cyònsò mu kaabujimà nciimanyikila pa bintu bibìdì: cìmwè, mufwìlakanyi nè Kilistò; cikwàbò, cyà Kilistò.

60 Cìcìdì ànu cintu cìmwècìmwè aci leelù ewu. Kakùtu beena Kilistò bàà bashìikile mu njila nànsha. Kakùtu muntu eku mukwàcike maalà eku kàyì mukwàcike to; nyuunyi eku mifìlke eku mitòòke to; to, to; kakùtu muntu eku ngènzàmpèkààtù eku munsantu nànsha. To. Anyì udi ngènzàmpèkààtù anyì munsantu. Nwamònu anyì? Kakwènakù ànu byà munkacinkacì to. Anyì udi muledìibwe cyàkàbìdì anyì kwèna muledìibwe cyàkàbìdì. Anyì udi mùle tètè nè Nyumà Mwìmpè anyì kwèna mùle tètè nè Nyumà Mwìmpè nànsha. Nànsha byòbì nè utu mupètè masaluka búngì kaayì, wèwè kùyì mùle tètè nè Nyumà Mwìmpè to, kwèna mùle tètè Nèndè nànsha. Nwamònu anyì? Nè byòbì nè udi mùle tètè Nèndè, nsòmbelu webe ngudi ucìleeja, ùdì ùbànda buludi mutàngileKù. Nwamònu anyì? Kabyèna bikèngela bwà muntu kampànda kwambilanganayè pa bwalu abu to. Bàdì b̀cìmòna, nwamònu's, bwalu n'Citampi.

61 Mpindyewu, nè tudi tusangana nyama ayì, mwàkendàyì musangu wònsò. Umwe mutùmìibwe pa mu mudimu wèndè wà bwambi, mu makolè à cìdìidì, ùsangisha makolè à ntèndeleeleu nè—nè makolè à cìdìidì, wònsò pàmwè. Tudi tujandula nè, Nzambi wàkatùma bukolè Bwèndè bwà kucìlwisha. Tudi twalukila buludi paanyimà nè tumòna cìvwà cikondo cyà

èkèleeziyà aci, nè twètù kutàngila paanyimà; nènku's ke cyôci cyàcyà, ànu menemene mùshindù awu.

⁶² Pashiishe tudi tusangana nè, cikondo cikwàbò cyàkalwa, nè mulwishì kutùmayè mufwilakanyi nè Kilistò mu dîna dyà ntèndeelèu, mu Dîna dyà Kilistò, mu dîna dyà Èkèleeziyà. Èyowà's, mukalenge. Yèyè kupàtuka, mene nè mu dîna dyà Èkèleeziyà. "Awu's ke Èkèleeziyà wa cyà bushùwà," mwàkambàye. Nwamònu anyi?

Mufwilakanyi nè Kilistò kî n'Russie to. Mufwilakanyi nè Kilistò kî ng'aci to.

⁶³ Mufwilakanyi nè Kilistò mmufwànàngàne nè Bwena Kilistò bwà cyà bushùwà, mu mùshindù wà nè, Bible mmwambè nè: "Ncifwànyine kukùtakaja cyònsò civwà kaciyi cidyànjila kulongolola." Ncyà bushùwà. Bible mmwambè nè: "Mu matùkù à ndekeelu, cyònsò civwà kaciyi cidyànjila kulongolola aci, Basungula." Udi wamba nè: "Basungula!" Mpindyewu, muntu kanà yònsò, angàtà mwàkù awu úwàlùjè mu méyi à kumpengà kwà dibèji awu, ùmonè cidiwu wùmvwija. Wùdi wàmba nè: "Basungula, badyànjila kulongolola." Nwamònu anyi? "Necikutakajè yònsò wa ku aba beena ménà àvwà kâyi mafunda mu Mukàndà wà Mwoyi wà Mwànà wa mùkòòkò kacya ku difùkà dyà dyulu nè buloba abu."

⁶⁴ Pàakashebeyiibwà Mwànà wa mùkòòkò, ménà àkafùndiibwa mu Mukàndà amu. Yèyè mmwimàne mu Mwaba wà Cijila dilòòlò edi, mu Butùmbi, bu Mwakwidyanganyi, munkaci mwà kwakwila wònsò wà ku misùukà ayi mwena dîna didi difunda mu Mukàndà awu. Nè muntu nànsha umwe kî mmumanyè dîna adi to pa kuumusha Yèyè. Yèyè's ke ùmwèpelè Udi nè Mukàndà awu mu cyanza Cyèndè, nè Yèyè ngudi mumanyè. Pààbwelà wa ndekeelu awu, dîbà adi matùkù Èndè à dyakwilangana àjikì. Udi ùseemena dîbà adi bwà kunana cidiYe mwakwile aci. Udi munkaci mwà kwenza mudimu wà Cilongo Cipikudi patùdi twakulangana apa; nè ùseemena bwà kwangata Bèndè Sungasunga. Kaa, ekèlekèle!

⁶⁵ Aci's civwa nè cyà kufikisha mwena Kilistò yònsò ku—ku didikenketa, nè ku dilama byanza byolola kùdi Nzambi, mwikàle wàmba nè: "Nkezùlèku, Èyi Mukalenge! Tàngilàku mu nsòmbelu wanyì, nè—nè mfikìshèku—mfikìshèku ku dimòna luseke lwànyì lwà lubì. Enzàku bwà ncyùmùshè mu njila wanyì, nè lùkàsà lwònsò." "Bwalu piikalàbi nè mwakàne ùdi ùsùngidiibwa nè lutàtu, ngènzàmpèkààtù nè udi kàyi ùneemeka Nzambi nebàshaadilè penyì?" Ncikondo cyà didikenketa.

⁶⁶ Nènku bu wèwè mwà kuswà bwà kucitèeka, nè muswè bwà... nè kufila Dîyi edi. (Mpindyewu, ncyèna muswè bwà, bwà nwènù kungeela lukonko pa cyôci eci to, bwalu cidi cikamfikisha buludì ku lukwàbò; ndi nswa kwamba nè, mu difundà dyà nkonko yènù ayi. Ngèela meeji nè nkonko yikaadi

mitùma's, twamb'eku twamb'eku.) Eci ncikondo cyà lùnketu bwà cilumbulwidi. Ncyà bushùwà. Mpindyewu, netwàngatè aci pa—pa Mpungi patwáfika ku cyôci aci, díbà dyônso díikalà Mukalenge mulongòlòle adi, anyi Mpànza, nè netùsanganè pa lùnketu bwà cilumbulwidi alu, kumpàla menemene kwà Makènga kwenzekawù. Nè—nè tudi tumòna nè aci ncilelèlà. Nè Banjèlò bàsàtù bààkatuutà buloba abu, bèèla lubilà, nudi bamanyè's nè: “Dyàkabi! Dyàkabi! Dyàkabi kùdi bàdi basòmbèle pa buloba!”

Nènku tudi ne mwoyi mu cikondo cyà cìkwacisha bwôwa, cikondo cidi. . .

⁶⁷ Nudi numòna's, bintu bitùdimu ebi, bitùdi munkaci mwà kulonga mpindyewu mene ebi, mbyà paanyimà pàà Èkèleeziyà mumanè kuya, nwamònu's, bintu byà mu cipungu cyà Dikènga dinène ebi. Nènku ndi ngèèla meeji nè bivwa bikèngela kwikalaci cijaalamija bimpè mu mwoyi wà mwena kwitabuuja yònsò nè, Èkèleeziyà ewu kènàku ùpicila mu cipungu cyà Dikènga dinène nànsha. Kwènàku mwà kutèèka, mwaba nànsha wùmwe, Èkèleeziyà mu Dikènga dinène nànsha. Mémè. . . Tèèka èkèleeziyà amu, kàdi kí m'Mukàji-musèla nànsha. Nwamònu's, Mukàji-musèla ùkaadi mumanè kuya.

⁶⁸ Bwalu, nwamònu's, Yèyè, Yèyè kèna nè mpèkaatù nànsha umwe to, kakwèna kantu nànsha kàmwe kàà diMubanda naakù to. Ngàsà wa Nzambi mmumubwikile Yèyè yònsò. Nè bwanga butòokeshi bùkaadi buumùshe mpèkaatù nè mpèkaatù bumwelè kule mu mùshindù wà nè, kakwèna nànsha mene civùlukilu cyèndè to; kantu nànsha kàmwe to ànu bukezùke, bupwàngàne, mu Bwikadi bwà Nzambi. Kaa, s'bivwa bikèngela kufikishaci Mukàji-musèla ku ditwàYe binù nè dyela dyà mbilà kùdi Nzambi's!

⁶⁹ Nyewù mvùluka kaabwalu kakesè; mpindyewu piikalàbi nè ncyèna ngàngata díbà dyènù dipite bùngi to, mu maalu à mbilangilu aa. Ndi. . . ndi—ndi ngèza eci mu kiipàcìlà, bwà kudyùmvwakù, too nè pàndi ngùmwa Nyumà bimpè menemene, bwà kubanga.

⁷⁰ Eci ke—eci ncintu cinsantu. Nwamònu anyi? Cidi, nwamònu's, nganyi udi mumanyè bintu abi nànkù? Muntu nànsha umwe pa kuumusha Nzambi. Nè byòbi kabyèna nè cyà kwikala bibuulùdiibwe to, nè mbijaadika mu Bible nè kabivwa mwà kwikala bibuulùdiibwe, kumpàlà kwà ditùkù edi nànsha. Aci's ncyà bushùwà menemene. Nwamònu anyi? Bivwa—bivwa ànu byà bàfwikakaja; kàdi patùdi twakulangana apa tudi nè cyà kubipeta ànu mu byòbi menemene, Bulelèlà, Bulelèlà bushìndikiibwe. Nwamònu anyi? Mònaayi.

⁷¹ Mpindyewu, kuvwakù mwànà mukèsè wa—wa bakàji mu wesètè mwàmwa, mùshindù wùvwayè—wùvwaye mukwàcike dinanga bwà. . . Muntu ùvwa mukwàcike dinanga bwèndè yèyè.

Bu mùvwàye musùmbi wa ngombe, yéyè wàkalwa kwôkò aku bwà Kùmpànyì wa Armour. Nè—nè bàvwa nè cikampànda ci—cinène. . .

⁷² Sheefù kulwayè ditùkù kampànda, mwànà wa balùme wa sheefù awu mufùmine ku Chicago, nè, mu bushùwà bwà bwalu, bàvwa babàtèèke ku mukàlù wà ku ncyàmà ànu wètù wà pàtupù ewu, wà mu wesètè. Bânà bàà—bàà bakàjì abu muntwamu, kuvwàlabò nè ku mènù; yònsò wa kùdibo ùvwa muswè kupeta nsongààlùmè awu, bushùwà, nudi bamanyè's, bwalu awu ke uvwa mwànà wa balùme wa muntu munène awu. Pa nàнку, kuvwàlabò mu mvwàdilu wabò wa ku ncyàmà wa mu wesètè amu.

⁷³ Nènku—nènku ke citùbo bènza mu wesètè amu. Mbafùme ku dipicila mu bùmwe bwà ku maalu à bikùmà awu. Nènku Mwanèètù Maguire, ngèèla meeji nè ùdi kaaba aka mpindyewu, bààkamukwàta mu ville kàyì muvwàle bilàmbà byèndè byà mu wesètè to, nè kumukùpabò mu—mu bùlokò. Nè kumupicishabò ku tubàdi tukwàtakaja, nè kumufucishabò cibawu bwà cyòci aci, nè kumwenzejabò bwà àye kasumba cyà kuulu nè cyà kwinshì byà mwomùmwe byà beena wesètè. Nè mèmè nkààdikù mumòne bàmwe bàà kùdibo bènda bèndakana nè bingoma *mòna* bule bilebeleja ku mikàbà. Bàdi bènda ànu mùdi beena kalaba bàà kuntwaku abu. Bàdi bàteeta bwà kwikala nè nsòmbelu wa cintu kampànda cyà mu matùkù à kale, mapite kacya kale awu. Nwamònu anyì?

⁷⁴ Nè pashìishe, mu Kentucky mwàmwa nudi nuteeta bwà kwikala nè nsòmbelu wa mu matùkù à kale mamananè kupità à mu esètè emu, nucidi mu cikondo cyà Renfro Valley nè bikwàbò abi. Nutu baswè kwalukila paanyimà ku matùkù à kale. Kùdi cintu kampànda cidì cyenzeja byòbi abi.

⁷⁵ Kàdi pàkaadibi bwà kwalukila, kwalukila kuya ku Èvànjeeliyò kampànda wa ku cibangidilu, kanwèna baswè bwà kwenza aci to. Nudi baswè cintu kampànda cyà bwena-leelù, nudi numòna's. Bidi bìleeja nè, nwamònu's, nudi—nudi. . . kùdi. . .

⁷⁶ Kàdi ncinyì cidì cìfikishà muntu mulùme ku—ku dyenza dyà bibi? Ncinyì cidì cìmufikishà ku dinwà dyà maalà nè ku dyenza dyà bintu byà lukutukutu, anyì muntu mukàjì ku dyenza dyà bibi? Mbwalu ùdi ùteeta bwà. . . Kùdi cintu kampànda mu yéyè mukàjì awu amu, ciikàle nè nyòòtà. Kùdi cintu kampànda mu yéyè muntu mulùme awu amu, ciikàle nè nyòòtà. Nènku bàdi bàteeta bwà kumana nyòòtà yà cijila ayi nè bintu byà pa buloba. Pààbi's, Nzambi nguvwa nè cyà kwikala cintu cidì mwà kumana nyòòtà ayi. Yéyè ngutu mukwenzè mùshindù awu, bwà kwikala nè nyòòtà ayi. Ke bwà cinyì udi nè nyòòtà yà cintu kampànda. Nzambi ngutu mukwenzè mùshindù awu, bwà wamòna mwà kukùdimukila kùdiYe bwà nyòòtà yà cijila ayi.

Nwamònu anyi? Kàdi paùdi uteeta bwà kumana nyòòtà ayi. . . Mùshindù mwinè wùdiku muntu kampànda mwà kupeta dikima dyà kwenza cyôci aci's wè! Kwèna nè bukenji nànsha bùmwè bwà kwenza nàнку nànsha, bwà kuteeta bwà kumana nyòòtà yà cijila yùdi umvwa bwà cintu kampànda ayi, nè, pashìishe, uyikùdimwina ku maalu à pa buloba, uteeta bwà kuyìmana nè maalu à pa buloba. Kwèna mwà kucyènza nànsha. Kùdi cintu ànu cimwèpelè cyà kuuja kaaba aku, ciinè aci n'Nzambi. Nè Yèyè ngudi mukwenzè mùshindù awu's.

⁷⁷ Pa nàнку, bânà bakesè bàà bakàji aba—aba kuvwàlabò mvwàdilu wabò wa ciibidilu wa beena ku wesètè awu bwà nsongààlùmè ewu pavwàye—pàvwàye mwà kupàtuka kuntwaku. Nè yònsò wa kùdìbo ùvwa mutwìshìibwe nè yèyè nguvwa mwà kupeta nsongààlùmè awu.

⁷⁸ Kùvwa mwanààbò wa bakàji wa tatwàbò mukwàbò mu ferme amu, mwikàle mwànà wa nshiyà, pa nàнку yèyè nguvwa wenza mi—midimu yònsò pa kaaba kàà bwòbò aba. Bwalu, bìvwa bikèngela bwà bwòbò kwikalabò balamè nzàdi yàbò yà ku minu milongolola bìmpè, nudi bamanyè's, nènku kabàvwakù mwà kusukula màlòngò to bwà byanza byàbò abi nè bikwàbò. Nènku yèyè nguvwa wenza midimu yònsò yà mikolè ayi.

⁷⁹ Ki pashìishe, ndekeelu wa byònsò, nsongààlùmè awu pààkalwàye, kupàtukabò è kuya kamwangata mu mùshindù wà kale wà mvwàdilu wà beena mu wesètè, mu ditempu dikòka kùdi tùbalù. Ki kulwabò, bènda bàtuuta bingoma nè bènzà bintu byà lukutukutu, nudi bamanyè's, nè bàdìtwàla bibi. Ke dilòòlò adi kujàbò maja à dikèma muntwamu, maja à—à mùshindù wà cyena-kale awu, nè beena ma-fermes wònsò à mu nyùngulukilu amu, mwaba wu, nènku bàbwela nè maja àbò awu, nè bikwàbò. Ke, katancì aka anyi, mòna's, abi kutùngunukabì, kwenzabi cyanga munda mwà matùkù àbìdì anyi àsàtù.

⁸⁰ Pashìishe, dilòòlò kampànda, nsongààlùmè awu kwanjìyè kupàtuka, too nè. . .kupàtuka mu mwaba awu, ànu bwà kwanjìyè kwikishakù kakesè ku miinè maja awu, nè kuyàye kule nè nsongààkàjì ayi. Ke kwenzabi nè elè mèsù, pàvwàye wènda ùpweka ku lupangu lwà tùbalù apu. Kwòkù aku nyawù nsongààkàjì mutekètè ùvwa ùyakù, mwenzè bu uvwa ne mmwènekèlu wa musùnsùke. Nè ùvwa nè mbaafù wa disukwila màlòngò mùle tètè nè màyi, ùvwa ùsukula màlòngò. Ki kudyàmbidilayè nè: “Kacya ncìvwakù mumòmòne kwònsò aku to. Ndi—ndi ndìkonka kwáfùminiyè's.” Pa nàнку kwanjìyè ànu kudìpàngadikila bwà kuyiila ku luseke lwà nzùbu wa—wa malààlù à beena mudimu aku, nè kupwekelakù, nè kwalukila, ku luseke lwà lupangu lwà tùbalù aku, ke kutwilanganayè nendè.

⁸¹ Ùvwa ku makàsà kutupù. Kwimanayè. Kushààlaye mwinàmìje mutù wèndè panshì. Mumòmòne nè ùvwa nganyì, nè kudyùmvwàye bundù bikolè. Ùvwa mumanyè muntu munène

awu. Kàdi yèyè ùvwa ànu mwanààbò wa tatwábò mukwàbò bwà nsongààkàjì mikwàbò ayi. Tatwábò bwòbò nguvwa mfùmù mutèèka pa kùmpànyì munène wa Armour awu, pa nàнку bwòbò bàakatungunuka nè. . . Yèyè wàkashààla ànu nè mèsù miinyika panshì. Ùvwa nè bundù bwà kwikala ku makàsà kutupù.

⁸² Awu kwamba nè: “Dyèbè nganyi?” Kumwambilayè. Awu kwamba nè: “Bwà cinyì wèwè kwèna kwàka ku. . . kùdì bakwàbò bàba bàsanganyibwa aku’s?” Ke kwenzayè bu udi ufila tubingilà kampànda.

⁸³ Ki pa nàнку, dilòlò dyàkalondà kumukèbayè cyàkàbidì nè mèsù. Ndekeelu wa byònsò. . . Yèyè ùvwa musòmbè mwaba awu’s. Kàdi bwòbò bwònsò bàvwa ànu kacya bamòngàngàne ne lukutukutu alu, ne bikwàbò byònsò. Yèyè—yèyè kusòmbela pa lupangu lwà túbàlù apu nè kushààlayè mumwindilè bwà kulwaye, bwà kwimansha màyì àvwaye musukùle naawù màlòngò pambèlu apu awu. Ki kushààlayè mumwindile. Ke kumwambilayè, yèyè nè: “Udi mumanyè kiipàcilà kàànyì kalelèlè kàa diikala mwaba ewu anyi?”

Yèyè kwamba nè: “Bwàlà’s, mukalenge, ncyèna mumanyè to.”

⁸⁴ Awu kwamba nè: “Kiipàcilà kàànyì kàa diikala mwaba ewu nkàa dikèba mukàjì wa nzùbu.” Yèyè kwamba nè: “Ndi musangàne ngiikàdilù mu wèwè amu udi bwòbò abu kabàyi nendè nànsha.” Mèmè mvwa ngèèla meeji pa Èkèleeziyà, nudi numòna’s. Yèyè kwamba nè: “Udikù mwà kuswà bwà mèmè kukusèla anyi?”

Yèyè kwamba nè: “Mèmè? Mèmè? Mèmè—mèmè ncyènakù mwà kwela meeji ku cintu bu nàнку to, mèmè ewu.”

⁸⁵ Nwamònu’s, awu’s ke mwànà wa balùme wa sheefù munène awu. Yèyè nguvwa mwena kùmpànyì nè fermes yònsò yìvwà yìsanganyibwà mu citùpà cijimà cyà buloba aci, nè bikwàbò byònsò, nudi numòna’s. Kwambayè, kwambayè nè: “Èyowà’s.” Yèyè kwamba nè: “Nci—nciwwakù mwà kupeta nànsha umwèpelè wetù ewu mu Chicago to. Ndi—ndi nkèba mukàjì wa nzùbu wa cyà bushùwà. Ndi nkèba mukàjì wa nzùbu mwikàle nè ngiikàdilù. Nè cintu cìndì munkacì mwà kukèba aci, nyewù ncìsangana mu wèwè amu.” Yèyè kwamba nè: “Udikù mwà kuswà bwà mèmè kukusèla anyi?”

Kwambayè nè: “Èè. . .” Cìvwa cimupapùle. Ki yèyè kwamba nè: “Èyowà.”

⁸⁶ Ke awu kwambayè nè: “Èè. . .” Kumwambilayè nè ùvwa mwà kwalukila. Yèyè kwamba nè: “Mpindyewu, bùdì wèwè naabù bùdì ànu bwà kudìlongolola, nè mu cidimu cimwèpelè kuumukila ku leelù nêngàalukilè. Èè. . . Nè nènkwangàtè, nè nkuumùshè mwab’ewu nye neebè. Kabyàkukèngela bwà wèwè kukwàta kàbidì mudimu mùshindù ewu nànsha. Mèmè

nênkwangàtè. Nènku nénye mu Chicago, nènkwibàkìlè nzùbu wa bwenà ùdì kùyìku mwanji kumòna kacya to.”

⁸⁷ Kwambayè nè: “Ncyèna, kacyakacya—kacyakacya mèmè ncitukù mwanji kwikala nè nzùbu to. Mèmè ndi mwànà wa nshiyà,” mwàkambàye.

⁸⁸ Awu nè: “Mèmè nènkwibàkìlè nzùbu, wa cyà bushùwà ewu.” Yèyè kwamba nè: “Nèngàalukilè.”

⁸⁹ Kushààlayè ùmulondesha, mu bule bwà cikondo aci, cidimu cijimà. Ewu pèndè wàkawkwàta mudimu nè mwèndè mwònsò mùvwàyekù mwà kwenza amu, bwà kulamakù kaadikùtà búngì bukùmbàne kàà ku difutu dyèndè dyà ndola umwèpelè ku ditùkù adi aku, anyì cyònsò civwàye ùpeta ku mfrangà yèndè yà byàkudyà ayi, bwà kusùmbayè nkanzu wèndè wa dibàkà. Cifwànyikiji cipwàngàne cyà Èkéleziyà’s! Nwamònu anyì? Nwamònu anyì? Yèyè wàkalongolola bivwàlù byèndè.

⁹⁰ Nènku, nudi bamanyè’s, pààkapàtulàye civwàlù cyà dibàkà eci, bânà bààbò—bààbò bàà bakàji bàà tatwèndè mukwàbò abu kwambabò nè: “Mòna’s, kaawèwè kànà kakwàtè nè byà luse, kakùtākàne aka. Udi pèèbè wela meeji nè muntu bu yèyè wàwa mmufwànyìnekù kwikala bwalu nè kaawèwè aka?”

⁹¹ Kwambayè nè: “Kàdi s’mmundayè.” Amen. Yèyè kwamba nè: “Yèyè ngudi mulayè.” Yèyè kwamba nè: “Ndi mèmè mwitabùùje díyì dyèndè yèyè.”

⁹² “Kaa, yèyè’s ùvwa ànu ùkukùtakaja pèndè cyanaànà.” Bòbò nè: “Bu yèyè mwà kwangatakù muntu kampànda, nùnkù’s mmwangàte umwe wa kùdìbo.”

⁹³ “Èyowà’s,” mwàkambàye, “kàdi’s mmundayè mèmè. Ki cìndì mwindile.” Amen. Nè mèmè pàànyì, ndi mwindile.

⁹⁴ Pa nànkù, matùkù àvwa ànu ènda àpita ànu kupita. Ndekeelu wa byònsò ditùkù adi kulwadi, díbà kampànda divwàye nè cyà kwikala mwaba awu, pa nànkù kuvwàlayè civwàlù cyèndè aci. Wa bwalu kàvwakù mupetè nguumu yà kùdiye to. Kàdi ùvwa mumanyè nè yèyè ùvwa mwà kulwa, ke kuvwàlayè bilàmbà byèndè byà dibàkà abi, kulongololayè bintu.

⁹⁵ Èè, díbà adi kusekabò menemene mwaba awu. Bwalu, sheefù munène awu ùvwa mutùme mukenji kùdì—kùdì mulombodi, anyì—anyì kùdì. . . Nànsha umwe wa ku nsongàakàji ayi kàvwakù muumvwè cintu nànsha cìmwè pa bwalu abu to, pa nànkù civwa ànu bwalu busokoka bwàbò bwòbò. Ke mùdìbi kàbì, nànkù awu. Ncyà bushùwà nè ke mùdìci.

⁹⁶ Kàdi ewu mwànà wa bakàji yèyè, mukùngàmàngàne ànu naaci, ùvwa mwimanyìne pa díyì dyèndè dyà nè yèyè ùvwa mwà kwalukila bwà kumwangata.

⁹⁷ Pa nànkù, ke kutùdikabò mu tuseku. Ki kwelanganabò mabòkò muntu nè mukwèndè, bènda bàja maja bamunyùngùlùke. Kwambabò nè: “Ha!” Bàseka, nudi

bamanyè's, mùshindù awu, bàmba nè: “Kànà kakesè, kakwàte nè byà luse, kakùtākàne wè!”

⁹⁸ Kushààlayè ànu kacya wimana mwaba awu, kàyiku nè kaabundù nànsha kàà kànà mu yèyè to. Ûvwa mukwàte bilòngò byendè. Nè civwàlù cyèndè cyà dibàkà civwa ciswika bîmpè; ùvwa mutàte, nudi bamanyè's. “Mukàjì-musèla Wendè wăDilongòlòlù.” Nwamònu anyi? Ûvwa mushààle ànu kacya wàkwàta bilòngò byèndè, mwindile.

⁹⁹ Kwambabò nè: “Mpindyewu, s'mvwa mukwambile nè mbyà mafi. Wamònu's, kààkulwa to.”

Yèyè kwamba nè: “Ncìcidi nè tukwàbò tusunsa tùtaanu.”
Yèyè kwamba nè: “Yèyè's neikalè kaaba aka.”

Kaa, bwòbò bàvwa ànu bàseka's!

¹⁰⁰ Kàdi pààkambà ànu ntankù wa kale awu kwela kangonga ku tusunsa tùtaanu àtu, kuumvwabò tùbalù twènda pidikàpidikà, lusenga lwènda lùjuuka mwinshì mwà nkàta. Ditempu dyà kale dikòka kùdì tùbalù adi kwimanadi.

¹⁰¹ Kutùpikayè è kuumuka munkaci mwàbò amu, nè kudyèlayè pambèlù pàà ciibi. Ki nsongààlùmè awu kupàtukayè mu ditempu dyà nkàta yinaayi adi, nè nsongààkàjì awu kudyèlayè mu mabòkò èndè. Ewu kwambayè nè: “Byònsò byàjìkì mpindyewu, munanga wanyì.” Kushiyayè tuumàngumba twànà twàbò twà tatwèndè mukwàbò atu tusòmbe mwaba awu, munkaci mwà kutàngila. Yèyè—yèyè kuya ku nzùbu wèndè, ku Chicago.

¹⁰² Mémè ndikù mumanyè mukwàbò mulayi mulenga wà dikèmà wà mùshindù awu, kàbìdì, wùcìdìku too nè mpindyewu. “Ngààyi bwà kanùlongolwela mwaba; nêngààlukilè bwà kunwàngata.” Mbafwànyine kwamba mutùdì bapàle. Kàdi, mwanèètù, bwànyì mémè, mpindyewu mene, nè Bitampì ebi munkaci mwà kulamunyiibwa mùshindù ewu, mu cintu citàmbe mfùkìlu eci, ndi bu udi mwà kuumvwa cyonà, pàdì ntankù wàwa ùtuuta too nè mu Cyèndèlèlè apu. Ndi bu udi mwà kumòna Mwanjèlò awu mwimàne mwaba awu wàmba, ku ndekeelu kwà Mukenji wà mwanjèlò wa mwandamutekètè nè: “Cikondo kacya kwikalakù kàbìdì to.” Mukàjì-musèla mukèsè, wa lulamatu awu neàbuukè àkadyèlè mu mabòkò à Yesù dimwè dyà ku matùkù aa, mwangàcìbwe muyè ku Nzùbu wa Taatù. Twèlanganaayikù meeji pa maalù aa patùdì tutùngunuka apa.

¹⁰³ Mònaayi mudimu wà bwambi wà ntambwe, Dìyi; ngombe, mudimu mukolè nè didifila; budimù, bwà balongolodi; nè cikondo cyà—cyà mukankù, cibwela, cìikalà nè cyà kubuulula nè kwangulula bintu ebi nè kubileeja.

¹⁰⁴ Mpindyewu tudi tujandula, mu disangisha dyà makèèlèlè dilòòlò adi, kàbìdì, nè bwalu busokoka mbukàngùke nè Cìtampì eci, civwà cibèngàngàne ànu menemene nè dyumvwa dyànyì

mémè dyà kale. Mwikàle ànu ncinkila nè cìvwa mu cyòci, mwwa misangu yònsò ànu ngiitaba nè misuùkà yidì mwinsì mwà cyoshelu yìvwa mbeena Kilistò bàà ku cibangidilu bààkafwilà diitabuuja abu. Kàdi twálu kujandula, makèèlèlà dilòòlò awu, pátùlamwìnyi Mukalenge Nzambì Cìtampì aci, nè kakùyì mpatà to kabyènakù mwà kwenzeka nànkù to. Kabàvwa bwòbò abu nànsha. Abu bwòbò bàvwa bayè mu Butùmbi, buludi nè mu luseke lukwàbò menemene, nènku's ke bwòbò bàvwàku abu. Tudi tujandula nè bàvwa mbeena Yudà bàvwa mwà kulwa kumwènèka munda mwà cikondo aci, cìvwa . . .

¹⁰⁵ Kuumukila ku dibìikila, mpindyewu, dyà binunu lukàmà nè makùmi ànaayi nè binaayi, mutùdi tubwela dilòòlò edi nè mààlàbà, nè—nè pankacì pàà Cìtampì Ciisambòmbò nè cyà Mwandamutekètè apu, ke pàdi binunu lukàmà nè makùmi ànaayi nè binaayi bìbìikidiibwa.

¹⁰⁶ Nè pashìshe tudi tujandula nè, bàvwa mbafwile diitabuuja bààkashebeyàbo, kàdi too nè mpindyewu kabàyì banjì kwikala . . . Bàvwa bavwàle mizàbì mitòòke, kàdi mènà àbò àkaavwa àsanganyibwa mu Mukàndà wà Mwoyi wà Mwànà wa mùkòòkò. Nè bààkabàpèèsha mizàbì mitòòke, yònsò wa kùdìbo. Nè tuvwa bangàte cyòci aci. Nè kí ncinga cintu to, mémè ncyèna ngiitabuujakù ncinga cintu to, bàvwa ànu mmusumbà wà—wà beena Yudà bààkapiçilà mu cipungu cyàmba kwenza bu dikèngà dinènè abu. Pàvwàbì nè, mu cikondo cyà mvità yà ndekeelu eyi, bàvwa . . . bàvwa nè . . . Byàkenzeka nè bìikalè bakinyiibwa kùdi bantu bwònsò. Nè Eichmann wàkashebeya mìliyò yà bwòbò abu mu Allemagne. Nudi bafùme ku dyumvwa dilumbulwisha. Mìliyò yà bantu bàvwà kabàyì nè bwalu bashebeya, beena Yudà, ànu nè bwalu bàvwa beena Yudà; kakùyì kakwàbò kabingilà nànsha kàmwè to.

¹⁰⁷ Bible mmwambè kaaba aka, nè: “Bààkabàshebeya bwà bujaadiki bwàbò bwà Nzambì, bwà—bwà Dìyì dyà Nzambì, nè bwà bujaadiki bùvwàbo bashààle kacya bààkwàta.” Mpindyewu tudi tujandula nè Mukàjì-musèla ùvwa Dìyì dyà Nzambì nè bujaadiki bwà Yesù Kilistò. Aba bwòbò kabàvwa nè bujaadiki bwà Yesù Kilistò nànsha.

¹⁰⁸ Nè tudi tujandula nè Bible ùdi wàmba, nè: “Izàlèèlà mujimà, Izàlèèlà udi mudyànjlila kulongolola awu, neàsungidiibwè,” Loomò 11. Mpindyewu aci tudi bamanyè. Nènku mwaba awu ngutwàmònu misuùkà ayi.

¹⁰⁹ Mpindyewu tàngilàayi nùmonè mùkaadici pabwìpì. Bwà cinyi eci kacìvwakù mwà kwikala kumpàla? Mbwalu kacìvwa cyenzèke kumpàla to. Mpindyewu ngunùdi mwà kucimòna, nudi numòna's. Nwamònu's, Nyumà Mwìmpè munène awu, mumòne mùvwà bintu abi munkacì mwà kulwa munda mwà—mwà bikondo nè bikondo. Kàdi patùdi twakulangana apa ke

kubuuludiibwaci eku, nè dîbà adi nutàngila mwaba awu numòna nè m'Bulelèlà. S'ki mwaba wùdici ngwówò awu.

¹¹⁰ Mpindyewu, bàvwa—bàvwa mbààkafwilà diitabuuja mu dikènga dinène, anyi dikènga dyà pa kubwela mu dikènga dinène, dyà Eichmann adi. Mpindyewu, bàdi ànu cifwànyikijilu cyanààna cyà bafwile diitabuuja bàà binunu lukàmà nè makùmi ànaayi nè banaayi abu, mutwikalà mwà kubwela amu, pankaci pàà Cítampì Cìisambòmbò nè cyà Mwandamutekète apu. Nwamònu anyi?

¹¹¹ Nè Cítampì cyà Mwandamutekète cidi ànu cintu cìmwèpelè, kwàjikì, nè ng'eci nùнку: “Kwàkenzeka cinyàànyà mu Dyulu mu ntàntà wa cyàbibidì cìmwè cyà dîbà.” Nènku mpindyewu ànu Nzambi ngudi mwà kubuulula aci. Kacyèna nànsha mene cileejìbwe mu cimfwànyi, mwaba nànsha wùmwe to. Aci mbwà mààlabà dilòòlò. Nùnsambìdìlaayi. Nwamònu anyi?

¹¹² Mpindyewu, tudi tumòna mpindyewu, patùdì tubwela mu Cítampì Cìisambòmbò apa. Mpindyewu Taatù wa mu Dyulu àtùkwàcìshèku patùkaadi tushàalakù batùùje mpindyewu bwà Cítampì Cìisambòmbò apa. Mpindyewu mvensà wa 12 wa nshapità mwi6.

Nè ngàkatàtàngila pàvwàye... pààkakàngulàye cítampì cìisambòmbò, nè, mònaayi, kwàkenzeka dizakala dinènè dyà buloba; dîbà dyà muulu dyàkalwa difùke bu mufuku wà myòsà, nè ngondo wàkalwa bu mùdì mashi amu;

Nè mìtootò yà mu dyulu yàkapòna panshì... buloba, bu mùdì mucì wà mfigi wimansa tumuma twàwù twà mfigi tùdì katuyì twanjì kuboba atu, pàdiwu munyùkùshìbwe kùdì cipeepèlè cìkolè.

Nè maulu àkuumuka mùtù mukàndà muvùnga pàdiwu wùvùngùibwa apu; nè mukùnà nè mukùnà wònsò nè cisanga nè cisanga cyònsò byàkuumushìbwa mu myaba yàbì.

Nè bamfùmù bàà pa buloba, nè bantu banène, nè babanji, nè tùpìteenà tunène, nè bantu bàà bukolè, nè mupika... yònsò nè mudishikàmìne yònsò, bààkasokoma mu meenà nè mu mbwebwe yà mikùnà;

¹¹³ Nudi numòna mwaba awu anyi? Bàtàngilaayi, “bantu bàà bukolè,” nwamònu's. Cìvwàbo benzè ncinyi? “Bàvwa bapeté mvinyò wa ciiji cìkolè cyà masandi à ndumbà awu.” Nwamònu anyi? Bàvwa menemene ànu bantu bàà mulongo wùmwe wùmwe awu mbàakanwà mvinyò wendè awu. Nwamònu anyi?

Nè bààkambila mikùnà nè mbwebwe ayi nè: Tùpònènaayi, nè tùsokòkaayi ku mèsù kwà ewu udi musòmbe pa nkwasà wa butùmbi awu, nè ku ciiji cìkolè cyà Mwàna wa mùkòòkò.

*Bwalu ditùkù dimènè dyà ciiji cìkolè cyèndè dyàfiki;
nènku wìkala nè bukolè bwà kukàndamana nganyì?*

114 Mbwelelu kaayi wa ku... Nwamònu's, babàndi bàà pa túbàlù mpindyewu, nyama yà babàndi bàà pa túbàlù, nè Nyama myandamunyi ayi, byàjiki. Pashiishe, twètù kwangata, tudi tumòna bafwile diitabuuja mwinshi mwà Nkwasa wa butùmbi. Mpindyewu eci, kuumukila pa díbà edi, bafwile diitabuuja aba ke bwòbò beena Yuda bàà ba-Orthodoxes bàakafwilà mu diitabuuja dyà bwena Kilistò... anyì mu—mu diitabuuja dyà butèndeledi, bwalu bwòbò kabàvwa mwà kwikala beena Kilistò nànsha.

115 Vùlukàayi nè, Nzambi ngwàkabàfomija mèsù. Nè nebiikalè bampofo ntàntà mule, too nè piikalà Èkèleeziyà wa bàà Bisàmbà byà bendè muumùshìbwe mu njila. Bwalu, Nzambi kèna ùkwàta mudimu nè bisàmbà bìbìdi abi musangu wùm wèwùm wè awu to, bwalu cidi cibèngangana bikolè menemene nè Díyì Dyèndè.

116 Vùlukàayi nè, Yèyè ùtu ùkwàta mudimu nè Izalèlèlà bu ditùngà, misangu yònsò. Citu ditùngà dyà Izalèlèlà.

117 Bàà Bisàmbà byà bendè, bu bantu-nkàayà nè: “cisàmbà cyangata mu bàà Bisàmbà byà bendè.” Nè byàkakèngela, bàà Bisàmbà byà bendè, byàkakèngela bwà kwenzaci... cyenza nè bantu bwònsò bàà pa buloba, pa nàнку ku musangu nè ku musangu kùdi mwena Yuda udi ubwela mu cyòci aci. Nwamònu anyì? Anu mùdi—mùdi Mùlaabù, nè Irlandais, nè Indien, nè mukwàbò kanà yònsò, bwònsò mbantu bàà pa buloba, benzè cisùmbù cyà bìlòngò cidi Mukàjì-musèla aci. Nwamònu anyì?

118 Kàdi, mpindyewu, pàkaadibi bikafika díbà adi ku dikwàta dyà mudimu nè Izalèlèlà, mu citùpà cyà ndekeelu eci cyà lumingu lwà makùmi mwandamutekètè, Yèyè ùdi ùkwàta naabò mudimu bu ditùngà, bwalu bwà bàà Bisàmbà byà bendè nebwikalè bujikè. Àbìdi aa díbà nedifikè, nè pàmwàpa ndilòlò edi—edi mene, diikalà Nzambi mwà kukùdimuka menemene kuumuka kùdi bàà Bisàmbà byà bendè, mu kaabujimà. Menemene's! Ke mùdiYe mwambè. “Nebàdyatè bimanu byà Yelusalèmà ku makàsà too nè pààjikà cipungu cyà bàà Bisàmbà byà bendè, pààjikà bikondo abi.” Èyowà's, mukalenge!

119 Nènku díbà adi: “Ewu udi mukooyike àshaalè mukooyike; ewu udi mwakàne ìkalè mwakàne.” Nwamònu anyì?

120 Kakùcyèna kàbìdi Mashi pa nkwasà wa—wa—wa mwaba wà cijil-... mu mwaba wa cijila to, nànsha kakesè. Kakùcyèna kàbìdi Mashi pa cyoshelu to. Mulàmbù ùkaadi mumana kuumusha, nè kakwèna cintu nànsha cimwè to ànu mwishì nè mikenyi nè cilumbulwidi mwòmò amu. Nènku's ke cyòci aci menemene cidi cipòngòlòdìbwe kaaba aka dilòlòlò edi aci. Nwamònu's, Mwànà wa mùkòkò ùkaadi mumanè kushiya... mudimu Wèndè wà butwàngaji awu. Mudimu wà butwàngaji wàmanyi kujika, pa Nkwasa wa butùmbi apu. Nè Mulàmbù,

mutwàmuleejì ànu menemene mu cifwànyikijilu amu, Cilongo Cipikudi aci, Mwânà wa mùkòòkò udi umata mashi udi useemena awu. Mwânà wa mùkòòkò uvwa mushebeya, Udi umata mashi, mushebeya, muzaaza awu, wàseemenyì nè wàngàci Mukàndà awu mu cianza Cyèndè. Aci mbwena kwamba nè, matùkù àjiki. Mpindyewu ùkaadi ùlwa bwà kunana cidiYe mupikùle aci. Amen! Aci's cidi ànu citùma cintu kampàndà cipìcila mu mémè emu!

¹²¹ Tudi tujandula mpindyewu nè, Yone wàkamba nè: “Ngàkatàngila pààkakàngulàYe Cítampì Cìisambòmbò, kwakenzeka dizakala dinènè dyà buloba,” díbà adi bufùki bwònsò nkòong bwàkiimanyikiibwa. Nwamònu anyì?

¹²² Nzambì ùdi wènza bintu binène, bu mùdi kwondopa kwà babèèdi, nè kutàbeeja kwà bampofò mèsù, nè kwenza kwà mudimu munène.

¹²³ Kàdi tudi tujandula, kaaba aka nè, bufùki bwàkadishinda byà bibì, èyowà, bufùki bwònsò. Tàngilàayi nùmonè cyàkenzeka aci: “Dizakala dyà—dyà buloba; díbà dyà muulu dyàkalwa difiike, nè ngondo kàakaswa kufila bukènkè bwèndè to; nè mitootò yàkanyùkushiibwa nè yàkapòna panshì.” Nèku, mòna's, bintu byònsò byàkenzeka, nwamònu's, ànu menemene pa díbà dyà dikàngudiibwa dyà Cítampì Cìisambòmbò eci. Ke pàdibi byènzeka, dyàkàmwè ànu paanyimà pàà dimanyisha dyà bafwile diitabuuja abu, nwamònu's. Bwà bafwile diitabuuja bùkaavwa bumanè kujika.

¹²⁴ Mpindyewu's nudi numòna nè tudi pabwìpì mene bwà kubwela mu dyòdi díbà adi mpindyewu. Tudi bafwànyine kubwelamù, pa díbà kanà dyònsò, nwamònu's, bwalu Èkèleeziyà ùkaadi wàmba kwikala pabwìpì nè kwasa lwendu Lwèndè lwà kubùuka kuya alu. Kàdi vùlukàayi nè, pènzekà bintu ebi, Mukàji-musèla kààkwikalapù to. Vùlukàayi ànu nè, Mukàji-musèla mmumanè kuya, kabyèna bìkèngela bwà kupicilaYe mu cintu nànsha cimwè cyà ku byòbi abi to. Eci ncikondo cyà Dikènga dinène, cyà dikezudiibwa dyà—dyà èkèleeziyà; mbimwela yèyè pambidi, bwà yèyè kupicilamù, kí m'Mukàji-musèla nànsha. Yèyè ùdi ùmusha munanga Wèndè mu njila. Èyowà's, mukalenge! Bwà Yèyè kaayi, ùkaadi mumanè kuMupikula. Nwamònu's, mbyenzè mu mùshindù kampànda bu. . .Aci's ndisòbola Dyèndè Sungasunga, disungula Dyèndè Sungasunga, ànu mùdi muntu mulùme yònsò ewu wàngata mukàjèndè-musèla amu. Nwamònu anyì? Mpindyewu, dizakala dyà buloba. . .

¹²⁵ Tùpalakajàayaaku Mifùndu mpindyewu. Ndi—ndi muswè. . .Nudi nè crayon nè dibèji anyì? Ndi muswè bwà nwènzèku cintu kampàndà bwànyì mémè. Bu munùdi baswè kufùnda, fùndaayi eci, bwalu, ambà ànu wèwè uswà kwangata

mukàbà wà mèyì's. Mpindyewu tudi...Ndi muswè bwà nùbalèku pàmwè naanyi, panùdi nubala apu.

¹²⁶ Pàlakajàayi Mifùndù yà bwalu bunène ebu, bwà twamòna nè munsokòntù munène ewu, anyi bwalu busokoka ebu, bývwa mwinshi mwà Cítampì Ciisambòmbò cyà Mukàndà wà Bupikudi. Mpindyewu vùlukàayi nè, aa mmalu masokoka masokòme. Nènku Bítampì bisambòmbò abi, byònsò pàmwè, bìdi Mukàndà wùmwèpelè munène menemene, mwikàle ànu mivùngù yìsambòmbò mivùnga pàmwè, nè yivùngulula Mukàndà wà Bupikudi wònsò nkòong. Mùshindù awu ke wàkapikudiibwà buloba bwònsò nkòong.

¹²⁷ Ke bwà cinyi Yone wàkadila mwadi, bwalu, byòbì nè muntu nànsha umwe kàvwa mwà kupeta Mukàndà awu to, bufùki bwònsò, bintu byònsò bìvwa biyè. Nùnkù's mbwalùkile ànu ku—ku—ku tupwishipwishi nè ku tusùnsukilà, nè bikwàbò byònsò, nè ku bukènkè bwà mu cibwàshìbwàshì, nè kabùyìku nànsha mene bwà kwikala bufùki, muntu, cintu cikwàbò nànsha cìmwè to. Bwalu, Adàmà wàkajìmija makenji ku Mukàndà awu. Wàkajìmija pàakatèèlejaye mukàjèndè, nè mukàjì pèndè mutèèlèje dilukakaja dyà ngènyì dyà Sàtaanà, pamutù pàà Dìyì dyà Nzambì. Nwamònu anyi? Akajìmina.

¹²⁸ Dìbà adi, kacìvwakù mwà kwalukila mu byanza byà manyaanù byà Sàtaanà abi nànsha, yèyè wàkamuumusha mu njila ku diteeciibwa awu, pa nànkù ki bwà cinyi wàkaalukila kùdi Mwenawù wa ku cibangidilu, ànu mùdi mukàndà kanà wònsò wà bwena-cintu mulelèlè wà kawùyì dyela mpatà ewu mufwànyine kwenza, nwamònu's. Wàlukila buludi kùdi Mwenawù wa ku cibangidilu, nè ùvwa n'Nzambì, Mufùki, Wàkawènza awu. Nènku Yèyè mmuwùkwàte mu cyanza.

¹²⁹ Nè kùdi mushinga wà difuta, nè wòwò awu ke bupikudi. Kùdi mushinga kampàndà bwà bupikudi, kàdi kakùvwa muntu nànsha umwe uvwa mwà kucyènza to. Pa nànkù, kwambaYè, kwenzaYè mikenji Yèndè, mikenji Yèndè Sungasunga yà Cìlongo Cipikudi kampànda. Pashìishe, kabàvwa mwà kupeta muntu nànsha umwe to. Muntu yònsò ùvwa mulediibwe ku disangila dyà mulùmè nè mukàjì, ku dijinga dyà disangila dyà mulùmè nè mukàjì; ùvwa mu mpèkaatù wa ku cibangidilu, Sàtaanà nè Evà, pa nànkù yèyè kàvwakù mwà kucyènza nànsha. Mu yèyè kamwènakù cintu nànsha cìmwè to. Kakwèna paapà munsantu nànsha umwe, nsaserdòsè, Docteur mu Bunzambì, yònsò udiyè mufwànyine kwikala awu, kàvwakù mufwànyine kwikala muntu mukùmbànyine nànsha umwe to. Nè yèyè kàvwa mwà kwikala Mwanjèlò nànsha, bwalu bìvwa bikèngela kwikalaci Cìlongo. Bikèngela kwikalayè muntu.

¹³⁰ Dìbà adi Nzambì Yèyè mwinè wàkalwa Cìlongo, mu kwangata kwà mubidi wà buntu, kupicila ku dilediibwa dyà kùdi nsongàakàjì virgò. Ke kwelaYè Mashì Èndè panshì. Awu

kaàvwa mashi à mwena Yudà nànsha. Kaàvwa mashi à muntu wa bàà Bisàmbà byà bendè nànsha. Àvwa Mashi à Nzambi. Nwamònu anyi? Bible mmwàmbè nè: “Tudi basùngìdìibwe ku Mashi à Nzambi.”

¹³¹ Mwànà ùtu wàngata mashi à taatù. Aci tudi bamanyè. Cintu kanà cyònsò mu mubidi wà bulùme cidi cipàtula èmòglòbinè. Pa nànkù tudi tusangana, mùdi nzòòlo wa cikuka ùlààdila diyi; yéyè ùdi mwà kulààdila diyi, kàdi nzòòlo wa citààlà, anyi mulùme, yéyè kàyi mumukwàte to, kadyàkutooyika nànsha. Kadyèna nè bufukè to. Mukàji ùdi ànu cyamù cyà ditooyishila cidi cyàmbulà diyi cyanàànà. Kàdi diyi didi difùmina. . . Civuba cidi cífuma kùdi mulùme.

¹³² Nènku, mu ebu bwalu, mulùme ùvwa n’Nzambi Yéyè mwinè. Ke mùndi ngamba, mùdi mwikàle muulu mpanshi, nè—nè cinène ciikàle cikesè. Nzambi ùvwa munène mu mùshindù wà nè Yéyè wàkalwa, wàkaDìfwimba mene munda mwà kantu kakesèè, too nè kulwa kaacivuba kakesèè mu difù dyà nsongàakàji virgò. Nè mu nyùngulukilu wa kwòkò aku amu Yéyè kuvudija tubùlù nè Mashi. Nè kulediibwa, nè kukoleshiibwa pa buloba. Nè kuumukila ku mbangilu wa mùshindù awu, wà kàyi musambakaja, kakùyi dijinga dyà disangila dyà mulùme nè mukàji to, nànsha dikesè.

¹³³ Ke pashìshe kufilaYè Mashi awu, bwalu Yéyè wàkalwa cilongo kutùdi. Nè Yéyè ùvwa Cilongo Cipikudi. Ke kwelaYè Mashi awu panshi, mu budìswìle. Kàvwa mwenzèjùibwe nànsha. WàkaÀfila mwikàle mudìswìle, bwà kupikula.

¹³⁴ Pashìshe Ùdi ùya pa cyoshelu cyà Nzambi, nè windilapù, pàcidi Nzambi mukwàte Mukàndà wà Bupikudi mu byanza Byèndè apu. Nènku Mwànà wa mùkòòkò udi umata mashi mmwimàne pa cyoshelu cyà mulàmbù. Ke Mwànà wa mùkòòkò awu’s, bwà kwenza bupikudi, mwikàle wàkwilangana.

¹³⁵ Dìbà adi, mmunyi mùdi ní nganyi ní nganyi ùpetakù dikima dyà kwamba nè Màriyà, anyi Yòzefù, anyi muntu wetù wa cifwàkà kanà yònsò ewu nè, mmufwànyine kwikala—kwikala mwakwidyanganyi’s! Kwèna mwà kwakwilangana pàdiku kakùyi Mashi mwaba awu to. Èyowà’s, mukalenge. “Kùdi Mutwàngaji umwèpelè pankaci pàà Nzambi nè bantu, nè mwinè awu n’Kilistò Yesù.” Aci’s ke cidi Mifùndù yàmba. N’Yéyè awu mwimàne, too nè pààpikudiibwà musùùkà wà ndekeelu; nè pashìshe Yéyè kuseemena bwà kunana cidiYe mupikùle aci’s. Kaa, mùshindù mene—mene wùdi Taatù wetù awu munène’s wè!

¹³⁶ Mpindyewu vùlukàayi nè, mpindyewu, nkàadi misangu yònsò mulongèshèlongèshe cyòci aci, nè: “Mukana mwà bantèmù bàbidi anyi bàsàtù, diyì dyònsò dijaadikiibwè.” Nènku, Mifùndu, ànu mùdibi nè kwèna mwà kwangata Mufùndù wùmwèpelè bwà kujaadika cintu nànsha cimwè to pàdiku kakùyi cikwàbò cintu bwà kupetanganaci naaci. Nwamònu anyi?

137 Nwamònu's, ndi mwà kwangata Mufùndù wùm wèpelé kwamba nè: "Yudààsà wàkaya nè wàkadyòwa," kwangata mukwàbò kwamba nè: "Ùye ùkenzè cintu cìmwècìmwè aci." Nwamònu anyi? Kàdi, nwamònu's, kacyàkunwànganakù nè Mikwàbò ayi to.

138 Nènku mwà ndyàm bidila nè, mu Cítampì Ciisambòmbò eci, pàCilamùnù Nyumà Mwímpè mwaba awu apu, nè mèmè kumòna civwàci, díbà adi mèmè kudyàm bidila nè civwa mwà kwikala bwalu bwímpè bwà kupèeshakù kàlaasà kàànyì kaacintu kampànda kàà kashiilàngàne dilòòlò edi. Nwamònu anyi? Bwalu, mbifwànyine kwikala byà bicyòkeshangana, bwà kwikala ànu nuntèeleja ngàakula díbà dyònsò, pa nànkù mèmè kudyàm bidila nè tuvwakù mwà kwenza cintu cyà cishiilàngàne.

139 Mpindyewu mònaayaaku. Bwalu bunène ebu bùvwa butwà cítampì mu Mukànda wà bwalu busokoka, wà bupikudi. Mpindyewu Mwànà wa mùkòòkò ùdi naaWù mu cyanza Cyèndè, nèikalè mwà kuCilamuna.

140 Mpindyewu tùtangilàayi mu Maatàayi nshapità wa 24, Mwànà wa mùkòòkò Yèyè mwinè ngudi wakula awu. Mpindyewu, muntu kanà yònsò mmumanyè nè Kilistò ke Mwena Mukànda wònsò nkòong, bwà baswè kutàngila aci. Kàdi eci mmuyiiki Wèndè—Wèndè kaaba aka, anyi diyiiisha Dyèndè—Dyèndè kùdi—kùdi bantu, èyo, kùdi beena Yùdà.

141 Mpindyewu ndi muswe bwà nwikalè mwà kukwàta Mukànda wènu awu mùshindù ewu, Maatàayi 24 nè Bwàkabuulwibwà 6, mùshindù ewu. [Mwanèètù Branham ùdi ùkwàta Bible wèndè mubuululu mu nshapità yibidi eyi—Muf.] Nènku tùpalakajàayikù cintu kampànda kaaba aka bwà katancì kakesè cyanààna.

142 Mpindyewu, tàngilàayi eci mpindyewu, nè nudi mwà kujandula ànu mùdici—mùdici cyanààna. Nwamònu's, cidi Mwànà wa mùkòòkò ùleeja apa, ànu mu cimfwànyì menemene, cidiYe mwambè apa mu Diyì. Wènza ànu menemene, pa nànkù aci cidi cyènza nè cìikalè cyà bushùwà. Mpindyewu, s'ke—s'ke cyònsò cidiku mu bwalu abu ncyòci aci. Eci ke. . . Cìmwè ncyòci eci, Ùdi ùcyàmba, nè mwaba wùdici cyenzèke ngwòwò ewu. Nwamònu anyi? Cidi ànu cishindiki cipwàngàne's.

143 Mpindyewu, mpindyewu tùtangilàayaaku nshapità wa 24 wa Maatàayi Munsantu, nè Bwàkabuulwibwà 6, nè kupàlakaja nshapità wa 24 wa Maatàayi. Twètù bwònsò tutu bamanyè nè yèyè awu ke nshapità kùdi mumanyi wa dibàla yònsò, muntu yònsò ewu ùya, bwà—bwà kwakula pa cipungu cyà Dikènga dinène. Didi dipàtukila mu nshapità wa 24 wa Maatàayi amu. Nènku mpindyewu twànjàayaaku. . . Byòbì biikàle nànkù, mpindyewu's tudi. . . Bwalu, tudi bamanyè nè Cítampì Ciisambòmbò eci ke Cítampì cyà dilumbulwisha. N' Cítampì cyà dilumbulwisha, ke cidiCi menemene.

144 Mpindyewu, nwamònu's, tudi bangàte mubàndi wa pa kàbalù wa—wa mufwilakanyi nè Kilistò. Twamònu Èkèleeziyà ùya; mpindyewu Kwèndè kwàjiki, ùdi ùbànda. Pashìishe tudi tumòna bafwile diitabuuja, bàà beena Yudà abu kuntu kwàka, mwinshì mwà cyoshelu. Mpindyewu dibwayika dyà dilumbulwisha ndyòdi edi, pa bantu bàdi. . .

145 Mu dilumbulwisha dyà Dikènga dinène edi ke mwàpàtukilà beena Yudà bapikula binunu lukàmà nè makùmi ànaayi nè binaayi abu. Mémè nènùjaadikilè nè mbeena Yudà, nè kí mbàà Bisàmbà byà bendè nànsha. Kabèèna bwòbò nè dipetangana nè Mukàji-musèla to, nànsha dikesè. Mukàji-musèla, tukaàdi bamanè kumòna nè Mukàji-musèla ùkaadi muyè. Kwèna mwà kutèeka aci mwaba mukwàbò kampànda to; kèna wàlukila cyàkàbìdi to too nè ku nshapità wa 19 wa Mukàndà wa byenzedi.

146 Mpindyewu mònaayi nè, bwalu, Cìtampì Ciisambòmbò cìdi Cìtampì cyà dilumbulwisha cyà Dìyì.

147 Mpindyewu, apa, tùbangààyaaku mpindyewu nè tùbalàayi Maatàayi Munsantu, ku nshapità wa 24. Mpindyewu ndi muswè ànu kunùpèeshakù cintu kampànda kaaba aka cìndi mukenkète, bwà kupeta. Mpindyewu, Maatàayi Munsantu, kuumukila ku 1 too nè ku 3, èè, ke kutwànji kubala dyàmbedi.

Nè Yesù wàkapàtuka, nè wàkuumuka ku ntempèlù; ke bayiidi bèndè kulwabò kùdìye bwà kumuleeja ngiibàkilù wa ntempèlù.

Nè yèyè wàkabàmbila nè: Nudi numòna bintu byònsò ebi anyi? Bulelèlà ndi nnwàmbila nè: Kakwàkwikala dimwè. . . dibwe nànsha dimwè dyàshààlà pamutù pàà dikwàbò, diikalà kadìyi ditònkola to.

Mpindyewu, nè (mvensà mwi3) pàvwàye musòmbe pa. . . mukùnà. . . Olèvè, bayiidi bààkalwa kùdìye pàà nkààyaabò, bamba nè: Twàmbilèku, bintu ebi nebyènzekè dibà kaayi? . . . cimanyinu cyà dilwa dyèbè neciikalè cinyi, nè cyà nshùkidilu wa buloba?

148 Mpindyewu twànjàayi kwimana apu. Mvensà yisàtù eyi, yàkenzeka, mu bushùwà bwà bwalu, mu diibìdi mu mapingaja, mu matùkù à ngondo ànaayi à ngondo wa cisanga-nkàsù mu cidimu cyà 30 cyà cikondo cyètù eci. Kàdi mvensà yibìdi yà kumpàla ayi yàkenzeka mu mapingaja à. . . à matùkù à ngondo ànaayi à ngondo wa cisanga, mu cidimu cyà 30 cyà cikondo cyètù eci. Nè mvensà mwisàtù mmwenzèke mu diibìdi dilòlò dyà ditùkù dimwèdimwè adi. Nwamònu anyi?

149 Bààkafika ku ntempèlù, nè bààkaMukonka bintu ebi. “Bishi bwà cikampànda? Nè bishi bwà cikansanga? Anji tàngilàbi ntempèlù munène ewu's! Kí mmulenga wa dikèma anyi?”

Yèyè kwamba nè: “Kakwàkushààla dibwe pamutù pàà dikwàbò to.”

150 Pashìishe Yèyè kubànda ku mukùnà è kusòmbela panshì, nwamònu's. Aci mwaba awu, ki Yèyè udi ubanga awu's; mmu mapingaja amu. Nè pashìishe pààkenzàbo nànkù, kuMukonkabò kwòkò aku, bàmba nè: "Tudikù baswè kumanya pa bìdì bitàngilà bimwè bintu."

151 Mpindyewu mònaayi, nkonko yìsàtù yàkeelàbo kùdì beena Yudà abu nyòyi eyi—nyòyi eyi, bayiidi Bèndè abu. Nkonko yìsàtù nyàakeediibwà. Mpindyewu tàngilàayi. "Ncinyi," dyàmbedi, dyàmbedi nè: "Ncinyi...? Bintu ebi nebyènzekè dībà kaayi, ndībà kaayi nè: 'Kakwàkushààla dibwe nànsha dimwè pamutù pàà dikwàbò?'" "Cimanyinu cyà Dilwa Dyèbè neciikalè cinyi?" lukonko lwibidì. "Nè cyà nshìikidilu wa buloba?" Nwacimònu anyi? Kùdì nkonko yìsàtù.

152 Mpindyewu, mwaba awu ke wùdì bantu bàabúngì bènzela cyàbò cilèma. Bàdì bàngata bintu bìdì kaaba aka ebi bwà kubitèeka ku cingà cikondo dībà adi, pàdìbi ne, numòna's, Yèyè ùdì wàndamuna ku nkonko yìsàtù. Bwòbò... .

153 Tàngilàayi mpindyewu nùmonè mùdì—mùdìci cilenga cyà memene, mvensà mwi3, nwamònu's, katùpà kàà cyambilu kàà ndekeelu aku mu mvensà mwi3 amu. "Nè neciikalè cinyi...?" Cyà kumpàla, bààkaMubiikidila ku mukùnà wà Olèvè eku, pàà nkàayabò. "Twàmbilèku, bintu ebi nebyènzekè dībà kaayi's?" lukonko lwà nombà wa kumpàla. "Cimanyinu cyà Dilwa Dyèbè neciikalè cinyi?" lukonko lwà nombà mwibidì. "Nè cyà nshìikidilu wa buloba?" lukonko lwà nombà mwisàtù. Nwamònu anyi? Ki nkonko mishiilàngàne yìsàtù myela nyòyi ayi. Mpindyewu, mpindyewu ndi muswè nùbuululèmu bwà nùtangilè nùmonè mùdì Yesù kaaba aka ùbàmbila bwà bintu ebi.

154 Kaa, s'mbilenga byà dikèma! Ndi... Cidi cimvwija ànu... Ndi—ndi—ndi ngàngata... Mwàkù wutùvwà bakwàte naawù mudimu dilòdò adi awu wùvwa mmwàkù kaayi? [Disangisha didi dyàmba nè: "Disaluka."—Muf.] Disaluka dyà ku dibuulula's! Mònaayi.

155 Mpindyewu tùbuululàayi mpindyewu ku Cìtampì cyà Kumpàla cyà—cyà ku Bitampì byà Mukàndà ewu, nè tupalakajàayi Cìtampì cyà Kumpàla eci nè lukonko lwà kumpàla.

156 Nènku lukonko lwònsò, kulùpàlakaja lwònsò, bwà kumòna ní kabyèna byènda cyanza mu cyanza, ànu menemene mutùdì benzè mu dikàngula dyà bikwàbò byònsò ebi, to nè ku bikondo byà èkèleeziyà nè bikwàbò byònsò, ànu mùshindù wùm wèwùm wè menemene. Ke Cìtampì ncyòci aci's, cikàngùdìbwe ànu menemene, dībà adi. Mònaayaaku, mpindyewu. Mpindyewu netwikalè mwà kubala, dyàmbedi, bwà... "Pahìishe Yèyè kubàndamuna..." Nè—nè dībà adi Yèyè—Yèyè neikalè mwà kubanga kwandamuna mpindyewu, nènku tudi baswe bwà kucipàlakaja nè Bitampì.

157 Mpindyewu tàngilàayi nùmonè. Cítampì cyà Kumpàla m’Bwàkabuulwibwà 6.1 nè 2. Mpindyewu túbalààyaaku 6.1 nè 2.

Nènku—nènku ngákamòna . . . Mwànà wa mùkòòkò pàakamanàye kukàngula cìmwè cyà ku bitampì, nè ngákumvwa, byenzè bu nè cìvwa m’mutooyi wà mukungulu, cìmwè cyà ku bifukùbwà abi cyàmba nè: Lwá ùmonè.

Nè ngákamòna, nè mònaayi kàbalù katòòke: nè ewu uvwa musòmbepù uvwa nè butà bwà mikete; nè cìfulu cyà butùmbi cyàkamupèèbwa, nè wàkaya wènda ùkwàtangana ku bukòòkeshi nè bwà kukwàtangana ku bukòòkeshi.

158 Tuvwa basangàne nè mulùmyànà ewu uvwa nganyi? [Disangisha dìdì dyàmba nè: “Mufwilakanyi nè Kilistò.”—Muf.] Mufwilakanyi nè Kilistò. Maatàayi 24, mpindyewu, 4 nè 5.

Nè Yesù wàkandamuna nè kubàmbila—kubàmbila nè: Tèyaayi ntèmà bwà muntu kànùseeswishì nànsha.

Bwalu bààbùngì nebàlwe mu dìnà dyànyì, bàmba nè: Mèmè ke Kilistò; nè nebàseeswishè bààbùngì.

159 Nwacimònu anyi? Mufwilakanyi nè Kilistò. Ke Cítampì cyènù ncyòci aci. Nwamònu anyi? Nwamònu anyi? Wàkacyàmba apa; nè apa bàdì bákàngula Cítampì, nènku’s ki yèyè ewu, mpwàngàne ànu menemene.

160 Mpindyewu Cítampì Ciibìdì, Maatàayi 24.6, Bwàkabuulwibwà 6.3 nè 4. Mpindyewu tàngilàayi, Maatàai 24.6. Mpindyewu ngänji mmonèbi cidiye wàmba.

Nènku nenùmvwè bàmba bwà mvità nè manungànyì à mvità: nwènzàayi bwà nwènù kanùdìtácishì mu meeji nànsha, bwalu bintu byònsò ebi bìdì nè cyà kwenzeka, kàdì nshùkìdìlù kì mmwanjì kwikalakù to.

161 Èyo, twàngatàayi Cítampì Ciibìdì, Bwàkabuulwibwà 6.3 nè. . . Ibìdì. Tàngilàayi nùmonè cidìye wàmba mpindyewu.

Nènku pàakamanàye kukàngula cítampì ciibìdì, nènku ngákumvwa cìfukùbwà ciibìdì cyàmba nè: Lwá . . . ùmone.

Nè kwàkapàtuka kàbalù kakwàbò kàvwà kakünze; nè uvwa musòmbepù awu wàkapèshüüba bukolè bwà kuumushayè ditalala pa buloba, nè bwà bantu bààmòna mwà kushebeyangana muntu nè mukwèndè; nè wàkapèèshüüba mwelè munènè wà mvità.

162 Nè bupwàngàne bwònsò, ànu menemene’s! Kaa, mèmè’s ntu muswè bwà Mifundù yidyàndamuna Yòyi miinè. Kàdì nwènù? Nyumà Mwìmpè ngudi muYifunde yònsò, kàdì Yèyè ùdì nè bukolè bwà kuYìbuulula.

163 Mpindyewu tùmónààyi bì Cítampì Cii sàtù. Mpindyewu, eci nciyòòlè cyà nzala. Mpindyewu, Maatàayi 24.7 ne 8. Twàngatàayi 7 nè 8, mu Maatàayi.

Nè ditùnga nedìjuukè bwà kulwisha dikwàbò ditùnga, nè bukalenge bùlwisha bukalenge bukwàbò; nè nekwikalè biyòòlè byà nzala, . . . bikupi, . . . dizakala dyà buloba, mu myaba mishùlèshùlàngàne.

Bintu *byònsò ebi nebiikalè ntwàdijilu wa tunyinganyinga.*

164 Nwamònu's, nukàadi nwenda nuseemena buludi mpindyewu. Mpindyewu, Bwàkabuulwibwà, mu mwi6 amu, mpindyewu netwikalè mwà kukàngula Cítampì Cii sàtù. Cidi cisanganyii bwa mu Bwàkabuulwibwà 6.5 nè 6.

Nènku pàakamanàye kukàngula cítampì cii sàtù, mèmè—mèmè kumòna cifùkùibwà cii sàtù aci cyàmba nè: Lwà ùmonè. Nènku ngàkatàngila, nè mònaayi kàbalù kafùke; nè ewu uvwa musòmbepù uvwa nè cyamù cyà kupima naaci bujitu mu cyanza cyèndè.

Nè ngàkumvwa dīyi munkaci mwà bifùkùibwà binaayi abi dyàmba nè: Cipiminu . . . dyeyà . . . Cipiminu cyà blé ku dyeyà, nè bipiminu bisàtù byà orge ku dyeyà; kàdi kwènzèdi maanyi nè . . . mvinyò bibi to.

165 Ciyòòlè cyà nzala's! Nwamònu's, ànu menemene Cítampì cìmwècìmwè aci, cintu cìmwècìmwè cyàkambà Yesù aci's. Èyo.

166 Cítampì Cii nàyi, “bikupi” nè “lufù.” Mònaayi's, Maatàayi 24. Netùbalè mvensà wa—wa 8, wa 7 nè wa 8, ngèela meeji nè mmùdibi, pa Cítampì Cii nàyi, cìndi naaci kaaba aka eci. Èyo.

167 Mpindyewu, ncinyi cingàabadi kaaba aka eci? Ndi mubalè cintu kampànda bibi anyi? Èyowà's, ndi mufunde cyòci aci. Èyowà, ki bwalu mbwabù's. Mpindyewu netwikalè mwà kuya. Mpindyewu netùye. Èyo, mukalenge.

168 Mpindyewu túbangilàayaaku ku wa 7, pa cyòci eci, Cítampì Cii nàyi eci; nè pa 6.7 nè 8, pa cikwàbò, pa Bwàkabuulwibwà.

169 Mpindyewu twànjàayi kumòna wa 7 nè wa 8 wa Maatàayi 24 awu. Èyo, mpindyewu.

Nè ditùnga nedìjuukè bwà kulwisha dikwàbò, nè bukalenge bùlwisha bukwàbò; nè nekwikalè biyòòlè byà nzala, . . . bikupi, . . . dizakala dyà buloba, mu myaba mishùlèshùlàngàne.

Bintu *byònsò ebi nebiikalè ntwàdijilu wa tunyinganyinga.*

170 Mpindyewu Cítampì Cii nàyi, mutwàcìbalùlùlù kaaba aka amu, ciwà . . . Cítampì Cii nàyi, ciwà nkubangila ku wa 7 nè wa 8, pa cikwàbò eci mpindyewu.

Nè pààkamanàye kukàngula citampì ciinâyì, nè mōnaayi. . . cifukùbwa ciinâyì cyamba nè: Lwà ùmonè.

Nè ngàkatàngila, nè mōnaayi kàbalù kàà cisengàsengà; . . .

171 Mpindyewu indilaayi. Eci ndi mucifunde bibi. Èyowà. Èyowà. Mpindyewu anji indilaayi ànu kakesè cyanààna, mpindyewu, 7 nè 8.

172 Mpindyewu twänjäàyi kumòna, Maatàayi 24.7 nè 8. Mpindyewu twänjäàyibi kumòna. Netwàngatè aci. Aci n'Ciisâtù, cìkànguka, kì mmwòmò anyi? Maatàayi 24.7 nè 8. Mfwilaayi luse. Mpindyewu, aci cidi cìkakeba mvùla, anyi, ciyòòlè cyà nzala, cìkakeba ciyòòlè cyà nzala. Èyo.

173 Mpindyewu, “cìkupi” nè “lufù.” Èyowà's, mukalenge. Mpindyewu, ki kutùyaayà, 7 nè 8. Mpindyewu, aci ncidì cifwànyìne kwikala Cìtampì Cìinâyì. Twänjibi kumòna mwaba wutùdi tupetela Cìtampì Cìinâyì. “Nè pààkamanàye kukàngula Cìinâyì—Cìtampì Cìinâyì. . .” Èyowà, mmubàndi wa pa kàbalù kàà cisengàsengà, “Lufù,” nwamònu's.

Nè nku—nè nku ngàkatàngila, nè mōnaayi kàbalù kàà cisengàsengà; nè yèyè. . . kàbalù kàà cisengàsengà; uwwa musòmbeputu awu dîna dyèndè dîwva dibùkidiibwa nè Lufù, nè Ifèrno ùwva. . . ùmulonda. Nè bàakamupèèsha bukolè pa bitùpà. . . bînaayi byà buloba, buà kushebeyangana nè mwele wà mvità, nè nzala, nè lufù, nè nyama yà pa buloba.

174 Mpindyewu, nwamònu's, cìwva “Lufù.”

175 Mpindyewu, Cìtampì Cìitànù, Maatàayi 24.9-13. Twänjäàyibi kumòna ní ndi mwàngate eci mu cyòci, mpindyewu, cyàkàbìdi. Nwamònu anyi?

Nè dîbà adi nebànùfilè ku bilumbù bwà nwènù kutàcishùbwa, nè nebànùshebèyè (ki bwalu mbwabù's); nè nenùkinnyibwè kùdi matùnga wònsò bwà bwalu bwà dîna dyànyì. Nè pàdi. . .

Nè dîbà adi bààbùngì nebàtungilè. . . bààbùngì nebàlendwìshùbwe, nè nebàtungìlanganè muntu nè mukwèndè, nè nebàkinanganè muntu nè mukwèndè.

Nè bapròfètà bààbùngì bàà mashimi nebàjuukè, nè. . . nebàseeswishè bààbùngì.

Nè bwalu bwà bubì nebwikalè buvulàngàne, dinanaga dyà bààbùngì nedikwatè mashìka.

Kàdi ewu udi. . . wakànga mwoyi too nè ku ndekeelu awu, wa nà nku nèasungidiibwè.

176 Mpindyewu, tudi pa Cìtampì Cìitànù mpindyewu. Nè mùvwa mmakèèlèlà dilòòlò awu, nwamònu's. “Nebànùfilè ku bilumbù, nebàtungìlanganè muntu nè mukwèndè,” nè bikwàbò.

177 Mpindyewu tàngilàayi pa mwi6 apa, Cìtampì, 6.9 too nè ku 11. Mpindyewu twàngatàayi awu nànkù, Bwàkabuulwibwà 6.9 too nè ku 11.

Nè pààkamanàye kukàngula cìtampì ciitànù, ngákamòna mwìnshì mwà cyoshelu misùùkà yà aba bààkashebeyiibwà bwà dīyì dyà Nzambi, nè bwà bujaadiki bìvwàbo bashààle kacya bààkwàtakù abu;

Nè bààkela lubilà lwà dīyì dikolè, bàmba nè: Too nè ku dībà kaayi, . . . Mukalenge, wa cijila . . . mulelèlè, kùdì . . . ulumbulwisha nè usombwela bwà mashi ètù kùdì aba bàdì basòmbele pa buloba?

Mpindyewu, nè mizàbì mitòòke yàkafidiibwa kùdì yònsò wa kùdìbo; nè bààkabàmbila nè, bìvwà bikèngela bwà kwanjibò kwikisha bwà cikondo cìpì, too nè pàvwà basadidi naabò kàbìdì nè bânà bààbò, . . . bàvwà bàkèngelà kushebeyiibwà bu bwòbò abu, bìngì bwàbò kukùmbanabù.

178 Mpindyewu, nudi numòna's, mu cikondo cyà Cìtampì Ciitànù, tudi tusangana—tudi tusangana dishebeyiibwa bwà diitabuuja kaaba aka.

179 Nè mu cikondo cyà 24.9 lwà mwab'ewu, tudi . . . too nè ku 13, tudi tusangana kàbìdì nè dīvwà ndishebeyiibwa bwà diitabuuja. “Nebànùfilè ku bilumbù, nè nebànùshebèyè,” nè bikwàbò. Nwamònu's, Cìtampì cimwècimwè aci cikàngùdiibwe.

180 Mpindyewu, mu Cìtampì Ciisambòmbò, ku cyòcì ke kwìnè kutùyaayà eku mpindyewu, Maatàayi 24.29 nè 30. 24, nènku twàngatàayi 29 nè—nè 30. Mpòpò apa.

Mpindyewu, mpindyewu kàbìdì, netwikalè mwà kwangata, Bwàkabuulwibwà 6.12 too nè ku 17.

181 Ke cyòcì aci menemene citwáfumu ku dibala. Mpindyewu tèèlejàayi eci, mpindyewu, cyàkambà Yesù mu Maatàayi . . . :29, 24.29 nè 30 aci.

Dyàkàmwè paanyimà pàà dikènga dinènè dyà mu matukù awu . . .

182 Cinyì? Pàvwà . . . dikènga dinène edi, dikènga dinène dyà kànàkànà didìbo bapicilemù kaaba aka edi, nwamònu's.

. . . dībà dyà muulu nedifūikishiibwè fitùtù, nè ngondo kàakufila bukènkè bwèndè to, nè mītootò neyiponè panshì yùmuka mu dyulu, nè makolè à . . . maulu neànyukushiibwè.

Nè dībà adi cimanyinu cyà Mwànà wa muntu necimwenekè mu dyulu; nè dībà adi ke dyàdila bisàmbà byònsò byà pa buloba mwadi, nè nebàmonè Mwànà wa muntu ùlwa mu matutu à mu dyulu mwikàle nè bukòlè nè butùmbi bunène.

183 Mpindyewu, balàayi apa mu Bwàkabuulwibwà emu mpindyewu, Cítampì Cìisambòmbò aci—aci, mutùdi mpindyewu mene emu.

Nè . . . mònaayi pààkakàngulàye cìtampì cìisambòmbò, nènku, mònaayi, kwàkenzeka dizakala dinènè dyà buloba; dībà dyà muulu dyàkalwa difiike fititù bu mufuku (nwamònu anyì?) wà myòsà, nè ngondo wàkalwa bu mùdì mashi amu;

Nè mìtootò yà mu dyulu yàkapòna panshì pa buloba, bu mùdì mucì wà mfigi wìmansha tumuma twàwù twà mfigi tùdì katùyi twanjì kuboba amu, pàdiwu . . . munyùkùshùibwe kùdì cipeepèlè cìkolè.

Nè maulu àkuumuka mùtù mukàndà muvùnga pàdiwu wùvùngiibwa amu; nè mukùnà nè mukùnà wònsò nè cisanga nè cisanga cyònsò . . . byàkuumushùibwa mu mwaba wàbì.

Nè bamfùmù bàà pa buloba, nè bantu banène, nè babanji, nè tùpìteenà tunènè, nè bantu bàà bukolè, nè dìnà mupika yònsò, . . . muntu mudìshikàmìne yònsò, bààkasokoma mu meenà . . . mu mbwebwe yà mikùnà;

Nè bààkambila mikùnà nè mbwebwe ayi nè: Tùpònènaayi, nè túsokòkaayi ku mèsù kwà ewu udi musòmbe pa nkwasà wa butùmbi awu, nè ku ciiji cìkolè—ciiji cìkolè cyà Mwànà wa mùkòòkò.

Bwalu ditùkù dinènè dyà ciiji cyèndè cìkolè dyàfikì; . . . wìkala nè bukolè bwà kukàndamana nganyi's?

184 Ànu mùdìbì menemene, buulùlaayi nwaluka paanyimà apu, nùmonè cyàkambà Yesù kaaba aka mpindyewu mu Maatàayi 24.29. Tèèlejàayi. “Paanimà pàà,” bwalu bwà Eichmann ebu, nè bakwàbò.

Dyàkàmwè paanyimà pàà dikènga dinènè dyà mu matùkù awu dībà dyà muulu nedifìkishùibwè fititù, . . . ngondo kààkufila—kààkufila bukènke bwèndè to, . . . mìtootò neyìponè panshì yùmuka mu dyulu, . . . makolè à . . . maulu neànyukushùibwè.

Mpindyewu tàngilàayi.

Nènku dībà adi cimanyinu cyà Mwànà wa muntu necimwenekè mu dyulu; nènku bwòbò nebàmòne, nè bwòbò . . . nè dībà adi bisàmbà byònsò byà pa buloba nebidilè mwadi, nè nebàmònè Mwànà wa muntu ùlwa mu matutu à mu dyulu mwikàle nè bukolè bunène nè butùmbi.

Nè . . . neàtumè banjèlò bèndè, nè bikwàbò, nè bìikàle nè . . . mwadi wà mpungi, nè . . . nebàbasangishè pàmwè . . . mpeepèlè yinaayi, . . . balwangàne pàmwè.

¹⁸⁵ Nwamònu's, ànu menemene, patùdì tupàlakaja cyàkamba Yesù mu Maatàayi 24, cìdì mubuuludi kaaba aka mukàngùle mu Cìtampì Ciisambòmbò, bìdì ànu mu byòbì menemene. Nè Yesù ùvwa wàkula bwà cipungu cyà Dikènga dinène. Nwamònu anyi?

¹⁸⁶ Cyà kumpàla, wàkakonka nè ndìbà kaayi òvwa bintu ebi mwà kwenzeka, dìbà òvwa ntempèlù mwà kuumushiibwa. Yèyè wàkandamuna ku aci nànkù. Cintu cyàkalondà cyàkakonkàye, ndìbà òvwa mwà kulwa cikondo. . . Kwakàlwa cikondo cyà bafwile diitabuuja. Nè pàvwa *cikampàndà* mwà kulwa, pàvwa mufwilakanyi nè Kilistò mwà kuujuuka; nè pàvwa mufwilakanyi nè Kilistò mwà kuumusha ntempèlù.

¹⁸⁷ Danyèlè, mutùdì bafwànyine kwalukila cyànyimà nè kwangata Danyèlè kuntwaku, pàakambàye cyòci aci apu, mfùmù uvwa mwà kulwa awu. Nwènù babadi nudi bamanyè aci's. Nè cìvwa cikèngelà bwà kwenzayè ncinganyi? Ùvwa mwà kuumusha mulàmbù wà bwàcyàbwàcyà, nè byònsò bìvwa mwà kwenzeka munda mwà cyòci cikondo aci. Kwambayè. . .

¹⁸⁸ Yesù, mene, wàkula bwà bwalu abu kaaba aka, wàleelapù kashoonyi's. Wàkamba nè: "Panwàmònà cinyangu cìdì cìvwijà dibùtuka, cyàkambàbo kùdì mupròfetà Danyèlè, ciimàne mu mwaba wà cijila." Ncinyi aci? Mosquée wà Omar, mwimàne pa mwaba wà ntempèlù awu pàakamooshàbò kubùtula. Wàkamba nè: "Ewu udi ku mikùnà. . . Ewu udi pa mùsongà wà nzùbu, kàtùuluku bwà kwangata bintu bìdì mu nzùbu to, anyi ewu udi mu budimi kàalukidi nànsha. Bwalu nekwikalè cikondo cyà lutàtu!" Nudi numòna anyi? Nè bintu byònsò ebi bìvwa mwà kwenzeka, balwè naabi too nè mpìndyewu nè babìshìndike, tubyàluja ku dikàngudiibwa dyà Cìtampì Ciisambòmbò.

¹⁸⁹ Mpìndyewu ndi muswè bwà nùmonè. Yesù. . . Mpìndyewu, bwà bwalu bwà màalabà dilòòlò, pa Cyòci eci, Yesù wàkashìya ku luseke dilongesha dyà Cìtampì cyà Mwandamutakètè. Kacyèna kaaba aka nànsha. Tàngilàayi nùmonè, Yèyè ùdì ùya mutungùnùke buludì nè nsùmwinù mpìndyewu, paanyimà pàà còci aci. Nè Yone wàkashìya ku luseke Cìtampì cyà Mwandamutakètè. Cyà Mwandamutakètè, cyà ndekeelu, Cìtampì cyà Mwandamutakètè, neciikalè cintu cinène be. Kacyèna nànsha mene cifùndiibwe to, nwamònu's. Wàkashìya ku luseke Cìtampì cyà Mwandamutakètè; bwònsò bàbìdì bààkenza nànkù. Kàdi mubuuludi yèyè, pàakambà ànu Nzambi nè kùvwa. . . Yone wàkamba nè: "Kwàkenzeka ànu cinyàànyà mu Dyulu." Yesù kàakambakù mwàkù pa Cyòci aci to.

¹⁹⁰ Mònaayi mpìndyewu, tudi baalùkile ku mvensà wa 12, mònaayi's, Nyama nànsha umwe. Awu's mmvensà wa 12, tudi tubangila pa Cìtampì cyètù aci, bwà kuCimòna cikàngula. Nyama nànsha umwe, cileejilu, Bifùkùibwà bìdì nè mwoyi, kí mbileejìbwe kaaba aka to, anyi, mùvwàbì bwà Cìtampì Cìtànù. Bwà cinyi? Eci ncyenzèkéle, luseke lukwàbò lwà

cikondo cyà Èvànjeeliyò, mu cipungu cyà Dikènga dinène. Cìtampì Cìisambòmbò eci ncipungu cyà Dikènga dinène. Ke cìdì cyènzekà ncyòci aci. Mukàji-musèla ùkaadi muyè. Nwamònu anyi? Kakwèna Cifùkìibwà cìdì nè mwoyi anyi ní ncinyi nànsha cimwè bwà kucyamba nànsha. Cidi ànu. . . Mpindyewu, Nzambi kacyèna kàbìdì ùkwàta mudimu nè Èkèleeziyà nànsha; Ùkaadi muyè.

¹⁹¹ Ùdi ùkwàta mudimu nè Izalèèlà, nwamònu's. Nwamònu's, eci's nduseke lukwàbò lwàlwa, apa mpàdì Izalèèlà mupetè Mukenji wà bukalenge, wà kùdì baprófeta bàbìdì bàà Bwàkabuulwibwà 11 abu. Vùlukàayi nè, Izalèèlà nditùnga, musagidi wa Nzambi, ditùnga. Nè piikalà—piikalà—piikalà Izalèèlà mwà kubwejiibwa, neciikalè bwalu bwà—bwà ditùnga dijimà.

¹⁹² Izalèèlà, cikondo cyà bukalenge, mmwaba wùvwà Davìdì. . . Mwànà wa Davìdì, ùsòmba pa nkwasà wa butùmbi. Ke bwà cinyi mukàji awu wàkeela lubilà nè: “Wèwè Mwànà wa Davìdì!” Nè Davìdì ngwìkala nè cyà. . . Mwànà wa Davìdì's! Nzambi wàkadìcipila kùdìYe, kùdì Davìdì nè, Yèyè ùvwa mwà kjujula Mwan'Èndè uvwa mwà kwangata nkwasà wendè wa butùmbi awu's. Ùvwa mwà kwìkala nkwasà wa butùmbi wa kashidi. Nwamònu anyi? Kàvwa mwà kwìkala nè ndekeelu nànsha. Solòmò wàkacìfila, mu cifwànyikijilu, mu ntempèlù. Nè Yesù wàkabàmbila ànu kaaba aka, nè: “Kakwàkushààla dibwe òmwè pamutù pàà dikwàbò to.” Kàdì Ùdi ùteeta bwà kubàmbila kaaba aka, cìdì. . . Yèyè neàlukilè.

“NeWàlukilè dìbà kaayi?”

¹⁹³ “Bintu ebi nebyènzekè kumpalà kwà Mèmè kwalukila.” Kàdì's ke byòbì ebi!

Mpindyewu tudi ku cikondo cyà Dikènga dinène.

Vùlukàayi nè, pàatèekiibwà bukalenge abu, pa buloba. . .

¹⁹⁴ Mpindyewu, eci cìdì mwà kwìkala cyà cipapulungana ndambù. Nè lukonko lwòlò lwìkàlekù, nènku udi—udi ànu mwà kulungeela; wèwè muswè kwela lukonko, paanyimà pàà bamanè kulùbùkila, nè bàlùlengè; piikalàbì nè kùvwa, kwèna mudyànjlile kucimanya nànsha.

¹⁹⁵ Mu cikondo cyà Bukalenge bwà bidimu cinunu, ny'Izalèèlà wìkàla ditùnga, bisàmbà dikùmi nè bìbìdì abi bu ditùnga.

¹⁹⁶ Kàdì Mukàji-musèla ùdi mu nzùbu wa bukalenge. Yèyè ùdi Mukalenge-mukàji mpindyewu. Mmusèdìibwe. Nè buloba bujimà nebubwelè mu cimenga eci, Yèlusalèmà, nè nebùtwalè butùmbi bwàbù mwòmò amu. “Nè biibi kabyàkwìkala biinjila to, mèbà à—à—à butùku, bwalu kakwàkwìkala butùku nànsha.” Nwamònu anyi? Biibi nebùikalè misangu yònsò ànu byunzùlùla. “Nè bamfùmù bàà pa buloba,” Bwàkabuulwibwà. . .:22, “nebàtwalè luumù lwàbò nè butùmbi mu cimenga eci.” Kàdì

Mukàji-musèla ùdi mwómò amu pàmwè nè Mwánà wa mùkòkò. Kaa, ekèlekèle! Nudi mwà kumòna cyòci aci, mwómò amu's! Kaciyi. . . Mukàji-musèla kààkwikala pambèlu apa munkaci mwà kukwàta mudimu mukolè mu budimi bwà mvinyò nànsha. To, mukalenge. Yèyè m'Mukàji-musèla. Yèyè m'Mukalenge-mukàji bwà Mukalenge. Bakwàbò abu mbàdi bàkwàta mudimu mukolè pambèlu pàapa, ditunga adi's, kî m'Mukàji-musèla nànsha. Amen. Èyo.

¹⁹⁷ Mònaayi baamisànjeelà aba mpindyewu, baamisànjeelà bàà Bwàkabuulwibwà. . . :12 aba, bapròfetà bàbidì aba, bwòbò mbiikalà mwà kuyiisha nè: “Bukalenge bùkaadi pabwîpi!” Nwamònu anyi? Bukalenge bwà mu Dyulu bùdi nè cyà kutèkiibwa. Cikondo, bidimu bisàtù nè citùpà byà ndekeelu byà lumingu lwà makùmi mwandamutekètè lwà Danyèlè abi, bitù bilaya beena Yudà, cisàmbà cyèndè abi. Vùlukaàyaaku mpindyewu, nè, bwà kujaadika cyòci aci nè, nè eci ncitùpà cyà ndekeelu cyà lumingu lwà makùmi mwandamutekètè lwà Danyèlè alu. Ndi mupetè lukonko pa cyòci aci bwà mààlabà. Nwamònu anyi?

¹⁹⁸ Mpindyewu, mbingu makumi mwandamutekètè nyivwà milaya, mbwena kwamba nè bidimu mwandamutekètè. Nè munkaci mwà mbingu mwandamutekètè ayi, Maasiyà ùvwa nè cyà kuumushiibwa, bwà kuvwijiiibwa mulàmbù. Ùvwa mwà kwenza cipròfetà munda mwà bidimu bisàtù nè citùpà, nè pashiishe Ùvwa mwà kuumushiibwa, bwà mulàmbù bwà cisàmbà. Nè kùcidi ànu cikondo cikòsa, cyà nè bidimu bisàtù nè citùpà bicidi ànu bikòsa bwà Izalèlèlè. Pashiishe, pàakuumushiibwà Maasiyà, mwena Yudà wàkafofomijiiibwa bwà kàpeci mwà kumòna nè ùvwa m'Maasiyà to.

¹⁹⁹ Nènku, pashiishe, pàakuumushiibwà Maasiyà, dîbà adi Èvànjeeliyò nè cikondo cyà ngàsà byàkalwa kùdi bàà Bisàmbà byà bendè. Nè bààkaya nànkù, nè Nzambi wàkapàtula umwe *apa* nè *pààpa*, nè *apa* nè *pààpa*, nè wàkabàtèèka ku luseke ku bulombodi bwà baamisànjeelà; nè *apa* nè *pààpa*, nè *apa* nè *pààpa*, nè wàkabàtèèka ku luseke ku bulombodi bwà baamisànjeelà.

²⁰⁰ Ke kutùmaYè mùsànjeelà wa kumpàla, nè awu kuyiishayè, nè mpungi kudilayè; mutwàcyàngàtà, paanyimà pàà mutanci. Nènku, pashiishe, mpungi ùvwa ùmanyisha mvità. Mpungi ùtu misangu yònsò ànu ùleēja mvità. Mùsànjeelà awu, mwanjèlò ùvwa ùlwa pa buloba, mùsànjeelà wa dîbà adi awu, mùvwà wa Luther, mùvwà yònsò wà ku baamisànjeelà batùdi bambè abu. Cidiye wènza ncinyi? Ùdi ùfika; nè Citampi ciwva cikànguka, cibuuludiibwa; mpungi ùdila, mvità yìmanyishiibwa, nènku pààbò bàya. Nè pashiishe mùsànjeelà ùfwa. Ùdi ùtwa kasumbù aka citampi ùkàtèèka ku luseke; bàtèekiibu munda. Nè cipùpù cidi cidikùma pa aba bàdi baCibènge. Nwamònu anyi?

²⁰¹ Pashiishe citungunuka, pashiishe badyenza bulongolodi, bapeta bukwabò bulongolodi. Twafumu ku dicikenketa. Pashiishe, ke bwôbò aba bapâtuka nè bukwabò bukolè, nwamònu's, bukwabò bukolè, cikwabò cikondo cyà èkèleeziyà, mukwabò mudimu wà bwambi. Dìbà adi, pàdiye wenza nàнку, ke Nzambi ulwàlwa nè Wèndè mudimu wà bwambi ewu, pàdi mufwilakanyi nè Kilistò ùlwa nè wèndè yéyè awu. Nwamònu's, *mufwilakanyi* mbwena kwamba nè “mubèngàngàne nè.” Yidi yènda mitwàngàne nkundù.

²⁰² Ndi muswè bwà nùmonèku kaacintu kakesè. Ànu lwà pa dìbà menemene dyà—dyàkalwà Kaayinà pa buloba adi, Abèlè wàkalwa pa buloba. Ndi muswè bwà nùmonè nè, ànu lwà pa dìbà menemene dyà—dyàkalwà Kilistò pa buloba adi, Yudaàsà wàkalwa pa buloba. Lwà pa dìbà dyàkuumukà Kilistò pa buloba adi, Yudaàsà wàkuumuka pa buloba. Ànu lwà pa dìbà menemene dyà—dyàkapwekà Nyumà Mwimpè adi, nyumà wa mufwilakanyi nè Kilistò wàkapweka. Ànu lwà pa dìbà menemene didi Nyumà Mwimpè ùDibuulula pànwapa mu matùkù à ndekeelu edi edi, mufwilakanyi nè Kilistò ùdi ùdileeja cidìye, ùjuukila ku cidìidi cyèndè nè bikwabò. Nè ànu lwà pa dìbà menemene didi mufwilakanyi nè Kilistò ùbwela mu yéyè mwine mu kaabujimà mu-...mu cyalu; Nzambi ùdi ubwelamù Yéyè mwine mu kaabujimà bwà kucipikula cyònsò. Nwamònu's, bàdi ànu bènda, bènda ànu pàmwè. Nènku bàdi, bwònsò bàbidi, batwàngàne nkundù. Kaayinà nè Abèlè! Cikòlòlò nè nyuunyi wa nkuci, mu bwàtù! Yudaàsà nè Yesù! Nè ànu nàнку too nè ku ndekeelu, nudi ànu mwà kucyàngata's. Ànu . . .

²⁰³ Ke Moàbà nè Izàlèlèlà mbôbò aba mwaba awu, bònsò bàbidi. Moàbà kàvwa ditungà dyà bampàngaanu nànsha. To, mukalenge. Bàvwa bàlàmbula mulàmbù ànu wùmwèwùmwè wùwà Izàlèlèlà ùlàmbula awu. Bàvwa bàsambila Nzambi ànu umwèumwè awu. Menemene's. Moàbà ùvwa ùbiikidiibw-... Ùvwa umwe wa ku bânà bàà bakàji bàà Lotà wàkalààla nè tatwèndè, nè kulela mwànà. Nè mwànà awu wàkabiikidiibwa nè m'Moàbà. Nè ku yéyè nkwàkajuukilà cisà cyà Moàbà, ditungà dyà Moàbà.

Kàdi pààkamònàbo Izàlèlèlà, mwanààbò uvwa mupikùdiibwe awu, ùlwa . . .

²⁰⁴ Bàvwa biitabi bàà maalu ànu mùdìwu mafùndiibwe. Bàvwa dingumba dinène. Izàlèlèlà yéyè kàvwa nè dingumba nànsha dimwè to; ùvwa yéyè musòmbèlè ànu mu ntentà nè kwònsò kùvwàbò bàya aku. Kàdi Moàbà ùvwa nè bantu bàà myànzù mitùmbùke, bamfùmù, nè bakwabò. Nè bàvwa nè Baalàmà kuntwaku, mupròfetà wa—wa mashimi. Nè bàvwa nè byònsò ebi. Pashiishe kupwekabò kuntwaku bwà kwelabò mwakùnyààbò wa balùme mulawu uvwa mu njila mutàngile ku buloba bulaya awu, ùya mutàngile ku mulayi wèndè.

205 Nènku wàkaya kubàkonka nè: “Ndikù mwà kupicila mu buloba bwènù anyì? Ngombe yàànyì yôyi minwè màyi, mémè nêngàfutè. Yôyi midyè mashìnda, netuàfùtè.”

206 Awu kwamba nè: “To. Kanwàkwenzelakù ditàbuluja dyà mùshindù awu mwaba ewu nànsha. Aci’s ncyà bushùwà. Kanwàkwenzakù cintu nànsha cìmwè cyà mùshindù awu mwaba ewu to.”

207 Nè pashìishe tàngilàayi nùmonè cyàkenzàye. Wàkaalukila buludi mu mmwènekèlu wa Izàbèlà, nè wàkalwila mu mupròfetà wa mashimi awu, nè wàkafikisha bânà bàà Nzambì abu ku dyenza cilèma. Nè wàkabweja bakàji bàà beena Moàbà mu—mu dibàkà nè Izàlèlèlà, nè kwenzèjaye masandi.

208 Nè yèyè mmwenzè cintu cìmwècìmwè aci, mu cikondo cìmwècìmwè aci, mu lwendu, mu njila batàngile ku Buloba bulaya, mutùdi emu. Cidiye mwenzè ncinyi? Mupròfetà wa mashimi awu mmulwè buludi nè mwenzèje dibàkà, nè mubiikile bwà kubwela mu èkèleeziyà wa Mishònyì, nè mujuudije màngumba, ànu menemene cyàkenzàbo kale wàwa aci’s.

209 Kàdi Izàlèlèlà mukèsè wa kale mukwàte nè byà luse awu wàkatungunuka, ànu bu nè kakùvwa bwalu. Wàkadyàbakeena mu cipèèlà ntàntà mule, nè byàkakèngela bwà balwanganyi bàà kale bwònsò abu kufwàbo balondàngàne, kàdi wàkatungunuka too nè mwàkabwelàye mu buloba bulaya. Èyowà. Èyowà’s. Tàngilàayi mùvwàbo bwònsò bambùle byà mvità, kumpàla menemene nè kusabukabò Yadènè. Kaa-kaaa! Mémè ntu munangè aci nànkù. Mpindyewu tukàadi tupweka batàngile ku cyòci cikondo aci mpindyewu mene, kaaba aka mpindyewu. Mònaayi.

210 Mpindyewu tudi tusangana nè cikondo mùngàmbi’s, bidimu byà ndekeelu bisàtù nè citùpà byà mbingu makùmi mwandamutekètè byà Danyèlè. . .

211 Ngánjì ngùmviwìjèku aci ndambù menemene mpindyewu, bwalu ndi mmòna muntu kampànda kaaba aka uvwa misangu yònsò ànu mutàbàlèlèle cyòci aci, nènku ndi—ndi nteetakù bwà kutòokèsha cìndi ngàmba aci; mulongeshi kampànda.

212 Mònaayi pàakabangà mbingu makùmi mwandamutekètè ayi. Pàakamònà Danyèlè cikèènà-kumònà cyà cikondo cìcìvwà cìlwa aci, nè ndekeelu wa beena Yudà, kàdi wàkamba nè kùvwa mbingu makùmi mwandamutekètè mikòsa. Abi’s mbidimu mwandamutekètè; munkaci mwàbì, mòna’s, Maasiyà ùvwa nè cyà kulwa, anyì, ùvwa mwà kuumushiibwa, bwà mulàmbù. Mpindyewu, ki cyàkenzeka menemene aci’s.

213 Pashìishe, Nzambì wàkakwàta mudimu nè bàà Bisàmbà byà bendè too nè mwàkapàtulàbo cisàmbà bwà Dìnà Dyèndè. Pàdi ànu Èkèleeziyà wa bàà Bisàmbà byà bendè wàngaciibwa, kwambùla Yè Èkèleeziyà.

214 Nè pààkenzàYe aci, virgò mukùtākàne awu, èkèleeziyà yêyè mwinè. . . Mukàji-musèla wàkabànda. Nè èkèleeziyà yêyè mwinè wàkeedibwa mu “mìdimà yà pambèlu, mùdì myadi, nè ditwà dyà mikèmu, nè kusùmakaja kwà ménù.” Mu cyòci cikondo cimwècimwè aci, Dikènga dinène didi didikùma pa cisàmbà aci.

215 Nè pàcidì Dikènga dinène didikùma apu, mwómò amu bapròfetà bàbìdì bàà Bwàkabuulwibwà 11 bàdì bàlwa, bwà kubàyiisha Èvànjeeliyò. Nè bwòbò bàdì bàyiisha munda mwà matùkù cinunu, lukàmà. . . nè makùmi àsambòmbò. Nwamònu anyi? Èè, aci’s mmu cyòci menemene, nè matùkù makùmi àsàtù ku ngondo mùdìbi mu kabala-matùkù kalelèlà, bìdì menemene ànu bidimu bisàtù nè citùpà. Aci ke citùpà cyà makùmi mwandamutekètè cyà Danyèlè, citùpà cyà ndekeelu cyà lumingu lwà makùmi mwandamutekètè. Nwamònu anyi?

Nzambì kí mmukwàte mudimu nè Izalèèlà mwómò emu nànsha. To, mukalenge.

216 Mwanèètù wa balùme kampàndà ùvwa munkonkè, àbìdì àdì panshì aa, wàmba nè: “Bivwa bìkèngela bwà mèmè kuya ku. . .” Mwanèètù wa—wa mu èkèleeziyà emu, mwanèètù wa musinga mukolè, munanga, kwambayè nè: “Ndi—ndi muswè kuya ku Izalèèlà. Ngèèla meeji nè kùdì ditàbuluja.”

217 Muntu kampàndà ùvwa mungambìle nè: “Mwanèètù Branham, bivwa bìkèngela bwà wèwè kuya ku Izalèèlà ànu patùdì twakulangana apa. Mbafwànyine kucimòna.” Nwamònu’s, kwèna mwà kucyènza nànsha.

Ngàkiimana kuntu kwàka, nè mèmè kudyàmbidila. . .

218 Beena Yudà abu kwambabò nè: “Bu mèmè mwà. . .Èè, piikalàbì nè eci ncyòci, byòbì nè Yesù ke—ke Massiyà,” yêyè kwamba nè, “mMumònèbì wènta cimanyinu cyà mupròfetà. Netwitabuujè bapròfetà bèètù, bwalu mbimanya nè cyòci aci ke cidìbo—cidìbo nè cyà kwikala.”

219 “Cintu kaayi cilongolola’s wè,” mungààkadyàmbidilà. “S’ki mèmè ùyaayà ewu!” Pàngààkafikà mwaba awu mene, ànu pabwìpè mene naaci, ànu. . .Mvwa, èè, mvwa nsanganyibwa mu Caire. Nè mvwa nè tìkì wanyì mu cyanza, bwà kuya ku Izalèèlà. Ki mèmè kwamba nè: “Mèmè, nényè, nkamònè ní bàdì bàlòmba cyòci aci, ní bàdì mwà kumòna cimanyinu cyà mupròfetà. Netùmonè ní bàdì bìitaba Kilistò.”

220 Lewi Pethrus, wa mu èkèleeziyà wa mu Stockholm, wàkabàtùmina Bibles mùliyò mujimà.

221 Nè beena Yudà abu munkaci mwà kwalukila muntwamu’s! Nutu bamòne mukàbà wà bindidimbì awu. Ndi naaci pa mukàbà, ànu paanyimà apa mpindyewu: *Dìbà Mundankùlù Kushààle Tusunsà Tùsàtù*. Nènku beena Yudà abu munkaci mwà kwalukila, bàfùmina pa buloba bujimà, ku myaba yònsò, mbabangè kudisangisha muntwamu.

222 Paanyimà pàà Anglettere mumanè kuyamù, mu cikondo cyà Kalààlà kàà màsàlaayi Allenby, mu *Diimana Dyà Mvità Yà Buloba Bujimà*, mu mupimbu mwibîdi, ngèèla meeji nè mmwômò, nènku bààkadifila, ba-Turcs abu bààkadifila, pashiishe yèyè kucyàlujila Izàlèèlà. Nènku ke kwendaye ùvulangana bu ditùnga eku, nè patùdi twakulangana apa ùkaadi ditùnga pa dyôci: nè mfrangà yèndè sungasunga, lupetu, dibèndelà, cilwilu, nè bikwàbò byònsò. Nwamònu anyi?

223 Nènku beena Yudà aba, biikàle bààlukila mu buloba bwàbò, bàvwa. . . Cyà kumpàla, pàakayàbo mu Iran, nè bamanè kupweka mwòma amu, bwà bwòbò kubàngata, bààkakonka nè. . . Bàakamba. . . yèyè kwamba. . . Bàvwa baswè kubàaluja mu Izàlèèlà, bwà kubàpèèshabò mwaba wàbò; bwà kubàaluja mu buloba bwàbò, Pàlèstinà, mùdibi bimanya nè mmùdibo nè cyà kwikala amu.

224 Nènku, vùlukàayi nè, pàcidi ànu Izàlèèlà pambèlù pàà buloba abu apu, yèyè ùdi pambèlù pàà diswa dyà Nzambì; mùvwà Abraham, uvwabù bupèeshiibwe awu. Nènku pàdi. . .

225 Kabàvwa baswè kubànda mu ndèkè amu to. Kacya kabàvwaku banji kumòna cintu cyà mùshindù awu nànsha. Kwàkalwa laabi mukùlakàji mwaba awu, kwambayè nè: “Mupròfeta wetù wàkatwàmbila, nè, pàvwa Izàlèèlà mwà kwalukila kwàbò, cìvwa mwà kwikala ‘pa mapwapwà à nyuunyi wa mukankù,’” mu ndèkè, mùshindù wà dyalukila dyà kwàbò.

226 S’ki yèyè awu patùdi twakulangana apa, wènda wibaka’s. Muci wà mfigi wènda ùdyàlujulula! Amen! Dibèndelà dyà kale dyà Davidi dyà mùtootò wa matumba àsambòmbò adi diikàle dipeepa’s!

227 “Matùkù à bàà Bisàmbà byà bendè mmabala ku minu, mùle tètè nè bikwàcishi byà bwòwà!” Dikènga dinène ànu pabwipi’s!

228 Nè mwimàne mwaba awu, eku Bitampì bikàngula, Èkèleeziyà Pèndè pabwipi nè dibùuka bwà kuya mu mpeepèlè!

229 Nènku Dikènga dinène didi dibanga, dîbà adi Nzambì ùpweka ùmusha mwômò amu binunu lukàmà nè makùmi ànaayi nè binaayi. Amen! Mònaayi’s, kaa, s’mbipwàngane’s! S’nudi numòna mwaba wùdi Bitampì bicipàtùla mpindyewu, nwamònu’s, bicikàngula anyi? Mpindyewu, ebi mbidimu bisàtù nè citùpà byà ndekeelu bipèèsha cisàmbà. Kàbìdi, bu nwènù mwà kumòna, ke cikondo cìikalà Nzambì mwà kubìikila beena Yudà binunu lukàmà nè makùmi ànaayi nè binaayi abu ncyôci aci, mu bidimu bisàtù nè citùpà ebi.

230 Nwamònu’s, Yèyè kí mmukwàte naabò mudimu to, nànsha kakesè. Kî mbapètè mupròfeta to. Bwòbò kí mbaswè kwitabuuja cingà cintu nànsha cìmwè to ànu mupròfeta. Kwèna mwà kubàkùtakajakù to. Pa nànku, bòbò nebiikalè mwà kutèeleja mupròfeta, èyowà’s, mukalenge, nè ki cyònsò cidiku ncyôci

aci. Aci, Nzambi ùtu mubãmbileci ku cibangidilu, nè bôbô mbashãale kacya bààkwatakù.

²³¹ Wàkamba nè: “Mukalenge Nzambi webè neàjuulè Mupròfeta munkaci mwènù, bu mémè.” Mòsà ngwákamba cyôci aci awu. Nè wàkamba nè: “Yéyè awu ke unwâtèèlejà. Nè ewu yônsò wadidìnga kubènga kutèèleja Mupròfeta awu awu, neùmushiibwè mu cisàmbà.” Ncya bushùwà.

²³² Nènku, nudi numòna’s, byàkakèngela bwà mèsù àbò kwikalawù mafofomija, bwà cyanààna bàvwa bafwányine kwikala baMujingùlùle. Pamutù pàà cyôci aci, biikàle bafofomija, bàvwa... Aci cyàkapèèsha Sàtaanà mùshindù wà kubàpeta, nè kufikabò ku dyamba nè: “Yéyè mmwena lubùkù, m’Beelèzèbùlà. Mashi èndè ikalè pambidi pèètù. Tudi bamanyè nè kèna nè bwà nsongo to.” Nwamònu anyi?

²³³ Nènku bantu bàvwa bakwàte nè byà luse abu bààkafofomijiibwa. Ke bwà cinyi kasùmbù kàà Eichmann nè kasùmbù kwònsò aku kààkashebeyiibwa musangu awu. Bàvwa nè bukenji bwà kwalukila; byàkakèngediibwa bwà Tatwàbò sungasunga àbàfofòmijè mèsù bwà Wàmònakù mwà kutwàngata twètù.

²³⁴ Aci’s ke cintu cyà citàmbe kwikala cyà cyènza luse mu Mifundu, bu nànkù’s. Anjì elàngànaayibi meeji pa bwalu abu, beena Yudà, bàlòmba Mashi à Tatwàbò sungasunga, Nzambi wabò sungasunga mukùdika kwàka, ùmata mashi. Tàngilàayi: “Bwòbò bààkaMupoopela pa nkùrusè mwaba awu,” mùdi Bible mwambè. Ke yinaayi yà ku myàkù yà mitàmbe bunène nyòyi ayi. Tàngilàayi’s. “Mwaba awu,” Yèlusàlèrà, cimenga cyà citàmbe kwikala cyà cijila pa buloba. “Bòbò,” bantu bàà batàmbe kwikala bàà cijila pa buloba. “Mupoopèdìbwè pa nkùrusè,” lufù lwà lutàmbe kwikala lwà cikisu pa buloba. “Yéyè,” Muntu wa mutàmbe kwikala wa mushinga pa buloba. Nwamònu anyi? Bwà cinyi? Batèndeledi, ntèndeleeleu wa mutàmbe kwikala munène pa buloba, ntèndeleeleu umwèpelè mulelèlà pa buloba, bàvwa biimàne mwaba awu, munkaci mwà kupoopela pa nkùrusè Nzambi mwìnè uvwa Bible wabò mwambè nè nguvwa mwà kulwa awu.

²³⁵ Kabààkacimòna bwà cinyi? Bible ùdi ùtwàmbila nè Nzambi ùvwa mubàfofòmijè bwà kabàcimònu to. Bwòbò... Yéyè wàkamba nè: “Nganyi wa kunùdi aku udikù mwà kuMbanda bwà mpèkaatù?” Mu ngaakwilù mukwàbò nè: “Pangìikalà Nciyi mwenzè ànu menemene cidi cidyanjila kwamba nè Mwawa mwà kwenza to, dībà adi nùNgambilaayi.” *Mpèkaatù* mbwena kwamba nè “bupidyà.” Yéyè wàkenza ànu menemene cìvwà Nzambi muMwambile, kàdi bwòbò kabàvwa mwà kucimòna to.

²³⁶ Mpindyewu paùdi wakula nè bantu, bìdi ànu bu kupòngolola kwà màyi pa masala à mpaatu. Nudi nuumvwa cìndi njinga kwamba aci anyi? Ncintu cyà cyènza luse’s, panùdi

numòna ditunga edi nè bantu, mùshindù wùdìbo bènza maalu, batàmbe kuumakana nè ntèdeleelu! Kàdi Nyumà Mwímpè kèna ùtwàmbilakù cyôci aci anyi? “Nebiikalè bapapè mitù, badibàndishe, banangi bàà bisànkasanka kutàmbe kwikala banangi bàà Nzambi, bashipi bàà bipungidi, bashiminyinyanganyi bàà maalu, kabàyi nè kudikànda, badyòmbodi bàà aba bàdi bímpè. Mbafwànyine kwikala nè cimwènekelu cyà difwàna dyà Nzambi, kàdi bafwànyine kuvila Bukolè bwà Èvànjeeliyò.” Mmwàmbè nè: “Bàà nàнку awu abu, tàpulukà naabò.”

²³⁷ S’ki twètù aba’s, màngumba aa àCikònyangaja. Bàdi bàngata butùmbi nè Bukolè bwònsò, bàByàluja paanyimà ku cìkondo cyà bàpostòlò, nè bikwàbò byàCì mu Bukalenge bwà bidimu cinunu mwàmwa. Bidi ànu mùdi muntu, mùmvwà mwambè kumpàla amu; muntu ùtu misangu yònsò ùpèèsha Nzambi butùmbi bwà citùYe mwenzè, ùtàngila kumpàla ku cyènzàYe, kàdi mwikalè ùlèngulula cidiYe munkaci mwà kwenza mpindyewu. Aci’s mmu cyôci menemene. Muntu ùtu ànu cintu cimwècimwè aci.

²³⁸ Ki beena Yudà abu biimàne mwaba awu, bàmba nè: “Butùmbi kùdi Nzambi! Mòna’s,” mu nshapità mwif wa Yone Munsantu, bàmba nè, “baataatù bèètù’s bàakadyà manà mu cipèèlà!”

Ki Yesù kwamba nè: “Bwònsò, muntu nè muntù, s’mbafwè.”

²³⁹ “Bààkanwà màyi ku Lubwebwe mu cipèèlà amu, nè bikwàbò byònsò.”

²⁴⁰ KwambaYè nè: “Mémè’s ke lwòlò Lubwebwe alu.” Ncyà bushùwà’s. Amen. KwambaYè nè: “Kàdi Mémè ndi Dyàmpà dyà Mwoyi didi difùme mu Dyulu kùdi Nzambi, Muci wà Mwoyi wùdi mufùme mu Edènà mwàmwa awu. Muntu yèyè mudyè Dyàmpà edi, kàakufwàku to; Mémè nèmmbiishè ku lufù ku matùkù à ndekeelu.” Kàdi kabàvwa ànu mwà kucimòna to! Ncyà bushùwà.

²⁴¹ Maasiyà mwinè mwimàne mwaba awu, mwikalè wàkula mèyi mene à mu mwoyi yàbò, nè bintu byà mùshindù awu, ùleeja mùvwàYe Maasiyà, ànu menemene civwà Maasiyà nè cyà kwenza’s!

²⁴² Nè bwòbò biimàne mwaba awu nè byanza byela paanyimà, nè: “Huh! Kacyèna mwà kwenzekakù to. To, to. Yèyè—yèyè—yèyè kàvwa mulwìlè mu njila wa cyà bushùwà to. Nwamònu’s, yèyè mmupàtùkile mu Betèlèhèma. Nè yèyè—yèyè kèna cingà cintu to ànu mwànà mulela mu masandì. Nè awu ndyabùlù udi ukwàcila mudimu mu yèyè. Twètù tudi—tudi bamanyè nè yèyè ùdi nè mukupa. Mmupalè. Ùdi nè démon.” Nwamònu anyi? Mu bushùwà bwà bwalu mèsù àbò àvwa mafofomija ku cyôci aci.

243 Mpindyewu, kàdi mbindile mupròfetà wabò awu. Nènku nebìikalè mwà kucipeta, nebìikalè mwà kubàpeta bàbìdì bajimà. Ncyà bushùwà.

244 Mpindyewu mōnaayi's, cyàkàbìdì, mpindyewu, kàbìdì, pìikalà beena Yudà aba...Nènnùpèèshè kakwàbò kaacimfwànyì kakesè, bwà nwamōna mwà kumanya nè mbeena Yudà bàdì kaaba aka abu mpindyewu, dyàmùnù dyà Dyambwibwa. Tàngilàayi nùmonè cidì cyènzekà. Ncileejùbwe kàbìdì mu cimfwànyì...Katwàkwangata dībà bwà kucyènza nànsha, bwalu netùpangilè—netùpangilè dībà mwab'ewu. Kàbìdì ncileejùbwe mu cimfwànyì mu...mu cidì cìbìkìdìbwà nè "Lutàtù lwà Yakòbò." Mpindyewu tàngilàayi. Beene Yudà aba kaaba aka bàdì nè...Mōnaayi. Kaa, cidì...

245 Nè—nè—nèngìikalè mwà kwangata ànu katanci kakesè cyanààna kàà dībà kaaba aka, nwamōnu's. Bìdì bimbìndulula pāndì mbanga kutùpika bintu mùshindù awu. Nènku...Nwamōnu anyì? Mōnaayi. Ndi muswè bwà nwènù kucimōna. Nènku ndi—ndi—ndi ànu...Èè, Nzambì ngwanùleejacì's, ndi mutwìshùbwe nànu awu. Tàngilàayi.

246 Yakòbò ùvwa nè bwanaàabutè. Mmwômò anyì? Kàdi ncyà bushùwà nè yèyè ùvwa naabù mwikàle mwenji wa maalu makònyàngàle ndambù. Nwamōnu ayì? Wàkaya nè wàkadingakaja tatwèndè. Wàkadingakaja mwanààbò wa balùme. Wàkenza bintu byònsò. Kàdi, nànsha nànu, bwà bilondeshìle mikenji, nè mùvwàbì byènzeka, yèyè nguvwa naabù, bwalu Esawù ùvwa mubùpànyishe. Kàdi pashìishe pàakayàye kuntu kwàka bwà kukwàcila tatwèndè—mwenu mudimu, wàkeela bitùpà byà micì yà cilombàlombà abi mu màyì, bwà kufikisha ngombe yìvwà miimite mafù nè bikwàbò abi ku dilela twànà twà makejimizeji. Nènku, kaa, nwènù's nudi bamanyè byònsò byàkenzàye mùshdinù awu, ànu bwà—bwà kupeta mfrangà. Mpindyewu tàngilàayi, mpindyewu. Yèyè ùvwa mwipata mu bàà kwàbò.

247 Mpindyewu, ncifwànyikijilu cyà mwena Yudà mpindyewu's. Yèyè mmubàkudi wa mfrangà. Mwònsò mwàyìpetelàye amu, ncyèndè nkuyipeta. Yèyè neàkuuvùla cisèbà pèèbè nè mwoyi, bwà kuyipeta. Mpindyewu, aci's nudi bamanyè. Nkenji kàà maalu makònyàngàle, ki cyònsò cidìku. Balùmyànà, kwènjikù nendè bungèndààmùshìngà to; yèyè's—yèyè's neàkudimùnè, mulùmyànà. Èyowà's, mukalenge. Bwà cinyi? Bùdiye naabù mbwà kwikala nànu. Nyumà wa mùshindù awu ke udi umukòokèsha.

248 Ànu menemene mùvwà balongolodi abu, kabàvwa mwà kuumvwa Dìyì edì to, bwalu ùvwa n'nyumà wa muntu uvwa mubàtùmina awu.

249 Cikondo cyà mukankù ncìdì cipeta Dìyì nè dibuulula. Bwònsò bàdì bùmvwà aci, elàayi byanza muulu, bwà mèmè...

Mbîmpè. Mbilenga. Nwamònu anyi? Mpimpè. Mpindyewu, mònaayi, bu nwènù mwà kwalukila kaaba aka mu Bitampì ebi, bu Byòbì ànu mwà kwikala . . . PàdìBi bìkàngudìibwe, nudi mwà kumòna ànu menemene cìdì Nzambì munkaci mwà kwenza, cìdìYe mwenzè, cìikalàYe mwà kwenza. S'ki cyòci eci, ànu menemene.

²⁵⁰ Ke bwà cinyi bantu bààkenza maalu mùshindù awu, bwalu's n'nyumà udi mudyànjila kwamba bwà cyòci cikondò aci, bwà kwikalayè pambidi pààbò. Kabàvwa nè cingà cintu nànsha cìmwè civwàbo mwà kwenza to.

²⁵¹ Ndi ngèèla meeji bwà Yone, Pòlò, nè bakwàbò, nyumà wa ntambwe awu musangu awu, n-t-a-m-b-w-e mwimane mwaba awu, Dìyì Dyòdì diine.

²⁵² Pòlò wàkiimana ànu mene nè Dìyì adi, è kwambayè nè: “Ndi mumanyè eci nè, nekwikalè bàna bèètù bàà mashimi munkaci mwènù, bàya eku nè eku. Nè cyènzàbo, màngumba nè bikwàbò byònsò, munkaci mwènù, nè byènzàbo. Nè necitungunukè too nè ku matùkù à ndekeelu, nè cikondo cyà cyènza nè bwòwà.” Bwà cinyi? Ùvwa mupròfetà. Ke Dìyì adi diimàne òvwà munda mwèndè. Mùshindù mwinè wùvwàci mwà kuya kwobeka's, kule menemene kwàka; yèyè kwamba nè: “Bantu bàà mashimi munkaci mwènù nebàjuukè, nè bààkula maalu, nè nebàpambule bàna bèètù bàdì bayiidi bààbò.” S'ki mufwilakanyi nè Kilistò menemene nyèyè awu. Cyàkenza ànu cyòci aci menemene.

²⁵³ Mònaayi nè paanyimà bààkabwela mu cikondo cyà mîdimà cyà dikènga dinène aci. Cìvwa ncinyi? Kakùvwa cikwàbò cìvwàbo mwà kwenza nànsha cìmwè to. Loomò nguvwa mu byanza nè . . . Ùvwa nè bukolè bwà ntèndeleelelu, nè ùvwa nè bukolè bwà maalu à cidìidì. Kakùvwa cìvwàbo mwà kwenza nànsha cìmwè to, kàdì ànu kukwàta mudimu mukolè bwà kushàalabò nè mwoyi, nè kudifila bwòbò biinè bu mulàmbù. Cìvwa n'ngombe. Ke cyònsò cìvwàbo mwà kwenza's. Nyumà wa mùshindù awu nguvwabò nendè, Nyumà wa Nzambi, ngombe awu.

²⁵⁴ Pashìishe, ke balongolodi bààkalwà abu, mutù wà muntu, badìmùke, biikàle nè lugènyi; Martin Luther, John Wesley, nè bakwàbò abu, Calvin, Finney, Knox, bakwàbò bàà kùdìbo abu. Ki bwòbò bààkalwà aba, nè, pààkalwàbo, bàvwa balongolodi. Bàkalwa, biikàle bàlongolola, bàpàtula bantu.

²⁵⁵ Kàdì kukùdimukabò buludì, ànu menemene mwàkenzàbo kale wàwa amu, nè kwalukilabò cyàkàbìdì buludì mu yèyè awu ku dibàkà, pa ndongolwelu wabò wa cyena-màngumba awu, ànu mu cyòci menemene. Ke cìdì Bible mwàmbè. Yèyè ùvwa “mukàjì wa masandì,” nè pashìishe kulelayè “bandumbà,” bàna bèndè bàà bakàjì, ànu mu cyòci menemene.

²⁵⁶ Nè Nzambi mmwàmbè nè: “Ndi—Ndi mumupèshe cipòòlò bwà yèyè kunyingalala, kàdì kî mmuningalàle to. Pa nànkù

Némmwangàtè nè yèyè nè bânà bèndè abu, mbímànshè ànu kwàka mu mwaba wùdì mubàkùmbànyine awu.” Aci’s mmwómò menemene. Mpindyewu, aci, Nzambì ngudi mucyãmbè, mu cyôci eci, nwamònu’s, mu Cítampì. Mpindyewu, s’nyèyè uvwa mwaba awu awu. Tudi tusangana nè Yèyè ngudi wenza cyôci aci, nè Yèyè ngwacyenza. Nè bwôbò bàdi, yònsò wa kùdìbo, bàyaaya batàngile kwòkò aku.

²⁵⁷ Kàdi, bwà aba bwònsò bàdi nè ménà mu Mukàndà wà Mwoyi abu, Nzambì neàbàbiikilè. Bwôbò abu mbààCyũmvwà. “Mikòòkò Yànyì yìdì yũmvwa Dìyì dyà mukana Mwànyì,” mwàkambà Yesù. Cintu cimwèpelè cidì cikèngelà bwà twètù kwenza nkwenza kwà dibìikila dyà mikòòkò. Mbùji yôyi kí mmiCimanyè to. Mònaayi’s. Kàdi, nudi numòna’s, dibìikila dyà mikòòkò adi: “Mikòòkò Yànyì yìdì yũmvwa Dìyì dyà mukana Mwànyì.” Bwà cinyi? Dìyì dyà mukana ncinyi? Ndi muswè kunwàmbila cidì Dìyì dyà mukana. Dìyì dyà mukana dìdì—dìdì cimanyinu cyà mu nyumà.

²⁵⁸ Yèyè wàkambila Mòsà nè: “Bwôbò kabàyi batèèlèje Dìyì dyà mukana dyà cimanyinu cyà kumpàla to, nebàteelejè Dìyì dyà mukana dyà cimanyinu ciibìdì.”

²⁵⁹ “Mikòòkò Yànyì yìdì yũmvwa Dìyì dyà mukana Mwànyì.” Pàdìbi bimanya nè bintu ebi bìdì nè cyà kwenzeka mu matùkù à ndekeelu, mikòòkò yà Nzambì yìdì yìjingulula Cyôci aci. Èyowà’s, mukalenge. Nwamònu anyi? Bwôbò—bwôbò bàdi bàCijingulula. “Mikòòkò Yànyì mmiMmanyè.” Nwamònu anyi? “Kayàkulonda muntu mwenyi to.” Kayèèna yilonda beenyi abu nànsha. Bikèngela ciikalè cimanyinu cishindika cyà ditùkù, nè yôyi yìdì yìCimòna. Mpindyewu, mpindyewu mònaayi.

²⁶⁰ Mpindyewu, Yakòbò, pàvwàye wènda ùlwa apu mpindyewu, katanci aka, kupetayè dìjinga nè mwoyi mujimà dyà kwalukila (penyi?) ku buloba bwàbò.

²⁶¹ Kaa, s’ke cyôci aci menemene cyàkenzà Izàlèlèlà! Ke—ke. . . Ke Izàlèlèlà nyawù. Yakòbò nyèyè Izàlèlèlà. Bàwva ànu bashintùlùlè dìnà dyèndè cyanàànà, nudi bamanyè’s. Nwamònu anyi? Nènku èyè ùdì. . .

²⁶² Yèyè wàkuumuka kuntwaku, nè wàkangata mfrangà yònsò yivwàye mupetè, nè yivwàye mwà kupeta ayi, nè yèyè wàkayipeta mu mùshindù wònsò wùvwàye mwà kupeta awu, ùyipetela ku bilongo byèndè anyi ní nkùdì nganyi mukwàbò yònsò nàka. Pa nàнку, mwikàle wibila, wiba, ùshima, mùshindù wònsò wùvwàye mwà kuyipetela awu. Nwamònu anyi? Ke mwàkenzàye.

²⁶³ Nè pashìishe pàkaavwàye wàsa lwendu lwà kwalukila kwàbò, ùvwa nè cyà kwikala mupetè majìyà munda mwà mwoyi wèndè. Kàdi pààkaasàye lwendu lwà dyalukila, mu njila wa dyalukila amu, kutwilanganayè nè Nzambì, dìbà adi dìnà dyèndè kushintuludiibwadi. Nwamònu anyi? Kàdi, mu cyôci cikondo

eci, ùvwa nè meeji àlubakana bikolè, bwalu ùvwa ùciina Esawù ùvwa wènda umukèba awu's. Nwamònu anyi?

264 Nènku—nènku tàngilàayi, tàngilàayi mfrangà ayi, dyumvwangana pa mfrangà adi. Ànu mwikalà beena Yudà mwà kwenza cipungidi eci nè—nè Loomò, nwamònu's, mu dyumvwangana pa mfrangà adi. Cimònaayi's. Esawù kàvwa dijinga nè mfrangà yèndè ayi to; nànsha Loomò kèna naadi to. Yèyè ngudi nè mabanji à pa buloba mu cyanza cyèndè. Nwamònu anyi? Kàdi kabyàkakùmbana to.

265 Kàdi tudi mpindyewu tusangana nè, Izalèèlà, mu cikondo cyà lutàtu aci, pàcivwàye Yakòbò apu, wàkalwangana mvità yà bibulà nè. . . wàkapyà Cintu kampànda civwà cyà bushùwà. Kwàkatùùluka Muntu kampànda mwaba awu. Yakòbò wàkaMwela kàpa, nè wàkashààla mwaba awu. Nènku—nènku—nènku Muntu wàkamba nè: “Ndi nè cyà kuya mpindyewu. Kwìsù nyawù kùkaadi kùtòòka.” Kaa, kabundubundu aku's wè! Nwamòmu anyi? Bufùkù bùkaavwa bwàmba kucyà.

266 Kàdi Yakòbò kwambayè nè: “Mèmè—mèmè ncyàkuKulekelakù to. Wèwè, Wèwè kwèna mwà kuyakù to. Mèmè nèngiikalè ànu mwà kushààla Nebè.” Nwamònu anyi? “Ndi muswè bwà maalu àshintulukè kaaba aka.”

267 Ke binunu lukàmà nè makùmi ànaayi nè binaayi abi mbyòbi abi, musùmbà wà beena màyelè à dipeta mfrangà, nè bintu byà mùshindù awu abi abu, pàmònàbo cintu cilelèlà, cishùwashùwàlè cyà kushààlabò kacya bààpya's. Ke Mòsà udi mwimàne pààpa wàwa, ke Eliyà udi mwimàne pààpa wàwa. Amen! Nebàlwanganè mvità yà bibulà nè Nzambì too nè mwikalà binunu lukàmà nè makùmi ànaayi nè binaayi bàà bisàmbà byà Izalèèlà abu mwà kubìikidiibwa bwà kupàtukabò mwómò amu.

268 Aci's mpabwìpi menemene nè cipungu cyà Dikènga dinène aci, nwamònu's, (Kaa, bilenga kaayìpu's wè!) kàbìdì, “lutàtù lwà Yakòbò.”

269 Apa ke pàdì binunu lukàmà nè makùmi ànaayi nè binaayi bìbìikidiibwa bwà kupàtuka. Bòbò, bà—bàyiishi abu, baprófetà bàbìdì abu, bàdì bàyiisha bu Yone Mubàtìiji. “Bukalenge bwà mu Dyulu bùkaadi pabwìpi. Nyingàlàlaayi, nwènu Izalèèlà!” Kunyingalala ku cinyi? “Nyingàlàlaayi ku mpèkaatù yènu, bupidyà bwènu, nè kùdimukàayi nwàlukilè kùdì Nzambì!”

270 Mpindyewu tùvulukààyaaku cintu kampànda kaaba aka. Bintu binènè bìdì byènzekà ebi, byènzekela bufùki, bikaadikù byènzèke kumpàla. Mu mvensà wa 12 ewu kaaba aka, nwamònu's nè: “Dìbà dyà muulu dyàkalwa difiike fitùtù mùdì mufuku wà myòsà.” Mpindyewu pàlakajààyaaku nè cyòci eci.

271 Mpindyewu, vùlukàayi nè, aci kaciyèna cyènzeka mu bàà Bisàmbà byà bendè nànsha. Ny'Izalèèlà. Lekèlaayi nnùleejè. Mpindyewu, vùlukàayi nè, ngàmì nè, ndibìikidiibwa dyà

binunu lukàmà nè makùmi ànaayi nè binaayi. Nwamònu anyi? Eci cikondo mpindyewu, ncyà dîbà dyà Dikènga dinène, diikalàdi nè cyà kucyènza. Nè cyôci eci ncidì cyàmba cidì cyènzekà mu Dikènga dinène edi.

²⁷² Mpindyewu tùbuululàayi mu Ekèsòòdè 10.21-23. Nènkù tàngilàayi apa pàdi. . . Ekèsòòdè, mu bushùwà bwà bwalu, mpàvwà Izàlèèlà ùpàtuka ùya bwà kupàtudiibwayè. Ekèsòòdè, nshapità wa 10, ku mvensà wa 21, wa 23. Mèmè ndi nè meeji mambùlùkile kuulu nè ngèèla mbilà, pàndì mfùnda tuubintu tukèsè etu mu mùshindù wà ne mîngà misangu ndi mufwànyine kutùbwejakaja. Èyo, Ekèsòòdè 10.21-23. Èyo, mpòpò apa, 21 nè 23.

Nènkù MUKALENGE wàkambila Mòsà nè: Olòlà cyanza cyèbè mucitàngìje mu dyulu, bwà kwikalakù mîdimà pa buloba bujimà bwà Èjiiipitù, mîdimà mene yìdì mwà kulengüibwa nè byanza.

Nè Mòsà wàkoolola cyanza cyèndè mucitàngìje mu dyulu; nènkù kwàkalwa mîdimà yà mupimbu mu buloba bujimà bwà Èjiiipitù munda mwà matùkù àsàtù. (Nwamònu anyi?)

Mpindyewu, kabàakamòngana muntu nè mukwèndè, anyi muntu nànsa umwe kàakajuukakù mu mwaba wèndè to munda mwà matùkù àsàtù; kàdi. . . bàà bàà Izàlèèlà bàvwa bwòbò nè bukènkè mu mbànzà yàbò.

²⁷³ Mònaayi, ànu menemene's, mpindyewu lwàyaaku lwà apa nùnkù: "Nè dîbà dyà muulu dyàkalwa difiike fitùtù bu mufuku wà nsaka." Nwamònu's, cintu cìmwècìmwè aci's! Bintu bìvwà byènzekà mu bufùki ebi, cìvwa ncinyi? Cinyi? Pàdibi byènzeka mùshindù awu mu bufùki, Nzambi's nguvwa ubiikila Izàlèèlà bwà kupàtukayè. Nwamònu anyi? Nzambi's nguvwa ubiikila Izàlèèlà bwà kupàtukayè. Mpindyewu: "Dîbà dyà muulu difiike bu. . . myòsà." Mpindyewu, Nzambi nguvwa pabwìpi nè kusùngila Izàlèèlà muntwamu, èyo, ùbàsùngila ku cyanza cyà mwena lukunà wabò, uvwa Èjiiipitù awu, mu cyôci cikondo aci.

²⁷⁴ Mpindyewu, apa, Ùdi ùbàsùngila ku cyanza cyà Loomò, kùvwàbo benzè cipungidi cyàbò. Cintu cìmwècìmwè aci ncidì cyènzekà. Bipùpù mbyòbì abi, ci—cikondo cyàbiikilà bipùpù ebi aci ncyàkèngeshà kasùmbù kàà bàà Bisàmbà byà bendè aka. Bu nè tuvvakù nè dîbà mvwa mwà kuleeja ciikalà mwà kwènzekela èkèleeziyà wa bàà Bisàmbà byà bendè awu.

²⁷⁵ Bible mmwàmbè, nè: "Dragon awu—awu, Sàtaanà, wàkadi nè ciiji cìkolè (mbwena kwamba nè, mufiike munda) bwà mukàji awu (beena Yudà, Izàlèèlà), nè wàkapwidija màyi à mukana mwèndè, dyungwila nè misùmbà yà bantu, bàakayà bwà kwenza mvità nè bàshààdilè bàà dimiinu dyà mukàji abu." Bwàkabuulwibwà 13. Mpindiewu, mònaayi mwaba awu, ncidùdi

naaci aci. Nènku ke pàdì Izalèèlà ùtuma cyèndè, ndi muswe kwamba nè, Loomò ùtuma cilwilu cyèndè cilonda bàshààdìlè, bàshààdìlè bàà dimiinu dyà mukàjì abu's.

²⁷⁶ Mpindyewu tàngilàayi. Musangu wà kumpàla, byanza byà mwena lukunà wabò, pàvwàYe ùbàpàtula bwà kubàsùngila, dībà dyà muulu dyàkandamuka è kulwa mufuku wà- . . . difiike fitùtù bu mufuku wà nsaka. Mpindyewu, ewu mmusangu mwibìdì, ndekeelu wa cipungu cyà Dikènga dinène.

²⁷⁷ Mpindyewu, mu Danyèlè 12. Bu nè tuvwakù nè dībà, tuvwa mwà kucibala. Mu Danyèlè, mvensà wa 12—wa 12 . . . nshapità wa 12, èyowà's wè. Danyèlè mmwàmbè nè: “Muntu yònsò wàkasanganyibwa mufùndiibwe mu Mukàndà awu ùvwa mwà kusùngidiibwa.” Mpindyewu, vùlukaayi nè, Danyèlè ùdi wàkula mpindyewu bwà cipungu eci cìvwà aba . . . mbimanya nè cintu eci cidi nè cyà kwenzeka, piikalà Izalèèlà nè cyà kusùngidiibwa, ku ndekeelu wa—wa lumingu lwabò lwà makùmi mwandamutekètè alu. Nènku ke pàdìbi bimanya nè nebiikalè nè cyà kusùngidiibwa. Mpindyewu tàngilàayi. Tùyaayi ku Danyèlè 12 ewu, bwà katanci kakesè cyanààna.

Nè ku cikondo eci Mikàèlè neàjuukè, mfùmù munène uwu mwimànyine bānā . . . bwā—bwā bānā bāā cisāmbā cyèbè (nwamònu's, mbeena Yudà abu); nè nekwikalè . . . lutātu, mu mùshindù wà nè . . . kacya kaluyi lwanji kwikalakù to kacya kwikala ditunga mene too nè ku cyòci cikondo cimwècimwè aci; . . .

²⁷⁸ Mpindyewu pàlakajàayi aci, ànu menemene cyàkambà Yesù, Maatàayi 24 nè: “Nekwikalè cikondo cyà lutātu, citù kaciyiku cyànji kwikalakù to kacya kwikala ditunga.” Tàngilàayi Cìtampì Cìisambòmbò, nwamònu's, cintu cimwècimwè aci's, cikondo cyà lutātu. Mònaayi.

. . . kacya kwikala ditunga mene too nè ku cyòci cikondo cimwècimwè aci; nè ku cikondo aci cisāmbā cyèbè . . . (Mpindyewu, mu cyà makùmi mwandamutekètè eci, citùpā cyà ndekeelu cyà cidimu cyà mwandamutekètè.) . . . cisāmbā cyèbè necisungidiibwè, yònsò wāsanganyibwa mufūnda mu mukāndā awu.

²⁷⁹ Badyànjlila kulongolola's, nudi numòna's, bàdì bafūnda mu Mukàndà wà Mwoyi wà Mwānā wa mùkòòkò abu, nebàsungidiibwè ku cikondo aci.

Nè bààbūngi bàà ku aba bàdì balāale mu lupwishi lwā buloba nebābiikè ku lufū, nè bāmwè bwā mwoyi wā kashidi, nè bāmwè bwā bundù nè dipeetudiibwa dyā kashidi.

Mpindyewu, nè dībà adi beena lungènyi nebākenkè bu mùdì dibālakana dyā mawulu; nè—nè aba bàdì

bàkùdimuna bààbùngì ku bwakàne nebàkenkè bu mùdì mütòotò kashidi nè kashidi.

280 Aci, pashiishe kutungunukaci, kwambilabò Danyèlè bwà “kukànga Mukàndà awu,” bwalu yéyè úvwa mwà kushààla mwikìshe mu cyèndè cikondo too nè ku cikondo aci.

281 Mpindyewu, nwamònu’s, kabyèna nè cidibi bishintulula to nànsha wèwè nè mwoyi anyi mufwè. Neùbiikè ku lufù, nànsha bishi. Nwamònu anyi? Kwikadi . . . Aci, kufwà, kî ncintu nànsha cimwè to bwà mwena Kilistò. Yéyè kàtu úfwakù to, nànsha bishi. Nwamònu anyi?

282 Mpindyewu, Danyèlè 12, mmwambè nè ewu yònsò uvwa mufùnda mu Mukàndà awu úvwa mwà kusùngidiibwa.

283 Apa, Nzambi ùdi pabwìpi nè kusùngila mwan’Èndè mwibìdi, Izalèèlà, paanyimà pàà Dikènga dinène. Nwamònu’s, musangu mwibìdi, Izalèèlà, Wèndè . . . Izalèèlà mmwan’Èndè. Aci nudi bamanyè’s. Izalèèlà mmwànà wa Nzambi, pa nànkù Yéyè neikalè mwà kumusùngila kaaba aka mu cipungu cyà Dikènga dinène, ànu menemene mùshindù wàkenzàYe mu Èjiipitù awu.

284 Mpindyewu twànjàayi kwimana cyàkàbìdi, kaaba aka, bwà—bwà kwangatakù kantu kakwàbò kampànda, pa nànkù, kumpàlà kwà twètù kucifikisha ku kiiipàcilà. Mpindyewu tàngilààyaaku apa nùnkù. Bapròfeta bàbìdi aba, tàngilàayi nùmonè mwikalàbo mwà kwenza mpindyewu, ànu menemene mwàkenzà Mòsà nè bwòbò abu kuntu kwàka. “Nè bàkampèèsha dilèngè . . .” Nè mvensè mwi3 wa nshapità wa 11.

Nè mèmè nèmpeeshè bantèmù bàanyi bàbìdi abu bukòòkeshi, bwà kwenza cipròfeta mu mùshindù wà nè nebènze cipròfeta munda mwà matùkù cinunu nè nkàmà yìbìdi nè makùmi àsambòmbò, bavwàle mifuku yà nsaka.

Bwòbò aba ke micì yìbìdi yà olèvè ayi, . . .

285 Nudi bavùlùke aci, nè Zolòbàbèlà, nè bikwàbò, nguvwa nè cyà kwibakulula ntempèlù.

. . . nè bitèkedi byà myèndù bibìdi abi bìdi biimàne kumpàlà kwà Nzambi wa buloba.

. . . muntu kanà yònsò . . . mubènzèle bibì, kapyà kàdi kàpàtuka mukana mwàbò, . . .

286 Vùlukàayi nè, mukana mwà Kilistò mwàkapàtuka mwelè wà mvità, Dìyì.

. . . kàbùtula beena lukunà bààbò, nè muntu kanà yònsò yéyè mubènzèle bibì, ùdi nè cyà kushebeyiibwa mùshindù wùmwèwùmwè awu.

287 Mpindyewu, tudi bamanyè, “kapyà.” Mu nshapità wa 19, wa Dilwa dyà Kilistò awu, “mwelè Wèndè wà mvità wàkapatuka mukana Mwèndè,” wùvwà Dìyì awu. Ncyà bushùwà anyi?

Dìyì's! Kaa, bu nwênù mwà kupetakù cyamu cyà mudimu eci mpindyewu, bwà Cítampì aci mààlabà dilòòlò's! Nwamònu's, Dìyì ke cintu cìdì Nzambi ùshebeya naacì mwena lukunà Wendè. Nwamònu anyì?

288 Mpindyewu tàngilàayi apa. Pàdì bapròfetà aba munkaci mwà kwenza cipròfetà apu kuntwaku, bàdi. . . Muntu kanà yònsò yèyè ànu mubàkisé, mubènzèle bibi: “kapyà kàdì kàpàtuka mukana mwàbò,” Kapyà kàà Nyumà Mwimpè, Dìyì. Dìyì didi Nzambi. Dìyì didi Kapyà. Dìyì didi Nyumà. Nwamònu anyì? “Kàpàtuka mukana mwàbò.”

289 Tàngilàayi Mòsà. Tùmonàayi bì cyàkapàtukà mukana mwèndè. Bwòbò, Izàlèlè, bàkabanga kwenza, mùshindù wùwàbò bènza kuntwaku awu, kùdì—kùdì. . . ndi njinga kwamba, Èjiipitù, bwòbò mbàvwà munkaci mwà kukisa beena Yudà aba. Mòsà. . . Èè, kabàvwa baswè kubàlekela bwà kuyabò to. Pàlò nguvwa kàyì muswè to. Nzambi wàkateèka Méyì mukana mwà Mòsà, nwamònu's, mmeeji à Nzambi àdì àbwelà mu mwoyi wà Mòsà, yèyè neikalè mpindyewu mwà kuèla patòòke, dìbà adi àdì àlwa Dìyì. Kwololayè cyanza cyèndè, kwambayè nè: “Njiiji yikalèku,” nè kulwakù njiiji. Tàngilàayi apa.

Nè muntu kanà yònsò yèyè mubènzèle bibi, kapyà kàdì kàpàtuka mukana mwàbò, nè kàbùtula mwena lukunà wabò; . . .

290 Nwamònu anyì? Ki bwalu mbwòbù abu's. Bàdi mwà kwamba cyònsò cìdìbò baswè, nè pàacì cyènzeka. Amen!

. . . nè muntu kanà yònsò . . . mubènzèle bibi, ùdi nè cyà kushebeyi bwa mùshindù wùm wè wùm wè awu.

291 Mwanèètù, Nzambi's ùdi ùmata mu cyalu kaaba aka!

Bòbò bàdi nè bukòòkeshi bwà—bukòòkeshi bwà kwinjila mau, bwà mvùla kàmaci to munda mwà matùkù à cipròfetà cyàbò aci; . . .

292 Eliyà, yèyè ngudi mumanyè mwà kucyènza; ùkaavwakù mucyènzè kumpàla. Amen! Mòsà ngudi mumanyè mwà kucyènza; ùkaavwakù mucyènzè kumpàla. Ke bwà cinyì bàvwa balami bwe. Mpindyewu. . . Amen!

293 Ndi mufwànyine kwamba cintu kampànda cyà cimpè menemene kaaba aka mene, kàdì mbipici bwe—mbipici bwe nè mèmè mucilamè too nè mààlabà dilòòlò. Nwamònu anyì? Èyo.

. . . nè mwikàle nè bukòòkeshi pa màyi bwà kuàndamuna kulwawù mashi, nè kutuuta buloba nè . . . bipùpù, misangu yònsò yàs wàbò ayi.

294 Ncinyì aci? Ncinyì cìdiku mwà kutwàla bintu ebi pùkalàci kaciyì Dìyì? Bwòbò bàdi mwà kwenzela bufùki mùshindù kanà wònsò wùdìbò baswè awu. S'ki cyòci eci. bwòbò mbàdì bàtwàla Cítampì Cìisambòmbò. Bàdi bàcibuulula nè bàcikàngula. Cìdì

m'Bukolè bwà Nzambì, bwà kwimanyika bufùki. Nwamònu's, Cìtampì Cìisambòmbò cìdì menemene ànu diimanyika dyà bufùki. Nwacyũmvù mpindyewu anyi? [Disangisha dìdì dyàmba nè: "Amen."—Muf.] Ke Cìtampì cyènù aci ncyòcì aci. Nganyì udi ucyènza awu? S'mbwòbò baprófetè abu, luseke lukwàbò lwà Dyambwibwa. Biikàle nè Bukolè bwà Nzambì, Dìyì dyà Nzambì, bàdì ànu bàpiisha bufùki. Bàdì mwà kutùma dizakala dyà buloba, kwandamuna ngondo ùlwa mashi, dîbà dyà muulu dìdì mwà kubwela, anyi ní ncinyi cyònsò, ku dîyì dyàbò ditùma. Amen!

295 Ki bwalu mbwòbù abu's. Ki bwalu mbwòbù abu's. Nwamònu anyi? Nwamònu mùdì Bitampì bikàngùke, mwàmwa mu cikondo cyà èkèleeziyà, mùdìcì cileejè bafwile diitabuuja anyi?

296 Nèku mpindyewu's ki baprófetà bàbìdì aba biimàne kaaba aka nè Dìyì dyà Nzambì, bwà kwenzelabò bufùki cyònsò cìdìbò baswè kwenza aci. Nè bàdì bàzakeeja buloba. Nè bìdì bìleeja ànu menemene nè bàdì bàcyènza mbanganyì. M'Mòsà nè Eliyà, bwalu mudimu wàbò wà bwambi mudifwànyikijila cyàkàbìdì ngwòwò awu, mbantu abu bùbìdì bwàbò. Kaa, ekèlekèle! Nudi nucimòna mpindyewu anyi? [Disangisha dìdì dyàmba nè: "Amen."—Muf.] Nwamònu cìdì Cìtampì Cìisambòmbò anyi? Mbwòbò baprófetà abu. Mpindyewu mònaayi's. Kacinùpapùlùku to. Kàdì, tàngilàayi nùmonè cìdì cikàngùle Cìtampì aci, baprófetà! Nwamònu anyi? Yoyòyò! Amen! Ki bwalu mbwòbù abu's.

297 Kaa, twètù's tudi nè mwoyi mu cikondo cyà mukankù, mwanètù, mitù pampàla pa matutu!

298 Mbwòbò bàdì bakàngùle Cìtampì Cìisambòmbò aci. Bwòbò mbàdì nè bukolè bwà kucyènza. Amen! S'ke Cìtampì cyènù Cìisambòmbò cìdì munkacì mwà kukànguka aci's. Nwamònu anyi?

299 Mpindyewu tudi twalukila buludì kaaba aka, nè Yesù mmwambè nè cìvwa mwà kwenzeka. Kale wàwa mu Dipungila Dikùlukulu, mu Yèhezèkèlè mwàmwa, mwàmwa mu baprófetà bàà kale, bààkamba nè cìvwa mwà kwenzeka.

300 Nèku apa Cìtampì Cìisambòmbò ncikàngùke, nè bwòbò bàmba nè: "Èè, aci ncintu cyà kaciyì cyùmvwika to. Ncinyi cyàkènzàcì aci?"

301 S'ki mùnsokòntù wàcì ewu, baprófetà abu, bwalu mmùdì Bible mwàmbe nànkù kaaba aka. Bwòbò mbàdì mwà kucikàngula, dîbà kanà dyònsò dídìbò... Bàdì mwà kwenzela bufùki cyònsò cìdìbò baswè aci. Nè bàdì bènza cintu cimwècimwè cyàkènzàbò aci, amen, bwalu bwòbò mbàdì bamanyè mùtùcì cyènjiibwa. Amen! Butumbi's wè!

302 Ndi mwenzè ànu mmòna cyòcì aci, mèmè kujuuka dyàkàmwè mu nkwasà nè kubanga ngàtwa eku ngàtwa eku panshì apu.

Mémè kudyàmbidila nè: “Mukalenge, mùshindù mwinè wúndi nKwela twasàkidila’s wè, Taatù wa mu Dyulù!”

303 Ncyòci aci mwaba awu. S’ki cyòci aci. Mbwòbò abu bàdi bakàngùle Cítampì Ciisambòmbò aci. Amen! Bâtàngilaayi nùmonè: “Muntu kanà yònsò yéyè mubènzèle bibì, kapyà kàdi kàpàtuka mukana mwàbò,” Díyì. Nyumà Mwímpè wakapwekela bàpostòlò awu, nudi numòna’s. “Kapyà kàdi kàpàtuka mukana mwàbò.”

304 Mpindyewu mònaayi mu Bwàkabuulwibwà 19, tudi tumòna cintu cimwècimwè aci nè: “Nè mwelè munènè wà mvità wàkapàtuka mukana Mwèndè,” Díyì. Nwamònu anyi? Dilwa dyà Kìlistò. “Nè Wàkashebeya Naawù beena lukunà Bèndè.” Mmòwò mò anyi? Mpindyewu Ùdi mu njila Wèndè. Anjàayi kuMutàngila mpindyewu. Èyo.

Bwòbò aba bàdi nè bukòòkeshi bwà kwinjila maulu, bwà mvùla kàmaci to munda mwà matùkù à cipròfeta cyàbò aci; . . .

305 Balùmyànà, aci’s ndiimanyika dyà bufùki’s! Mpindyewu, ùvwa nntàntà bule kaayi uvwa—uvwa muntu ewu, Eliyà, mwinjile maulu? [Disangisha dìdi dyàmba nè: “Bidimu bisàtù nè citùpà.”—Muf.] Ki bwalu mbwabù’s, byòbì menemene. Nntàntà bule kaayi udi citùpà cyà ndekeelu cyà makùmi mwandamutekètè, cyà mbingu makùmi mwandamutekètè yà Danyèlè aci’s? [“Bidimu bisàtù nè citùpà.”] Ki bwalu mbwòbù’s, byòbì menemene.

306 Mòsà wàkenzà cinyi? Wà—wà—wàkandamuna mâ—mâyì kulwawù mashi. Wàkenza bishimà byà mishindù yònsò ebi, ànu menemene bìdi bidyànjila kwamba mu Cítampì Ciisambòmbò eci. Nènkù’s ke bwòbò aba, mu Bwàkabuulwibwà 11, biikàle bènza cintu cimwècimwè aci. Amen!

307 Kùdi myaba mishìlàngàne yisàtù mu Mifùndu, mwòwò amu mene, yìdì yìfikishà cintu aci ku dinwàngana. Ndikàngula dyà Cítampì Ciisambòmbò. S’ki cyòci aci mwaba awu mene. Amen! Butùmbi’s wè! Mpindyewu mònaayi’s.

Bòbò aba bàdi nè bukòòkeshi bwà kwinjila maulu, munda mwà matùkù à cipròfeta cyàbò aci, bwà mvùla kàmaci to; nè . . . bukòòkeshi pa màyi bwà kuàndamuna kulwawù mashi, . . . bwà kutuuta buloba nè . . . bipùpù, misangu yònsò yàswàbo ayi.

308 Kaa, ekèlekèlè! Ki bwalu mbwòbù abu’s. Mpindyewu anjì buulùlaayi mwaba wùdi bipùpù ewu, nwamònu’s. Bufùki bwònsò mbwimanyika, mu Cipùpù Ciisambòmbò eci . . . anyi Cítampì Ciisambòmbò, cikàngula. Ki cyòci aci menemene cyàkenzèkà. Mpindyewu tàngilàayi. Kùdi . . .

309 Apa, Nzambi ùdi pabwìpì nè kusùngila mwan’Èndè, Izalèlèlè, paanyimà pàà dikènga dinènè dyà mùshindù wùmwewùmwè

dyàkafilàYe kuntu kwàka adi's. Wàkatùmakù Mòsà kuntu kwàka nè kusùngila Izalèlèlè. Mmwómò anyi? Nènku kwenzayè bintu byòbì bimwèbimwè abi. Wàkatùma Eliyà kùdì Aakàbà, nè binunu mwandamutekètè kupàtukabì. Mmwómò anyi? Ùdi ùbàtùma cyàkabìdì apa bwà kwalukilabò, mu cikondo cyà Dikènga dinène, nè ùbìkila binunu lukàmà nè makùmi ànaayi nè binaayi bwà kupàtukabò.

³¹⁰ Mpindyewu, nwamònu's, nudi numòna's, pankaci pàà Bwàkabuulwibw-. . . anyi pankaci pàà nshapità mwi6, anyi Cipùpù Ciisambòmbò. . . Cìtampì's, mfwilaayikù luse, Cìtampì Ciisambòmbò nè Cìtampì cyà Mwandamutekètè. Nshapità wa 7 wa Bwàkabuulwibwà, mu kwenza kwà makùmi, mbiteèkiibwe pàmwè mu byòbì.

³¹¹ Ànu mùdì Àmèrikè mwikàle nombà dikùmi nè isàtù: provinces dikùmi nè yisàtù yàkabangaye naayi, mìtootò dikùmi nè yisàtù pa dibèndelà, matungà makesè dikùmi nè asàtù, tushoonyi dikùmi nè túsàtù. Byònsò bìdì dikùmi nè isàtù, dikùmi nè yisàtù. Nè ùdi ùmwèka apa mene mu nshapità wa 13 wa Bwàkabuulwibwà. Aci's ncyà bushùwà. Yèyè ùdi dikùmi nè isàtù, nè mwikàle mukàji.

³¹² Mpindyewu, pàkaavwàYe pabwìpì nè kusùngila Mwan'Èndè umwèpelè mulela, uvwa mwan'Èndè umwèpelè mulela awu. Yakòbò ùvwa mwan'Èndè, kàdi ewu mMwan'Èndè umwèpelè mulela. Maatàayi 27, tùmònaayibi cyàkenzàYe kwàka. Maatàayi, nshapità wa 27. Mpindyewu, vùlukàayi nè, Mwan'Èndè ùvwa mutuaciibwe, nè ùvwa mutàcishiibwe, nè bàakaMwelulwila. Nè Ùvwa mpindyewu mukùdika ku nkùrusè, pa dibà isàtù wa mapingaja, mu Diitànù Dinsantu. Cìdì cyàmba kwikala pabwìpì nè kwenzeka! Maatàayi, nshapità wa 27 wa Maatàayi, ku—ku mvensà wa 45, ngèlè meeji nè nyèyè.

Mpindyewu kuumukila pa dibà isambòmbò kwakalwa mîdimà pa buloba bujimà too nè pa dibà citèemà.

³¹³ Mpindyewu mònaayi ànu menemene cyàkenzàYe apa nùnkù mpindyewu, mu bwòbù bwalu ebu. Nwamònu anyi?

Nè ngàkamòna pàakamanàye kukàngula cìtampì ciisambòmbò, . . . mònaayi, kwàkenzeka dizakala dinènè dyà buloba; nè dibà dyà muulu dyàkalwa difiika fitùtù bu mufuku wà myòsà, nè ngondo—nè ngondo wàkalwa mashì;

³¹⁴ Difìika, mîdimà! Èjiiipitù; difiika, mîdimà!

³¹⁵ Nzambì, mwikàle usùngila Yesù pa nkùrusè, ànu kumpàla menemene kwà Yèyè kuMujuula ku lufù. Dyàmbedi, mîdimà; dibà dyà muulu dyàkabwela mu nkànkala wa ditùkù, nè mìtootò yàkabènga kukenka. Matùkù àbìdì kuumukila pòpò apu, Ùvwa mwà kuMubiisha ku lufù nè bucimunyi bukolè.

316 Paanyimà pàà díbà dyà muulu, nè ngondo, nè mitootò, nè byònsò, mu Èjiipitù, byònsò ebi byàkenzeka, Yèyè wàkasungila Izalèlèlà bwà kumufikisha ku buloba bulaya.

317 S'ki cyôci eci, mu cipungu cyà Dikènga dinène, ke baprófeta abu mbwòbò aba biimàne kùdi aba bàdi bapèeshiibwe bukòntononyi bwà Díyi dìdi Nzambi ùbàpèèsha. Bwòbò bàdi mwà kwakula ànu mùdi Nzambi ùbàpèèsha Díyi amu.

318 Mpindyewu, bwòbò kí mbanzambi to. Bàdi bwà katùpà kípì...Mu mùshindù wà twánàtwánà, ncìdìbo, bwalu Yesù wàkamba nè ncìvwàbo. Wàkamba nè: “Nwènu's nudi nubàbiikila nè mbanzambi, bwòbò bàvwà Díyi dyà Nzambi dílwa kùdìbo abu.” Kàdi, tàngilàayi, mbwòbò abu bàdi Nzambi ùtwàdila Díyi. Nè pàdiye ùDyàmba, bwalu bùdi bwènzeka. Kwàjikì.

319 Nènku's ki yèyè ewu nè mudimu mumutùma naawù kùdi Nzambi, bwà kutuuta buloba, cyònsò cìdiye muswè kwenza aci (kaa, ekèlekèle), kwimanyika maulu. Nè yèyè ùdi ùcyèna. Mbwalu kaayi abu? Ùdi pabwípi nè kupátula binunu lukàmà nè makùmi ànaayi nè bìnaayi abi, bwà bupikudi, mu Mukàndà wà Bupikudi. Nènku aci's mmu Cítampì cyà Bupikudi, mu Cítampì Ciisambòmbò. Ke cyôci aci's, mulundà wanyì munanga. Ki cyôci Cítampì Ciisambòmbò aci's; cìvwà cyà kacìyi cyùmvwika menemene aci.

320 Twánjàayi ànu kwangata...Tucidi nè tusunsa tukwàbò dikùmi. Twánjàayi ànu kwangatakù ànu ndambù, nwamònu's. Ndi nè mabèji matwè ku àbìdi anyì ku àsàtù's. Èè, ndi nè...Nudi ànu mwà kumòna, *apa*. Ngèèla meeji nè kùdi bu...Pa cyôci aci, ngèèla meeji nè ncìdi nè mabèji matwè ku dikùmi nè àtaanu àcìdi mashààle, àdi mafwànyine kukèngela bwà mèmè kufikakù. Kaa, kùdi byàbúngi be pa bwalu abu! Ekèlekèle, wèwè's udi ànu mwà kutúngunuka ànu wenda uya umuka ku kaaba uya ku kakwàbò! Kàdi ndi ncìina nè nkwèpi kúngaànùpèèsha cibwejàkàji pàndi nnùtangalajilabi búngi cyanààna. Wa bwalu mèmè ncyèna...Ncyèna mwà kubìbùmbakaja pàmwè mùvwàbi bìkèngela bwà mèmè kwenza to.

321 Mu Yeshàayi, twàngatàayi eci. Yeshàayi murpòfeta wàkamòna Cítampì Ciisambòmbò eci cikàngula nè wàkaakula pa Cyôci; bwà kumòna nè Cìdi nè mushinga anyì to. Nwamònu anyì?

322 Èè, cintu cyònsò mu kaabujimà, ndongamu yònsò mu kaabujimà wa bupikudi awu, ùdi ùsanganyiibwa mu Bítampì ebi; Mukàndà wònsò mu kaabujimà.

323 Mpindyewu nwavùlukaayi nè, twamònu nè Yesù wàkaCimòna. Mmwòmò anyì? Nwamònu anyì? Yesù wàkaCimòna. Nè mpindyewu tudi tusangana bakwàbò bàakaCimòna. Tudi tuCisangana cìfwànyikijila mu—mu

Yakòbò. Tudi tuCisangana cifwànyikijila mu Èjjiipitù. Tudi tuCisangana cifwànyikijila ku nkùrusè.

324 Mpindyewu twàlukilààyaaku ku Yeshàayi. Ndi kàbidì nè baprófetà búngì cyanààna, bándì mufunde kaaba aka. Twánjàayi ànu. . . Ntu mémè munangè eci, cyà Yeshàayi eci. Twánjàayi kwalukila ku Yeshàayi eku, nshapità wa 13 wa Yeshàayi. Ntu mémè munangè. . .

325 Yeshàayi ùdi Bible yònsò mu—mu kaabujimà, mu Yéye mwinè, nudi bamanyè's. Nuvwakù bamanyè nàнку anyi? Nwamònu's, Yeshàayi ùdi ùbanga nè bufùki; munkaci mwà Mukàndà ùdi ùtwàla Yone; nè ku ndekeelu ùdi ùtwàla Bukalenge bwà bidimu cinunu. Nènku mùdi Mikàndà makùmi àsambòmbò nè yisambòmbò mu Bible, nè nshapità makùmi àsambòmbò nè yisambòmbò mu Yeshàayi. Mmukàndà wa cibungu mujimà, Wòwò mwinè.

326 Mònaayi's, nshapità wa 13 mpindyewu, wa—wa Yeshàayi. Tùbangilàayi kaaba aka ku mvensà mwi6.

Twàyi mikèmù, bwalu ditùkù dyà MUKALENGE dìdi pabwipi; nedilwe bu mùdi kabùtù kàà cìmpicìmpi kàà kùdì Wa bukolè bwònsò.

327 Tàngilàayi Cìtampì Ciisambòmbò eci cikàngula kaaba aka mpindyewu. Paanyimà menemene pààpa, bidimu nkàmà mwandamutekètè nè dikùmi nè bisàtù kumpàlà kwà Kilistò kulwa, nè Yéye ùkaadi mulwè kùkaadi bidimu binunu bibìdi, aci's ncifwànyine kwikala cyà cìpacila ku mwandamutekète. . . cyà kùkaadi bidimu binunu bibìdi nè nkàmà mwandamutekètè. Yeshàayi wàkamòna Cìtampì eci cilembeleja muulu mwàmwa. Eyo.

Ki bwà cinyi byanza byònsò nebipangilè, nè mwoyi wà muntu yònsò newipangè bukolè.

328 Yesù wàkamba cinyi? “Nè bwalu bwà bubì nebwikalè mwà kuvulangana, di—dinanga dyà bàabùngì nedikwatè mashika dībà adi.” “Nè myoyi yà bantu neyìpangè bukolè, bwà bwòwà; mbù ùkungula.” Nwamònu's, myoyi yà bantu neyìpangilè.

Nè nebàkwacikè bwòwà; bisaamà byà cìmpicìmpi byà tunyinyangyina nebibàkwàtè; nebùmwè mikenyi yà disaamà mùtù mukàjì ùdinyènga bwà kulela amu; nebàtangilanganè nè dikàcila muntu nè mukwèndè; kwìsù kwàbò nekwikalè bundù.

329 Mònaayi aci kaaba aka, kaa, “kwìsù kwàbò, bundù.” Bidi bìkèngela tükafikè ku cyòci aci, mu katanci kakesè emu. Nènshaalè mulamè cyòci aci, nwamònu's.

Mònaayi, ditùkù dyà MUKALENGE dilwalwa, diikàlè nè lwonji nè ciiji cìkolè pàmwè nè difiikà dyà munda, bwà kushiya buloba munda mutupù; nè yéye neabutulè banganzàmpèkàatù bàdipu abu.

330 “Buloba,” s’mbwòbù bwònsò, bwònsò bunùdì numòna abu. Mònaayi.

Bwalu mitootò yà mu dyulu nè bisùmbù byàyi kabàyakufila bukênkè bwàyi nànsha; dîbà dyà muulu nedifìkè fitutù mu kupátuka kwàdi, nè ngondo kàakufikisha makênkè èndè ku dikenkesha nànsha.

Nè mèmè nényookè bàà pa buloba bwà bubì bwàbò, nè bubì, nè lwonji lwà bubì bwàbò; nè mèmè nèndekeeshè dyamb- . . .

331 Ncyè—ncyèna mumanyè mwà kucyàmba ku dileetà ku dileetà to, dyamb- . . . [Disangisha didi dyàmba nè: “Dyambu.”—Muf.] Mèmè ncyèna mumanyè mwà kucyàmba to, nwamònu’s.

. . . dyà baditàmbishi bwà kujikadi, nè nêmpwekeshè didibàndisha dyà—dyà bènzejanganyi bàà bwòwà— bènzejanganyi bàà bwòwà.

332 Nwamònu’s, mwaba awu, ànu mu cyôci menemene, Yeshàayi wàkamòna cintu ànu cyôci cimwècimwè cyàkambà Yesù aci. Cidì Cìtampì cyà Mwandamutekètè cibүүлulà’s. PàdìYe munkaci mwà kukezula buloba nè dikènga dinène apu, aci’s ncipungu cyà Dikènga dinène, Cìtampì Ciisambòmbò eci. Eyowà, yèyè ùvwa mupròfetà, nè Dîyi dyà Nzambì dyàkamanyishiibwa kùdiye. Aci’s nkùkaadi bidimu binunu bibidì nè nkàmà mwandamutekètè.

333 Bulelèlà’s! Ndi ànu muswè kwamba cyôci eci. Buloba bujimà, mùdì Yeshàayi wàmba kaaba aka nè, “mùtù mukàji ùdinyènga bwà kulela,” bufùki bwònsò bùdì munkaci mwà kudinyènga bwà kulela. Mikèmu yònsò eyi nè didinyènga dyà pa kulela dyònsò edi mbyà cinyi? Mùdì mu—mu—mukàji ukàadi pa kulela; buloba bwòbù bwìnè, bufùki.

334 Mòna’s, eci cimenga eci, twànji twàngatàayi cimenga cyètù twètù eci; pàdimu, binwinù byà maalà à byèrè, nè bundumbà, nè bukooyà, nè dipota, ànu mùdì cimenga cikwàbò kanà cyònsò eci’s!

335 Mòna’s, ngèèla meeji nè Nzambì mmufwànyine kutàmba kudyùmvwà bîmpè, mu kucitàngila mùshindù wàkacyènzàYè, kùkaadi bidimu cinunu. Pàvwà Ohio mutùngùnùke nè kwikala ànu mu mùshindù mwîmpè, kabàyi nè mikidì yà màyi nè dipaasalala dyà màyi. Kabàyi nè mpèkaatù mu cibandabanda to. Ngombangòle ùvwa ùtambakana mwònsò emu, nè—nè Cherokee wa kale mwikàle ùmulemba nè ùpeta cyàkudyà cyà muntu udi udineemeka. Kakùvwakù ndululu to, nànsha kakesè.

336 Kàdi, dyà muntu ùfikamù anyi, ke mwaba awu mpèkaatù kubwelayè. Pàakabangà bantu kuvulangana panshi pàà buloba, dîbà adi ke dyàkamwènekà mpèkaatù nè cinyangu. Ncyà

bushùwà, ànu muntu misangu yònsò. Mòna's, mémè's ndi ngèèla meeji nè mbyà bundù!

³³⁷ Mvwa nsanganyiibwa, ditùkù adi, mu citùpà cyètù cyà buloba mwàmwa, mu Arizona mpindyewu. Nènku—nènku mvwa mbala, pancìvwà mwànà mukesè, bwalu bwà Geronimo, nè—nè bwà Cochise, nè bwà ba-Apaches bàà kale abu. Bwalu, mvwakù mubàyiishe kuntwaku. Bantu bàà maalu mîmpè be! Nè bàmwè bàà ku bantu bàà batàmbe kwikala bàà maalu mîmpè baùdì mwà kuswà bwà kutwilangana naabò, s'mba-Indiens bàà ba-Apaches abu.

³³⁸ Ki pashìishe mémè kuya kuntwaku mu—mu Tombstone, mùdìbo bwònsò nè bishààdìlè byà kale byà mifùbà yà bantu nè bikwàbò byà ku mvità abi. Ke mémè kutàpa dísù ku . . . Bwòbò misangu yònsò, nudi bamanyè's, bàtu ànu bàbala Geronimo bu—bu muntu mupidyè diitabuuja. Bwànyì mémè, yèyè awu nguvwa mwena Àmèrikè wa dikàndà. Kakùyì mpatà to! Yèyè's ùvwa ùlwangana ànu bwà makenji èndè, mùdì muntu kampànda kanà yònsò ewu mufwànyine kwenza. Kàvwa muswè dikooyika adi mu buloba bwèndè nànsha. Kàdi anjì tàngilàayi nùmonè mùdìbi patùdì twakulangana apa; bàndamuna bânà bèndè, bânà bèndè bàà bakàjì, bàbàvwija bandumbà, nè bikwàbò byònsò; nè batòòke mbabwelèmu. Mutòòke's ngudi mupangè kaneemu bwà bakwàbò.

³³⁹ Indien ùvwa mulami wa maalu à kale. Ùvwa—ùvwa mu—mulami wa bufùki. Ùvwa mwà kuya kashebeya ngombangòle umwèpelè, cifuku cijimà cìvwa cìdya byònsò bìvwà bishààlakù abi. Bàvwa bàngata cisèba bwà kwenza bilàmbà nè ntentà, nè bikwàbò byònsò. Kàdi mutòòke yèyè ùdì ùlwa bwà kumwasa ku cingoma, bu cyà kuludikila màzajì; mòna's, s'ncintu cyà bundù's!

³⁴⁰ Mvwa mubalè kaabwalu mu cibèjibeji, mùvwàbi, mu Àfrikè, mwaba munène wùvwà mùle tètè nè nyama yà cisuku yà dyasa! Kwangatabò bantu aba, Arthur Godfrey nè bakwàbò abu, bàya kuntwaku, bààsa nzevu eyi nè bikwàbò, bàyààsa bìikàdìle mu ndèkè yà mìnjinjidi nè bikwàbò byà mùshindù awu. Fòtò wa nzevu mukàjì kampànda wa kale, ùteeta bwà kufwà, nè binsònji, bu nàнку, bimupweka kwísù. Nènku nzevu milùme yìbidì yiteeta bwà kumwimanyika, bwà kulama. . . Mòna's, s'mpèkaatù's. Aci kí mmanàyi nànsha.

³⁴¹ Pântù mémè nsanganyiibwa kuntu kwàka mu budimi bwà bwambi, pântù nya bwà kulemba nyama nè bikwàbò byà nàнку awu, nè mmòna myaba yìvwà baabilembi bàà batòòke abu bàlwa kuntwaku bààsa tushà atu, nè bàkòsa ànu byànyimà nkààyaabi. Nè mîngà misangu bàshebeya tushà tukàjì mwandamukùlù anyì dikùmi twà tukesè, kàdi kutùlekela panshì apu. Nè twànà twà tushà tùnyemakanangana eku nè eku, tùteeta bwà kupeta kùdì mamwàtù. Kàdi nujuuka pèenù nwamba nè aci mmanàyi's? Aci's

ndishebeyangana dyà nè cikisu ànu dyètù dyà cyà bushùwà edi, bwà wanyì mmwènnenu.

342 Ndi ntèkemena nè Canada kààdyàkupetakù bibeeba mwómò amu to, bwà pândiku mémè nè mwoyi, bwà kupangishakù beena Àmèrikè bavilè diitabuuja aba bwà kubwelamù. Ncyà bushùwà. Bwòbò kàdi's ke banàyi bàà batàmbe kwikala bakwàte nè byà luse bândi neiyikù mwanjì kumòna kacya bândela.

343 Mpindyewu, kî mbwòbò bwònsò to. Kùdi bàmwè, bantu balelèlè, bashùwashùwàlè, kàdi ngumwèpelè pa cinunu's, baùdi upeta.

344 Bààsa cintu kanà cyònsò cidibokù mwà kumòna, mùshindù kanà wònsò wùdibo baswè awu. Ncyà bushùwà's. Awu's mushebeyangananyi wa nè cikisu. Ncyà bushùwà's. Kàyiku nè luse to. Biinè abi ùdi wàsa, kabìyi mu cikondo cyàyì to.

345 Èè, mwàmwa mu Alàska amu, mvwa muyèmu pàmwè nè umwe wa ku balombodi abu. Kwambayè nè: "Ndi mwangùle. . . Ndi mufwànyine kuya kuntwaku mpindyewu, nè kusangana bisùmbù byà mbudi minène ayi anyì. . .kî mmbudi to, kàdi ngulungù yà mpàndà milààle myandanda mwaba awu; nè cingoma cyà mwambùuyì cyà cipidi cyà màzajì makùmi àtaanu matùbùle nsèngù yààyi, kùvwà bendeshi bàà ndèkè bàà beena Àmèrikè abu bapàtùkile kuntwaku, mu Alaska, bààsa nè cingoma cyà mwambùuyì, bààshila mu ndèkè awu, cisùmbù cyà ngulungù yà mpàndà." Aci's ndishebeyangana dyà nè cikisu's.

346 Bàvwa bamanyè nè, mwaba wònsò wùdibo bàshebeya ngombangòle awu, mba-fwànyine kupeta Indien. Mmufwànyine kufwà lwà nzala. Ke bwà cinyi Cochise awu ùvwa nè cyà kudifila; bèndè, bamfùmù bèndè bwònsò, nè bakwàbò bwònsò abu, bàna bèndè, nè beena díkù dyèndè bwònsò, bàvwa bàfwa lwà nzala. Bàvwa bapàtuka kuntwaku nè majitu manène, manène àà bwòbò àbò, Buffalo Bill nè bantu bàà mu cibàtàbàtà abu, bàvwa bààsa ngombangòle yònsò ayi, makùmi ànaayi, makùmi àtaanu, mu mapingaja. Bàvwa bamanyè nè, pàvwàbò bùmusha yòyi ayi, bàvwa bùmusha Indien. Nènku, kaa, ekèlekèlè! Dikeji pa dibèndelà, mùshindù wàkasubishàbò ba-Indiens abu awu's. Ki bwalu mbwòbù abu's.

347 Kàdi vùlukàayi, Bible mmwambè nè: "Dìbà dyàlu dyàbùtulà Nzambi aba bàdi bàbùtulà buloba." Nè buloba bujima!

348 Tàngilàayi bibandabanda abi. Mvwa mwimànyine lwà kuulu kwàka, ditùkù adi, ntàngila panshì mu cibandabanda ku Phoenix. Mémè kubànda pa South Mountain, mukàjàanyi nè mémè tuvwa basòmbe kuntwaku, nè kutàngija mèsù mwînshì mu Phoenix. Ki mémè kwamba nè: "Kî mbìbì byà menemene anyì?"

Yèyè kwamba nè: "Bìbì byà menemene? Udi muswè kwamba bìshi?"

349 Mémè nè: “Mpèkaatù’s. Nè mbungi kaayi bwà masandi, nè dinwà dyà maalà, nè dyelangana dyà milawu, nè ditèèlà dyà Dîna dyà Mukalenge citèèlàtèèlà, mu cibandabanda mwàmwa; kùdi bantu batwè ku binunu lukàmà nè—nè makùmi ànaayi, makùmi àtaanu, anyi pàmwàpa bantu binunu nkàmà yibìdi, mu cibandabanda cyàcya!”

350 Mémè kwamba nè: “Kùkaadi bidimu nkàmà yitaanu, anyi cinunu, kamùvwa cintu nànsha cimwè to ànu ntùlu, mici yà meesikità, nè mibwàbwà yà kale yinyeemakanangana mbilu eku nè eku pa musùlù wà lusenga wàwa, mu mi—minkoloji.” Nènku mémè kwamba nè: “Mùshindù awu ngùtù Nzambi mubyènzè.”

351 Kàdi, muntu mmulwèmu. Mmwenzè cinyi? Mmupàcishe patapata buloba nè bukooyà. Misèèsù myùle tètè nè ditàcishiibwa dyà ku mwoyi. Mikìdi yà mwinshì mwà buloba, nè. . . Nè misùlù mmikooyisha nè—nè makoooyà. Kabàvwakù mwà. . . Mòna’s, s’mbipicùbwe nè wèwè mubènge kunwà àmwè à ku màyi awu; s’udi mufwànyine kupeta cintu kampànda kanà cyònsò. Nwamònu anyi? Citàngile ùmonè. Kí ng’ànù muneemu nkàayaamù to, kàdi, buloba bujìmà, cintu ncikooyisha!

352 Nènku buloba, bufùki, (Nzambi àfwèkù luse’s wè!) buloba bujìmà bùdi mu—mu bìsaamà byà pa kulela. Buloba bùdi munkaci mwà kuteeta, bùdi munkaci mwà “kudinyènga bwà kulela,” mwàkambà Yeshàayi. Mbwalu kaayi abu? Bùdi mu. . . bùdi bùteeta bwà kuleela buloba bupyabùpyà, bwà Bukalenge bwà bidimu cinunu, mwikalà byònsò. . . ? . . . Bùteeta bwà kulela buloba bupyabùpyà, bwà cisàmbà cipyacipyà ciikalà kaciyi nè mpèkaatù nè kaciyi mwà kubùkooyisha to. Ncyà bushùwà. Bùdi mu kudinyèngà kwà pa kulela. Ke bwà cinyi ci—ci. . . Twètù tudi mu kudinyèngà kwà pa kulela, Kilistò, bwà kulela Mukàji-musèla. Bintu byònsò bìdi mu kudinyèngà kwà pa kulela nè munkaci mwà kutwà mikèmu. Nwamònu’s, kùdi cintu kampànda cikaadi pabwìpì nè kwenzeka.

353 Kàdi Cipùpù Ciisambòmbò eci ncidi cibùpèèsha mùshindù wà kwanji kutungunuka. Mwanèètù, dizakala dyà buloba didi dyùnzulula njila ku dibùbwayisha, nè mitotò yinyùkushiibwa, mabwe mengulula kùdi tupyà twà mwinshì mwà buloba neàpatukè, nè buloba nebùdivwijùlùlè bupyabùpyà. Musàbusabu mupyamùpyà wà mu buloba newùbwayikè wùmukila mu nkàcinkaci wa buloba. Nè nebùpukè, mu nyùngulukilu nè nyùngulukilu nè nyùngulukilu mwònsò amu, pàanyùngulukàbu kwàka.

354 Nè ndi nzwàmabila, dindà kampànda dyàlukilà Yesù nè Mukàj’Èndè-musèla pa buloba, nepìikalè mpàladiizò wa Nzambi. Mu mùshindù wà nè, kaa, ekèlekèle, balwanganyi bàà kale bàà mvità ayi abu, nebèndakanèmu nè balundà bààbò nè bananga bààbò. Miyengà neyùlè tètè mu mpeepèle, mimba kùdi cilwilu cyà Banjèlò. “Kaa, udi mwenzè bìmpè, wèwè

musadidi Wanyì mwîmpè nè wa lulamatu. Bwelà mu masànkà à Mukalenge, àtù makulongolwela, mùvwàbi bikèngela bwà wèwè kwikala muàpetè kale wàwa kumpàlà kwà Evà kubùngulujayè ndundu mu mpèkaatù.” Amen! Yoyóyò! Èyowà.

³⁵⁵ Cítampì Ciisambòmbò neciikalè mwà kwenza cintu kampànda. Èyowà’s, mukalenge. Mbulelèlà nè buloba bujimà bùdì munkaci mwà kutwà mikèmu nè bwikàle bùsaama, bwà cikondo cyà Bukalenge bwà bidimu cinunu!

³⁵⁶ Mpindyewu, bwà mpindyewu mbubolesha bolebole nè bukooyà’s! Aci ncímvwà muyiishè kaaba aka, kí nkwanji kwenza ntàntà to, ngèela meeji, muyiishe ku tabernacle eku nè: *Buloba Munkaci Mwà Kutònkoka*. Aci’s mmwòmò menemene. Anji tàngilàayi cidì munkaci mwà kutònkoka pa buloba’s. Tàngilàayi, byàbù, byònsò bidi munkaci mwà kunyanguka. Ncyà bushùwà nè, ke mùdibi. Bi—bikèngela ànu bìtonkokè. Èyowà’s, mukalenge.

³⁵⁷ Tàngilàayi, cibùmbà cyàbù! Ngánji nnùleejè bwà cinyi bikèngela ànu buloba bwènzè nàнку. Cibùmbà cyà buloba ebu, cyamù cifiike, nè cyamù cyà mìtakù, nè bintu byà buloba ebu, mbyumusha mu bwòbù amu, cibùmbà cyàbù, bwà mvità nè midimu yà mu byapù, mu mùshindù wà nè bìdi ànu byàmba kwikala pabwîpi. . . Èè, kacya katùtukù bapetè dizakala dyà buloba to ànu ditùkù adi, lwà mùnwemu emu mu eci citùpà cyà ditùnga; ànu ditùkù adi mùnwemu, nudi numòna’s, St. Louis nè lwà kuntu kwàka. Bùkaadi bwènda bùshàala cipeyipeyi cyà menemene. Bàkaadi bapàtùle byònsò bìvwàmu. Nwamònu anyi?

³⁵⁸ Bididi byàbù mbikooyike ànu menemene, mu mùshindù wà kakùyì muntu wa ngiikàdilù wa kweyemenyiibwa nànsha umwe munkaci mwàbò to, nwamònu’s, ndongolwelu wabù. Nsòmbelu mulenga wabù mmulwè wa ciipanshì, mu mùshindù wà kabùciyi mene nendè nànsha mukèsè to. Kwajiki. Nwamònu anyi? Bushùwà’s. Ntèndeleeu wabù mmudyà kùdì kamunguji. Èyowà’s, mukalenge.

³⁵⁹ Dìbà dyàkányi bwà Cítampì Ciisambòmbò, àbidi aa, bwà cyòci kukànguka. Nè pàakàngukàci, kaa, ekèlekèle, cidì cijikija’s! Mukàji-musèla ùkaadi mumanè kupàtuka, ùkaadi mumanè kupàtuka, Mukalenge-mukàji ùkaadi mumanè kuya bwà kwàngata kaaba Kèndè; Wàmanyi kubwela mu dibàkà mpindyewu, nè Mfùmù, pàdì cyòci eci munkaci mwà kwenzeka apa. Nè bàshàadilè bàà Izalèlèlà bàtwìbu cítampì nè pabwîpi nè kuyabò, nènku bufùki bùdilekelela. Kaa, cikondo kaayi’s wè!

³⁶⁰ Mònaayi mvensà wa ndekeelu wa Cítampì Ciisambòmbò awu, cikàngula. Aba bàvwà basekèsèke diyiisha dyà Dìyi, Dìyi dishindikà dyà Nzambì udi nè mwoyi abu, pàvwà bapròfetà abu biimàne mwaba awu nè benzè bishimà, bakàngè bukènkè bwà dìbà, nè bikwàbò byònsò apu, nè munda mwà cikondo cijimà aci abu, nwamònu’s: “Bààkeela mbilà bàlòmba mbwebwe

nè mikùnà bwà kubàsokokabi,” nwamònu’s, bwà kubàsokokabi kùdi Dìyì òwàbò basekèsèke adi, bwalu bààkaMumòna ùlwa. “Tùsokòkaayikù ku ciiji cicolè cyà Mwànà wa mùkòòkò.” Yèyè ùdi Dìyì. Nwamònu anyi? Bàvwa basekèsèke Dìyì adi. Kàdi’s ke Dìyì adi mwaba awu’s, dyandàmùke mubidi. Kàdi’s bwòbò bàvwa baDyèlùlwile; babàsekè, babèlùlwile. Kàdi Dìyì dyandàmùke mubidi adi òvwa dipàtùke cintùluntùlu!

³⁶¹ Kabààkanyingalala bwà cinyi? Kabàvwa mwà kunyingalala to. Dìkaavwa kule kutàmbe, dìbà adi. Pa nànkù, bàvwa bamanyè aci, dinyooka adi. BààkaDitèèleja. Bààkasòmbakù mu masangisha ànu bu edi nùnkù nè bààkaDimanya. Nè bàkamanya nè bintu byà baprófeta abu, bìvwbò badiyànjlile kwamba abi, bìvwa munkaci mwà kubàtàngila mumpàla mene, cintu cìvwbò babènge aci. Bààkabènga luse ku maditàmishi bwà musangu wà ndekeelu.

³⁶² Nè paùdi ubènga luse ku maditàmishi, kakwèna cidi cishàale to ànu cilumbulwidi. Paùdi ubènga luse ku maditàmishi; elàngà wèwè ànu meeji pa bwalu abu.

³⁶³ Nènkù’s ke bwòbò abu’s. Kabàvwa kù nè mwaba wà kuyabò to, mwaba wa kupèngamina nànsha wùmwe. Nè Bible mmwambè kaaba aka nè: “Bààkabiikila... Bààkeela mbilà kùdi mbwebwe nè mikùnà, nè: ‘Ponaayi pambidi pèètù, nùtusokòkaayi ku—ku mèsù kwà... nè ciiji cicolè cyà Mwànà wa mùkòòkò.’” Bààkateeta bwà kunyingalala, kàdi Mwànà wa mùkòòkò ùvwa mulwè bwà kunana Bèndè Sungasunga, nwamònu’s. Nènkù bààkeela mbilà kùdi mbwebwe nè mikùnà. Bààkasambila, kàdi masambila awu àvwa malwè dìbà dimanè kupita.

³⁶⁴ Mwanèètù wa balùme, mwanèètù wa bakàji, bwìmpè nè luse lwà Nzambi, mbyolwela bantu. Mpàcidibi nè, Izalèlèlè ùvwa mufofòmijìbwe bwà cyòci eci, bwà apa, munda mvwà bidimu bitwè ku binunu bibidi, bwà kutùpèeshakù twètù mpungà wa kunyingalala. Wèwè ukàadi mudyombòle luse alu anyi? È? Ukàadi mulùbènge anyi?

³⁶⁵ Wèwè udi nganyi’s, twamb’eku twamb’eku? Kùdi mufùme mpenyi? Nè kùyaayà mpenyi? Kwèna mufwànyine kukonka ngàngabukà, kwèna mufwànyine kukonka muntu nànsha umwe pa buloba apa, nè kakwèna mukàndà nànsha wùmwe wùdiku mufwànyine kubala, wùdi mufwànyinekù kukwambila nè wèwè udi nganyi, udi mufùme penyi, nè kùyaayà mpenyi to, pa kuumusha Mukàndà ewu.

³⁶⁶ Mpindyewu, nudi bamanyè’s, wèwè kùyi nè Mashi à Mwànà wa mùkòòkò bwà kwangatawù kaaba kèèbè to, wèwè’s udi umòna kùyaayà mutàngile aku’s. Pa nànkù, piikalàbi—piikalàbi nè Nzambi mmukwenzèlè wèwè cyòci aci, citùdiku twètù bafwànyine kwenza cyà cishàadile nkwitaba cidiYe mwenzè aci. Ke cyònsò cidiYe mutùlòmbe bwà kwenza aci’s.

367 Nènku mwimànyine pa cyòci eci, bu mèmè mwà kutàmba kuya kule, nebikengelè bwà mbwelè mu Cipùpù aci, cyònsò aci, mu disangisha dyà mààlabà dilòòlò. Kàdi bwà mpindyewu ncyèna mwà kucyènza nànsha, ncyènà mwà kutàmba kuya kule to. Ndi mucyènzè kaacimanyinu kaaba aka, kankùrusè nè, “imànyinà apa,” nwamònu’s. Pa nàнку, díbà adi, bidi bikèngela bwà mèmè—mèmè kwindila too nè mààlabà.

Mpindyewu twinyikààyaaku mitù yètù bwà katanci kakesè cyaanàà.

368 Pawikalà kùyì mwenzè nàнку to, wèwè mulunda wanyì wa mushinga mukolè, kùyì—kùyì mwitàbe dinanga dyà Nzambi ewu dīndi mèmè ngàmba adi to! Pawikalà kùyì. . . Tèelejà eci nè ntèma mpindyewu. Pawikalà kùyì mwitàbe dinanga nè luse Lwèndè to, newikalè nè cyà kupicila ku manyooka nè ciiji Cyèndè cikolè.

369 Mpindyewu, wèwè, dilòòlò edi, udi usanganyibwa mu mwaba wòwò wùmwèwùmwè wùvwà Adàmà nè Evà bàsangayibwa mu budimi bwà Edènà awu. Wèwè udi nè bukenji. Udi nè budishikaminyi bwà kusungula. Udi mwà kuya ku Muci wà Mwoyi, anyì udi mwà kwangata ndongamu wa cilumbulwidi. Kàdi, leelù ewu, paùcidiku wa luumvu apa, mucikàlekù nè meeji mu òwò, nè mwikàlekù nè bukolè bwà mubidi bukùmbàne bwà—bwà kujuuka kuulu kuciitaba, bwà cinyì kùyìku wenza aci pawikalà kùyì mucyènzè’s?

370 Kùdikù bantu mwaba ewu bàdi, too nè ku mpindyewu, kabàyi banji kwenza cyòci aci anyi? Byòbi nàнку, udikù mufwànyine kwela cyaanza cyèbè muulu anyi? Amba nè: “Ùnsambidilèku, Mwanètù Branham. Ndi muswè mpindyewu kucyènza. Ncyèna muswè bwà eci kulwaci nànsha.” Mpindyewu vùlukàayi, nwènù balundà bàanyi. . . Nzambi ànùbènèshè. Abi’s mbimpè. Mèmè ndi nè. . .

371 Ewu kí mmwènenu wanyì mèmè wa Cyòci eci nànsha. Ndi—ndi. . . Eci kí ncintù mèmè ngèèla meeji nànsha; eci cyònsò mu kaabujimà kí ncyà cìfùmina kùndi to. Ndi ngambilamù, Nyumà Mwimpè mmucimanyè. Nènku indilaayi, bu Mukalenge mwà kwanyisha, mààlabà dilòòlò, ndi muswè kunùleeja bwalu busokoka bùvwà munkaci mwà kuvùnguluka díbà dyònsò, kaaba aka mene mu disangisha emu. Ndi ngèèla mpatà bikolè bwà nè nudi bacimòne anyì to, nwamònu’s, cidi—cidi cyenzèke aci. Ncintu cidi citèèkùbwe kaaba aka kumpàlà kwènù eku’s. Nè mèmè ndi mutàngile, dilòòlò dyònsò, cyòci eci, bwà kujuukaci, bwà muntu kampàndà wàmbakù nè: “Ndi mucimòne.” Nwamònu anyi?

372 KùCibèngikù to, bu wèwè mwà kuswà, ndi nculòmba; pawikalà kùyì mwena Kilistò to, pawikalà—pawikalà kùyì mwinshì mwà Mashì to, pawikalà kùyì mulediibwe cyàkàbidi, muujiibwe tètè nè Nyumà Mwimpè to.

373 Pawikalà kacya kùyiku mwanjì kwenza dijikula dyà patòòke dyà—dyà Yesù Kilistò, ku diikala mubàtijiibwe mu Dìna Dyèndè, bwà kufila bujaadiki bwà lufù, dijiikiibwa nè dibìshiiibwa Dyèndè dyà ku lufù, bwà nè wèwè witàbì to, màyi ngaà malongolola. Mbaabà bindile. Mizàbì yidi yifidiibwa kaaba aka, nè byònsò mbilongolola.

374 Kilistò mmwimàne mwindile, nè dibòko dyolola, bwà kukwakidila. Mu dībà òmwè kubangila nku mpindyewu, luse alu ndufwànyine kubènga kwalabajiibwa too nè kùdi. Udi mufwànyine kulubènga bwà musangu wà ndekeelu; kalwàdyàkulengakù cyàkàbìdì mwoyi wèbè to. Paùcidiku nè mùshindù apa, paùcidiku nè mùshindù apa, bwà cinyi kùyiku ucyènta? Mpindyewu pàcìdi . . .

375 Ntu mumanyè mùshindù wà ciibidilu, wà cilèlè wà nè, nkubìikidila bantu ku cyoshelu. Tutu twenza nànkù awu, nè aci cìdi ànu cìmpè menemene. Pa dībà edi, tudi batàmbe kuula tètè kaaba aka, mu nyùngulukilu wa cyoshelu mene, mu mùshindù wà nciyiku mufwànyine kucyènta nànsha.

376 Kàdi ndi muswè kwamba nùnkù ewu. Mu matùkù à bàpostòlò, bàdi bamba nè: “Búngì bwònsò bwàkiitabuujàbo abu bààkabàtijiibwa.” Nwamònu anyi? Pawikalà ànu nè mùshindù, wambilamù, munda mwà mwoyi wèbè amu’s! Cyònsò cidiku ncyòci eci. Kí—kí ndisaluka nànsha, nànsha mùdìbì nè disaluka dítu dyènda naaci. Ànu múnkaadi mwambàmbe nè, dinwà dyà mfwankà nè dinwà dyà maalà kí mmpèkaatù to; ncyàmbiibwà cyà mpèkaatù; cidi cileeja nè kwèna witabuuja to. Nwamònu anyi? Kàdi wèwè witabuuja bulelèlè munda mwà mwoyi wèbè, nè mumanyè cyòci aci mwikàle mwimànyinepù, mwaba wùdi musòmbe awu, wèwè ucitaba nè mwoyi wèbè wònsò, cintu kampànda necyènzekè mwaba awu mene. Necyènzekè.

377 Dībà adi udi mwà kwimana bu ntèmù waci nè, cintu kampànda ncyènzèke. Dībà adi asà lwendu mutàngile ku màyi, ambà nè: “Ndi muswè kuleeja disangisha, ndi muswè kujaadika, ndi muswè kwenza bwà bujaadiki bwànyì bwimanè nè, mèmè nèngàngatè kaaba kàànyì pàmwè nè Mukàji-musèla. Ndi mwimàne kaaba aka mpindyewu mbwà kubàtijiibwa.”

378 Ndi mumanyè nè kùdi bakàji bàbúngì pa buloba dilòòlò edi, bakàji bàà maalu mimpè, kàdi kùdi umwe udi munsamìne mwoyi bikolè. Kùdi umwèpelè wa kùdìbo udi mukàjàànyì. Yèyè awu ùtu wàlukila naanyì kumbèlu. Kàvwa mukàjàànyì to, kwònsòkwònsò eku; kàdi mùshindù wùdiye mulwè mukàjàànyì, mmwangàte dīna dyànyì.

379 Yèyè ùlwalwa. Kùdi bakàji búngì cyanààna, maèkèleeziyà, pa buloba, kàdi Yèyè ùdi ùlwila Mukàj’Èndè. Ùdi ùbìikidiibwa ku Dìna Dyèndè. “Aba bàdi mu Kilistò Nzambì neàye naabò pàmwè Nèndè.” Tudi tubwelaMù bishi? “Ku Nyumà umwe nkutùdi bwònsò babàtijiibwe mu Mubidi wùmwe.”

380 Mpindyewu patùcìdì tusambila apa, wêwè pèèbè, sambilà. Ní mmunda emu ní mpambèlu, kùdì tusùmbù tunènè twà bantu mu bibambalu, pambèlu, biimàne mu nyùngùlukilu emu, pambèlù mu misèsèsù mwàmwa. Kàdì mpindyewu panùcìdì—panùcìdì . . . Katwèna mwà kunùbiikila ku cyoshelu eku to. Kàdì, mwoyi wènù, wènzàayi cyoshelu. Nènku ànu mu mwoyi wèbè mene amu, ambà nè: “Mukalenge Yesù, ndi mwitàbùùje Cyòcì eci. Mwva mushààle mwimàne kaaba aka mu kapeepà kàà bufùku aka. Mwva nè mweyelu mupàtakaja, mu kaacibambalu kakesè aka. Mmémè ewu musòmbe kaaba aka, munkacì mwà bantu aba. Ncyê—ncyê—ncyê—ncyê—ncyèna muswè kwikala . . . Ncyèna mwà kupangila nànsha; ncyènakù mwà kwitaba bwà kupangila nànsha.”

381 Byònsò, mungánwàmbìdì makèèlèlè dilòòlò amu, nè, ndi ngambilamù, Mukalenge mmumanyè nè ndi ngàmba Bulelèlè. “Ncyèna ndinga nànsha,” mwàkambà Pòlò. Cìkèèna—kumòna aci, anyì cyònsò cìvwàci aci; mwva mwimàne mwaba awu, kutàngila, nè kulenga bantu bàkaavwà bayè abu nè byanza, biikàle byà cyà bushùwà ànu mündi mwimàne kaaba aka mene emu. Kùcìpangìdìku to, wêwè mwanèètù wa balùme anyì wa bakàjì mukwàte nè byà luse awu; kwenjìku nànkù to. Ndi mumanyè nè ukàadìkù mutèèlèjètèèlèje mayiisha, mutèèlèjètèèlèje *cikampànda*, *cikansanga*, nè tuumaalu tulonda, byònsò abi. Kàdì lekèlè . . . Anjì tèèlejà. Bwànyì mèmè, eci cìdì . . . Ndi mumanyè nè cìdì Bulelèlè, wamònu’s. Udi wêwè ànu . . . Mèmè ncyê—ncyè—ncyèna mwà kucitòòkesha kutàmba apu to, wamònu’s. Kùcìpangìdìku to. Cìdì cyònsò bwèbè wêwè.

Mpindyewu túsambilàayi.

382 Mukalenge Yesù, kumpàlà kwànyì eku kùdì kashèètè kàà mishwalà yìdì yìleeja babèèdì. Pàndì nyisambidila apa, nyitentekela byanza, mùdì Bible mwàmbè nè: “Bàvwa bàngata mishwalà nè tulùlù, byumusha pambidi pàà Pòlò, nyumà yà makooyà yìvwa yìpàtuka munda mwà bantu, nè bimanyinu binène bìvwa byènzeka.”

383 Mbwalu, bààkamòna Pòlò, bààkamanya nè Nyumà wa Nzambì ùvwa munda mwèndè. Bàvwa bamanyè nè yèyè ùvwa—yèyè ùvwa muntu wa pabwèndè, nè, maalu àvwàye wàmba, pa bìdì bitàngilà Díyi. Ùvwa mwà kuya kangata mwákù wà kale wà cyena—Ebelù wà èkèleeziyà wa beena Ebelù, nè ùwùvwija nè mwoyi, nè ùwùtèeka mu Kilistò. Bààkamanya nè Nzambì ùvwa munda mwà muntu awu. Pashùshe bààkamòna Nzambì wènzela kùdiye byenzedi byà pabwàbì nè byà bukolè, ùdyanjila kwamba bintu nè biikàle byènzeka mùshindù awu, nè bààkamanya nè ùvwa musadidi wa Nzambì.

384 Mukalenge, ndi ndòmba bwà Ùtwekù bantu aba musinga bwà kaneemu kààbò bwà Díyi, nè bõndòpèku bwà bwalu bwà Yesù. Mu batèèleji emu, Mukalenge, mmusòmbe bantu,

ditùkù dyà ndekeelu, dibì edi, bu mutùdi bamanyè nè tudì ànu nè cikondo cìpì. Nè Èkèleeziyà mmufwànyine kuya pa dibà kanà dyònsò.

³⁹² Mwànà wa mùkòòkò mmufwànyine, pa dibà kanà dyònsò, kuumuka mu mwaba wà cijila muulu Mwàmwa, anyì pa Nkwasa wa butùmbi wa mulàmbù, kuumuka pa Nkwasa wa butùmbi wa Nzambì pàdì mulàmbù wùsanganyiibwa, nè dibà adi kwàjiki; kakücyèna kàbìdì ditèkemena bwà buloba to; bwàbù mbujikè. Dibà adi bùdi bùbwela mu dilubakana, dyà tutombòtombò tunènè twà dizakala dyà buloba, nè—nè dinyùkushiibwa dinène mwàkenzekabì ku dibìishiibwa dyà ku lufù amu. Nè—nè, kùdì—kùdì. . .

³⁹³ Mwàkajuukà Kilistò mu lukità amu, pàajuukà bansantu, cintu cìmwècìmwè aci necyènzekè. Mukalenge, s'ncifwànyine kwenzeka mu kasunsa kanà kònsò. Tudì bindile ditùkù dyà disànka adi bwà kulwadì.

³⁹⁴ Mpindyewu, angàtaku bânà Bèèbè mwinshì mwà dibòkò Dyèbè, Taatù. Kòkelàku twànà Twèbè twà mìkòòkò tukesè atu mu cyàdì Cyèbè. Enzàku nànkù. Nè bàdiishèku nè Dìyì, too nè mwàpetàtu dikàndà bwà mudimu. Tudì tubàfila Kùdì mpindyewu, Mukalenge. Andàmùnàku disambila edi.

³⁹⁵ Wèwè wákamba, Taatù, mu Maakò, nshapità wa 11 nè: “Panùdì nusambila, biimàne munkaci mwà kusambila, itàbùùjaayi nè nudi nupeta cinùdì nulòmba aci, nè nenùcipetè.”

³⁹⁶ Nènku nè mwoyi wànyì wònsò kùdì Ewu udi ubuulula bintu ebi munda mwà bidimu byònsò ebi, nè Bitampì ebi mu lumingu lwà ndekeelu elu awu; ndi nKwitabuujà, Mukalenge Nzambì nè, ke dibà mene, diseemène mpindyewu, diseemène kutàmba nè cyà bushùwà mutùdi twètù tudyèlela meeji, bwà diseemena Dyèbè.

³⁹⁷ Swàkù bwà disambila dyànyì dyàndamunyiibwè. Nè swàkù bwà mwànà yònsò wa Nzambì udi mubiikidiibwe, udi usanganyiibwa mu ntàntà wa byùmvwikila kaaba aka, anyì wíkala mukàbà wà mēyì mwà kulenga awu, swàkù bwà pa dibà adi. . . Ndi mmunana bwà Bukalenge bwà Nzambì, mwimànyine pa kumanya kwà nè edi n'Dìyì didì munkaci mwà kubuuludiibwa. Bukènkè bwà dilòlòlò bùkenkèku, Taatù. Ndi mbàfila Kùdì, mu Dìnà dyà Yesù. Amen.

³⁹⁸ Mpindyewu, yònsò, munda anyì pambèlu, udi witabuujà, kàdi kacya kùyiku mwanjì kwenza dijìkula dyèbè—dyèbè dyà patòòke dyà nè, udi mujikijàngàne nè mpèkaatù; nè udi—udi muswè luse lwà Nzambì, walwitàbùùjì mu Yesù Kilistò. Ciinà cyà màyì. . . Nebùikalè badìlongòlòle bwà kubàtiiza muntu kanà yònsò udi muswè kubàtijiibwa awu, leelù anyì mààlabà, mpindyewu mene anyì dibà kanà dyònsò didìci mwà kwenjiibwa adi.

³⁹⁹ Cìtampì Cìisambòmbò cìdì cinùsànkisha anyì? [Disangisha didì dyàmba nè: “Amen.”—Muf.] Nudi bamòne mwaba wùdìCi

cikàngùdiibwe mpindyewu awu anyi? [“Amen.”] NwaCítàbùùjì anyi? [“Amen.”]

400 N’Cyâmbè nè: “Witàbùùjì mulubù wètù nganyi? Nkùdì nganyi kùdiku dibòkò dyà Mukalenge dibuulùdiibwe?” Nwamònu anyi? Itàbùùja mulubù, dîbà adi dibòkò dyà Mukalenge ndibuulùdiibwe. Dibòkò, Dìyì dyà Nzambì, ndibuulùdiibwe.

401 Bu Mukalenge mwà kwanyisha mpindyewu, mààlabà mu dindà, nêngënzè nè mwànyì mwònsò bwà kwandamuna ku nkonko ayi. Nêmpicishèku pàmwàpa dilòòlò dyònsò, nè, anyi pàmwè nè dyònsò, mu disambila, pa yòyì ayi. Ndi ndala bu dîbà òmwe anyi too nè ku àsàtù bufùku bwònsò. Makèèlèlè dilòòlò ncìvwakù mukalàale to ànu pépi ne dîbà ùmwè, nè pa dîbà isàtù nkààvwa mu dilonga. Nwamònu anyi? Nwamònu anyi?

402 Nebikengelè bwà mèmè kulumbulula bwà cyòci eci. Ncyà bushùwà. Tukàadi pabwìpi menemene katwèna mwa kwitaba cintu kanà cyònsò, lukutukutu kanà lwònsò, anyi didìcinkila kanà dyònsò, anyi diitabuuja kanà dyònsò dyà dishiikile mu njila to. Bikèngela ngànji ncìmònè, dyàmbedi. Nè pashiishe, pàndi ncimòna, bikèngela cìikalè mu Dìyì, kàbidi. Nènku too nè mpindyewu, ku ngàsà wa Nzambì, bìdì ànu menemene. . . Ndi mubyàngàte kubangila ànu ku ntwàdijilu too nè ku ndekeelu, nudi bamanyè nànkù, nè byòbi—byòbì mbinwàngàne.

403 Bìdì bikèngela bwà kwikalaci EMU MMÜDÌ MUKALENGE WÀMBA. Bwalu, kabyèna ànu mùdìci nè cìdì cìCyàmba mùndì mèmè muCimanyè, mèmè mwinè to, kàdì Dìyì dyà Mukalenge didi EMU MMÜDÌ MUKALENGE WÀMBA. Kàdì’s Dìyì ndyòdì edi, ngàngata cìdìYe mumpèèshe, nè mwikàle nCìnwàngaja nè nnùleeja. Pa nànkù nudi numanya, nwènù biinè nè, cìdì EMU MMÜDÌ MUKALENGE WÀMBA. Nwamònu anyi?

404 Dìyì ndyòdì edi, dyàmba nànkù. Nè pashiishe dibuulula didìYe ùmpèèsha adi, dibèngangana nè cìkaavwàku yònsò wa kutùdì mwelèèle meeji aci; mòna’s, dibèngangana nè cìnkaavwàku mèmè mwelèèle meeji aci, bwalu kacya mèmè ncìtukù mubwelèMu mùshindù awu nànsha. Kàdì patùdì twakulangana apa, tudi tusangana nè, bìdì bìnwàngana ànu menemene. Nènku Cidi ncinyi? Cidi ng’EMU MMÜDÌ MUKALENGE WÀMBA. Nwamònu anyi? Cidi ànu mu cyòci menemene. Wùvwa mmwaba wùvwà bwàshi, kacya wàshààla mwaba awu, too nè pa dîbà edi, nè pashiishe Mukalenge ùlwa ùCisàka munda mùshindù awu. Pa nànkù, nudi numòna’s, s’kì Cyòci aci. Cidi—Cidi m’Mukalenge. Kaa, ndi muMunangè’s wè! Ndi muMunangè nè mwoyi wànyì wònsò.

405 Mpindyewu vùlukàayi nè, nudi. . .Katwèna bapetè mùshindù wà kufika ku cyoshelu to. Bààbùngì bàvwa beelè byanza byàbò muulu. Mpindyewu, nwamònu’s, mbwalu bwà

muntu nkààyà, bwèbè wêwè. Ncyônsò cyûdì wêwè muswè kwenza aci. Nwamònu anyi?

406 Dìbà dikaadi pabwìpi menemene mu mùshindù wà nè, bìvwa bikèngela bwà wêwè kukolesha bikolè nè mwèbè mwônsò, kabiyi bikèngela bwà kwikalabò bàkukòka nànsha. Nwamònu's, mwikàle ànu ukolesha, uditàcisha bwà kubwela nè: "Mukalenge, kùndekèdiku pambèlu to. Kùnshiyikù pambèlu to, Mukalenge. Biibi nyewu bikaadi binjidika; bu mèmèku mwà kubwela's!" Nwamònu anyi?

407 Nzambi neinjilè ciibi dīngà ditùkù. Wàkinjila mu ditùkù dyà Noà, nè bààkatuuta ku ciibi. [Mwanèètù Branham ùdì ùtuuta bintu pa cyambilu misangu milondàngàne—Muf.] Ncyà bushùwà anyi?

408 Mpindyewu vùlukàayi nè, Bible mmwambè, nè: "Mu cilù cyà mwandamutekètè." Mmwòmò anyi? Bàmwè bààkaya mu tulù mu cilù cyà kumpàla, ciibìdì, ciisâtù, ciinâyì, ciitânù, ciisambòmbò, cyà mwandamutekètè. Kàdi, mu cilù cyà mwandamutekètè, kwàkalwa diyì dikòbola dyà patòoke, lubilà nè: "Mubàki nyawù ùlwa! Pàtukàayi nùkatwilàngànè Nendè."

409 Virgò mikùtākàne yākamba nè: "Ambàayi tūng, ndikù muswè kupeta ndambù wa Maanyi awu mpindyewu's."

410 Mukàji-musèla kwamba nè: "Mémè ndi naawù búngì bukùmbàne ànu bwànyì mèmè mwinè; ànu naawu búngì bukùmbàne. Wêwè uÀkèba, ndà ùkasambilè mufwilekù bwà kuÀpeta."

411 Kanwènaayikù bamòne virgò mukùtākàne awu mpindyewu anyi? Tàngilàayi ba-Épiscopaliens, ba-Presbtyériens, ba-Luthériens, nè bikwàbò byònsò, mùdibo bàteeta kwenza nànkù. Nè lutàtù lwàbì lùdì nè, pamutù pàà kuteeta bwà kupeta Nyumà Mwimpè, bwòbò bàdi bàteeta bwà kwakula mu myakulu.

412 Nè bàà kùdibo búngì cyanàànà bàtu bààkula mu myakulu, kàdi bùmva bundù bwà kulwa ku èkèleeziyà ewu bwà kubàsambidilabò; mbaswè bwà mèmè kuya ku mbànzà yàbò bwà kubàsambidila. Aci nudi nucibiikila nè n'Nyumà Mwimpè anyi? Aci's ndyakula dyà mu myakulu, kàdi kí n'Nyumà Mwimpè nànsha. Nwamònu anyi?

413 Mpindyewu, mèmè ntu mwitabùuje nè Nyumà Mwimpè ùtu wākula mu myakulu. Nudi bamanyè nè ntu mwitabùuje nànkù, nwamònu's. Kàdi, kùtu ditentula dyà Yèyè awu kàbìdì's. Èyowà's, mukalenge. Ma—mamuma à Nyumà, cìdì cijaadikà cìdìYe. Bimuma byà mucì mbitù bijaadikà nè mmùshindù kaayi wà mucì awu. Kí ncizubu nànsha; cimuma!

414 Mpindyewu mōnaayi's, dībà adi, pààkalwàye apu, ndībà dyà ndekeelu adi—adi. Nè mwaba awu, pààkabwelàbo apu, pashiishe bààkaya kwamba nè: "Èè, ndi ngèèa meeji nè ndi

Nendè mpindyewu. Ndi ngèèla meeji nè ndi Nendè. Èyowà's, tudi munkaci mwà kuMupeta.”

⁴¹⁵ Mbipiciibwe nè mèmè—mèmè—mèmè ncìyì mwambè cyòcì eci to, nwamònu's, bwalu ncifwànyine kufila cibwejàkàjì. Pàmvwà mwambè ditùkù adi, bwà Dyambwibwa, mùdìDi difwànyine kwenzeka, mvwa—mvwa... Mpindyewu, nwènú bambè nè ne—nenùcìtwàlè, mbîmpè. [Disangisha didi dyamba nè: “Amen.”—Muf.] Tàngilàayi bîmpè. Tàngilàayi bîmpè. Èyo, aci ncínùtàngile.

⁴¹⁶ Pàvwà virgò mukùtākàne awu, nwamònu's, uvwa udyàmbidila nè ùvwa musambile mufwilekù awu, bwà kwalukila, Mukàjì-musèla ùkaavwa mumanè kuya. Dìkaavwa dyenzèke, kàdi yèyè kàyi mucimanyè to; mùdì mwívi butùkù's. Dìbà adi ke kubangabò kutuuta bintu ku biibi. Kàdi ncinyi cyàkenzekà? Cyàkenzekà ncinyi? Bàakeedibwa mu cipungu cyà Dikènga dinène. Bible mmwambè nè: “Nekwìkalè myadi, nè kutwà kwà mikèmù, nè kusùmakaja kwà mènù.” Mmwómò anyi?

⁴¹⁷ Nedyènzèkè dìbà kaayi, mwanèètù wa balùme, mwanèètù wa bakàjì, mèmè ncyèna mumanyè to. Kàdi, ndi—ndi, mèmè, bidi mwà kwenzeka nè ciikalè ànu mèmè mwaba ewu, mpindyewu, nwamònu's. Eci, eci ke cìdì... Eci mmeeji àànyì mèmè. Nwamònu anyi? Mèmè—mèmè—mèmè ndi ngiitabuuja nè dikaadi pabwìpi menemene, ndi—ndi... Ditùkù dyònsò ndi—ndi muswè... ndi ànu nditácisha bwà kwenda nè lutuùlù nè mwànyì mwònsò. Nwamònu anyi? Nènku mpindyewu nè ndìbà kaayi, nudi bamanye's, diikalà... .

⁴¹⁸ Cintu kampànda ncyenzèke leelù ewu, nè mvwa mumòne cintu kampànda cibànda. Ncìvwakù—ncìvwakù ànu... Ncìvwakù mwà kukwàta kàbidì mweyelu to, nwamònu's. S'ki Yèyè wàwa, mwimàne mwaba awu, Bukènkè bukesè abu búsanganyiibwa mwaba awu mene. Nè ki Bwòbù bùvwà apa ebu. Ndi mumanyè nè m'Bulelèlà.

⁴¹⁹ Mèmè kudyàmbidila nè: “Éyì Nzambì, ncìvwakù mufwànyine kwamba nànkù to. Ncyèna—ncyèna mwà kwamba nànkù to. Ncyèna mwà kwamba to.” Mèmè kumbà kupàtuka ànu mu cibambalu amu, kuya pambèlu, ngenda ntwa eku ntwa eku. Mwanèètù, mèmè kudyàmbidila nè: “Ekèlekèlè! Cìndì mwà kwenza ncinyi? Kaa!” Nwamònu anyi? Kàdi pààbì bikèngela bwà mèmè—mèmè kuya ku dilòba, anyi cintu kampànda, anyi ndi... Balùmyànà, nudi bafwànyine... nudi... ncyèna mwà kunwàmbila to. Nwamònu anyi?

⁴²⁰ Pa nànkù, tudi tupicila mu cikondo cyà dicyònkomoka, kí mmwómò anyi? Mukalenge àtumbishiibwè! Amen! Nwamònu anyi? Tudi mu—tudi mu cikondo cilenga cyà dikèma, nwamònu's, bwalu mwoyi wànyì mmùle tètè nè musàngeelu nè disànkà byà biyiila nè panshi.

421 Kàdi pàndi ngèèla meeji ku buloba ebu nè binunu byà bantu bândi mumanyè nè mbajimine, babwikila kùdi mundidimbi mufiike, hum, díbà adi mwoyi wèbè mwikàle ànu wùzànyika mashi. “Cyùdi mwà kwenza ncinyi? Cyùdi mwà kwenza ncinyi?” Udi ànu ùmvwa mùdi Nyumà Mwímpè wèla mbilà mikolè, munda mwà mwoyi wèbè amu. Mùvwàbi nè cyà kwikala byenzèke munda mwà Mukalenge wetù, pàakatàngijàYe mèsù pa Yèlusàlemà, cisàmbà Cyèndè Sungasunga, nwamònu’s, wàmba nè: “Yèlusàlemà, Yèlusàlemà, mmisangu búngi kaayi yínkaadiku Mémè ewu muswè kukukùngwija, mùdi nzòòlò wa cikuka mwà kukùngwija twànà twèndè, kàdi wèwè kwàkaswà to.” Wèwè udi ànu ùmvwa Nyumà Mwímpè wàmba nè: “Mmisangu búngi kaayi yínkaadiku Mémè ewu muswè kunùkùngwija, nwamònu’s, kàdi nwènu kanwèna baswè to.” Nwamònu anyi?

422 Tudi, tudi kaaba aka mene pabwìpi nè cintu kampànda, nwènu balundà bàanyi. Ní ncinyi ciinè aci, Nzambi ngudi mumanyè. Muntu nànsha umwe, muntu nànsha umwè kí mmumanyè díbà diikalàci mwà kwenzeka nànsha. Aci’s mmùnsokòntù. Muntu nànsha umwè kí mmumanyè díbà diikalàci mwà kwenzeka nànsha.

423 Kàdi Yesù mmutwámble nè: “Panwàmònà bintu ebi, bintu byònsò ebi.” Ànu múngènjì amu, mpàlakaja Cìtampì Cìisambòmbò, nè cìdiYe mwambè mu Maatàayi 24. Mpindyewu vùlukàayi cìdiYe mwámbe aci nè: “Panwàmònà bintu ebi bìlwa, bíbanga kwenzeka, díbà adi cikondo cikaadi ku ciibi.” Tàngilàayi nùmonè mvensà mene udi ulonda awu, mvensà wa 30—wa 30 nè wa 31 awu patùdi batùngùnùke nè kuya too nè kwìnshì, mvensà wa 32, wa 33.

424 Mmwámbe nè: “Nè Yèyè neatumè banjèlò Bèndè ku ntengu yinaayi yà maulu, kùdi mpeepèlè yinaayi, bwà kukùngwija Basungula Bèndè.” Mmwòmò anyi?

KwambaYe nè: “Mpindyewu yiilàayi . . .”

425 Mpindyewu vùlukàayi nè, Yèyè wàkiimanyina ànu mwaba awu. Kàakatùngunukakù to, paanyimà pàà Cìtampì Cìisambòmbò aci. Yèyè kàakambakù kantu nànsha kàmwe pa bidì bitàngilà cyà Mwandamutekètè to. Wákamba cyà Kumpàla, Ciibìdì, Cìisàtù, Ciinàyi, Ciitànù, Cìisambòmbò. Kàdi kwimanyinaYe mwaba awu, kàyiku mwámbe kantu nànsha kàmwe pa bidì bìCìtàngilà to.

426 Tàngilàayi cintu cyákambàYe cìvwà cìlondà: “Mpindyewu yiilàayi lusùmwinù.” Nwamònu anyi? Pashiishe Ùdi ùbangila pa lusùmwinù. Yèyè nè: “Bintu ebi nebyènzèkè.”

427 Ùdi munkaci mwà kwandamuna ku nkonko yàbò yisàtù ayi. “Ncinyi ciikalà . . . bimanyinu ebi? Nè ncinyi ciikalà cimanyinu cyà Dilwa Dyèbè? Ncinyi ciikalà cimanyinu cyà nshìikidilu wa buloba?”

428 Nè Ciisambòmbò Aci, mwaba awu, cìvwa nnshùikidilu wa buloba. Nè mwadi wà mpungi wa mwanjèlò wa mwandamutekètè... “Wàkeela byanza muulu, wàkadicipila ku Ewu udi nè mwoyi kashidi nè kashidi nè, cikondo kacýàkwikalakù kàbìdì to.” Buloba bùdì munkaci mwà kulela bupyabùpyà. Kwàjìkì.

429 Nènkù's ki twètù aba, ku ciibi eku mene. Kaa, mèmè's ndi nzàkala. “Kàdì cìndì nè cyà kwenza ncinyi's, Mukalenge? Ncinyi—ncinyi cikwàbò cìndì mwà kwenza?” Nwamònu anyi? Nènkù, dìbà adi, elààyaaku ànu meeji à kumòna mwaba awu nè bantu bàà mushinga mukolè abu's! Mvwa mwimàne mwaba awu, munkaci mwà kuditàngila. Ke mèmè kudyàmbidila nè: “Éyi Nzambi, mòna's, eci kacýènakù mwà kubàpìta bwòbò—bwòbò to. Bìvwa bikèngela bwà mèmè—mèmè—mèmè kubàsàka. Bìvwa bikèngela ànu bwà mèmè kwolola cyanza mu batèeleji nè kubàkwàta, nè kubàsàka.” Kwèna mwà kwenza nànkù to. Wèwè... .

430 “Nè muntu nànsha umwe kèna mwà kulwa pàdì Taatù Wanyi kàyi mumukòke nànsha.” Kàdì busàmbì bùmwèpelè butùdìku twètù naabù mbwòbù ebu: “Bwònsò bàdì Taatù muMpèeshe nebàlwe.”

431 Kàdì bakwàbò bàà kùdìbo abu, biikàle nè malongolodi awu, bakùùkilekù mwoyi mùshindù awu, nwamònu's. “Nè wàkaseswisha bwònsò bàvwa bàsanganyiibwà pa, basòmbèle pa buloba, beana mènà àvwà kàyi mafunda mu Mukàndà wà Mwoyi wà Mwànà wa mùkòòkò awu, wàkashebeyiibwa kacýa ku difùkà dyà dyulu nè buloba.” Kaa, ekèlekèle! Pa nànkù, nudi numòna's, s'ncintu cyà dibungama's.

432 Cintu cìmwèpelè cyùdìku mwà kwenza cìdì ànu—ànu—ànu—ànu kushààla kacýa wàlamatangana nè Dìyi. Tàbaleelà wèwè ànu cyònsò cìdìYe wàmba bwà kwenza aci, nè dìbà adi kwenza cyòci aci. Nwamònu anyi? Cyònsò cìdìYe wàmba bwà kwenza aci, enza cyòci aci.

433 Nènkù udi utàngila kwàka, wamba nè: “Kaa, ekèlekèle! Bàdì bènza *cikampànda*, pashiishe... . Kaa!” S'cìdì ànu... .

434 Kanwèna numanya nè ndilubakana kaayi to! Mpindyewu ndi muswè kwamba nùnkù. Ndi ncinka nè mikàbà yà mèyi mmiimanyika. Bantu bààbúngì bàtu bàmba nè: “Mwanèètù Branham, mwikàle nè mudimu wà bwambi wà mùshindù awu...” (Bikèngela ngùikalè mutàbàle, bwalu bantu bàtu ànu bàngata mikàbà yà mèyi ayi ànu bwà kukèbamù tuntu twà dyamba, nudi bamanyè's.) Pa nànkù pàdìbo bàmba nè: “Mwanèètù Branham, tuvwa kujingaku kwikala ne mudimu wà bwambi,” kwèna mumanyè cyùdì wamba aci to. Wèwè, bwà kwamba nè meeji matòòke, kwèna mumanyè cìdì cyènda naawù to, wèwè mwanèètù wa balùme, mwanèètù wa bakàjì. Kaa, ekèlekèle! Kàdì bujìtu bùdì wambula's, paùdì nè bantu bàdì

kacya bashààle ànu bààkwàta ku byúdi wamba abi! Wavùluka nè, wèwè mubámBILE cintu cyà mashimi, Nzambi neàlombè mashi àbò ku byanza byèbè. Dìbà adi, elàngànà meeji pa cyôci aci. S'ncintu cyà bwalu bukolè.

⁴³⁵ Pa nàнку, ikàlà nè musàngeelu. Nangà Yesù nè mwoyi wèbè wònsò. Ikàlà ànu ulond- . . . Ikàlà mupwekèle. Kwikadikù ùteeta—uteeta bwà kudifwànyikijila cintu nànsha cìmwè to. Ikàlà wèwè ànu mupwekèle, kumpàlà kwà Nzambi. Bwalu, paùdi ànu utàmBA kuteeta bwà kudifwànyikijila apu, ki paùdi utàmBA kuseemena uya kule Nendè. Nwamònu anyi? Mwitàbùùje wèwè ànu cyanààna.

Wèwè udi wamba nè: “Mpindyewu, èè, Yèyè neàlwe dìbà kaayi?”

⁴³⁶ Bu Yèyè mwà kulwa leelù, mbìmpè. Bu Yèyè mwà kulwa mu bidimu makùmi àbidi kuumukila ku mpindyewu, bidi kàbidi ànu bìmpè. Nèngiikalè mwà kuya ngènda ndonda ànu njila ùndi ndonda mpindyewu ewu, ngènda mMulonda. “Mukalenge, bu Wèwè mwà kukwàta naanyi mudimu mwaba kanà wònsò, mmémè ewu, Mukalenge.” Bu cyôci mwà kwenzeka mu bidimu lukàmà kuumukila ku leelù, bu biikùlù bàà biikùlù bàà biikùlù bàà biikùlù bàà bankàna bàànyì mwà kwikala bàcidi nè mwoyi too nè ku dicimònà cilwa, lekèlè. . . . “Mukalenge, ncyèna mumanyè nè necyènzekè dìbà kaayi to, kàdi lekèlaku ngèndè ànu mululàmè leelù, mwikàle ànu Neebè.” Nwamònu anyi? Ndi—ndi muswè. . . . Bwalu, mémè—mémè nèmbiikè ku lufù mu ditùkù adi, ànu mùshindù wùmwèwùmwè awu bu nè mvwa mwangàte kalù kakesè mu mwaba kampànda.

⁴³⁷ Ngènda mpweka kuntu aku, nzùbu wa butùmbi wa bukalenge udi dyàmwàmwa wàwa, Bukalenge bwà Nzambi abu, mwikalà bakùlakàji bwònsò baalùkile bansongà, mùdi mìzàbì mitòòke mimana kuvwàla's wè! Balùme nè bakàji mbashintùlùke, mu bulenga, dipiluka mene dyà—dyà—mulùme mulenga nè mu—mukàji mulenga's! Biimàne mwómò amu mu bulenga bwònsò nè mu cipidi cyà nsongàakàji nè nsongàalùmè, biimàne mwaba awu's! Nè kabàyiku mwà kukùlakaja nànsha, kabàyiku mwà kwikala nè mpèkaatù nànsha, kabàyiku mwà kwikala nè cintu pààci nè mmukàwù, anyi lukinù, anyi ní ncinyi nànsha! Kaa, ekelekele!

⁴³⁸ Ngèela meeji nè mikàbà yà méyì mmiimanyika mpindyewu. Nè mémè—mémè ndi ànu nè tusunsa bu túsàtù anyi bu tùnaayi nàнку. Ndi muswè kwakulakù neenù. Mbìmpè nàнку anyi? Mpindyewu, eci cidi ànu cyà cìntàngila mémè nkààyaanyi, nwamònu's. Mbwalu, mààlabà, ndi—ndi. . . . Neciikalè cintu cyà dikèma! Mbipiciibwe mene ànu nè mémè mucyàmbè mpindyewu, nwamònu's, cìngiikalà mwà kwamba aci. Ndi. . . . Eci cidi ànu bwètù twètù mpindyewu. Mvwa ànu. . . .

439 Nudi bamanyè's, ndi—ndi nè mukàjì ùndì munangè, mwinè awu m'Meda. Nè mèmè—mèmè mwinè ncivwakù mwà kwikala nànsha mumusèle to, bwà dinanga dyànyì bwà mukàjàànyì wa kumpàla. Kàdi nànsha nànkù, nànsha mùdìbi nè mvwa mumunange, mèmè—mèmè ncivwakù mufwànyine kwikala mumusèle to bu kabùyì bwà Nzambi ùvwa mungambile bwà kucyènza. Nè nwènù nudi bamanyè bwalu abu; mùshindù wàkaditwàye mu disambila, nè mùshindù ungààkenzà. Ke pashìshe Yèyè kungambila ànu menemene civwà cikèngelà kwenza, nè: “Ndà, ùkamusèlè,” nè cikondo menemene cyà kucyènza. Yèyè's mmukàjì mulenga. Nè ùdi munkaci mwà kunsambidila dilòlòlò edi. Nè pa nànkù mpindyewu bàdi díbà mwandamukùlù jaajaaja, kwètù aku, ùdi pàmwàpa munkaci mwà kunsambidila patùdì twakulanagana apa.

440 Mpindyewu mònayì's. Dìngà ditùkù kungambilayè, wàmba nè: “Bill,” mwàkambàye, “ndi muswè ànu bwà nkwelèku lukonko pa bìdì bitàngilà Dyulu.”

Mèmè kwamba nè: “Èyo, Meda, lùdi bìshi?”

Yèyè nè: “S'udi mumanyè nè ntu mukunangè.”

441 Ki mèmè kwamba nè: “Èyowà.” Cìvwa mpaanyimà menemene nè cyòci eci cimanè kwenzeka kaaba aka.

Yèyè kwamba nè: “S'udi mumanyè nè, Hope ùvwa pèndè mukunangè.”

Mèmè kwamba nè: “Èyowà.”

442 Ki yèyè kwamba nè: “Mpindyewu,” mwàkambàye, “mèmè ncyèna ngèlè meeji nè ndi mufwànyine kwikala nè mukàwu to,” yèyè nè, “kàdi Hope yèyè ùvwa naawù.” Ki yèyè nè: “Mpindyewu, patwàyà mu Dyulu. . . Nè wèwè nyawù uvwa mwambè mùvwà mumumònemù.”

443 Mèmè kwamba nè: “Ùvwamù, mvwa mumumòne.” Nkàadi mumumònemù misangu yìbìdì, ùdimu. Mmungindile bwà ndwe. Kàbìdì ne. . . Nè Sharon pèndè. Mvwa mumumòne, ànu mùshindù wùmwèwùmwè wùndì nnùtàngila nwènù aba ewu. Mvwa mumumònemù. Nènku mèmè kwamba. . .

444 Yèyè nè: “Èè, mpindyewu, patwàyà mwòmù amu,” yèyè nè, “wíkala mukàjèèbè ki nganyì?”

445 Mèmè kwamba nè: “Nwènù bwònsò bàbìdì. Kakwàkwikalakù nànsha umwe to, wamònu's, nànsha nànkù nnwènù bwònsò bàbìdì nudi bafwànyine kwikala aci.”

Yèyè kwamba nè: “Ncyènakù mwà kucyùmvwa to.”

446 Mèmè kwamba nè: “Mpindyewu, munanga wanyì, sòmbelàbi panshì, ngǎnjì nkuumvwijèku cintu kampànda.” Mèmè kwamba nè: “Mpindyewu, ndi mumanyè nè udi munnangè, nè udi mumanyè mùndì mèmè mukunangè, nè nkuneemeka nè nkutwà mushinga. Mpindyewu, cileejilu, anjì ambà tǔng bu mèmè

mwà kuvwàla bîmpè, kupweka mu ville; nè ndumbà mukesè kampànda, mulenga wa dikèma, kulwayè kungeela mabòkò kunshìngù, wàmba nè: ‘Kaa, Mwanèètù Branham, ncyà bushùwà nè ndi mukunangè,’ ùbanga kungeela makòkò kunshìngù ùnguupukila. Wèwè udikù mufwànyìne kwela meeji kaayi?”

Yèyè kwamba nè: “Ncyèna ngèèla meeji nè ndi mufwànyìne kunanga aci menemene nànsha.”

⁴⁴⁷ Ki mèmè kwamba nè: “Ndi muswè nkukonkèku cintu kampànda. Udi . . . Ûdi mutàmbe kunanga bikolè nganyì, bu nè civwa nditeetangana dyà makànda, mmèmè anyi m’Mukalenge Yesù?” Mpindyewu, awu wùdi ànu muyiiki, wà beena dikù’s.

⁴⁴⁸ Ki yèyè kwamba nè: “Mukalenge Yesù.” Yèyè nè: “Èyowà, Bill, nànsha mùdibi nè ndi mukunangè amu, kàdi, pamutù pàà mèmè kufwànyina kuMulekela, nènkukekèlè wèwè.”

⁴⁴⁹ Mèmè kwamba nè: “Twasàkidila, munanga wanyì. Ndi nè disànkà dyà kukuumvwa wamba nànkù awu mpindyewu.” Mèmè kwamba nè: “Mpindyewu, kàdi mukàji mukesè umwèumwè awu bu yèyè mwà kuseemena kùdi Yesù nè kuMwela mabòkò kunshìngù, wàmba nè: ‘Yesù, ndi muKunangè,’ udi mufwànyìne kwela meeji kaayi bwà bwalu abu?”

Yèyè kwamba nè: “Aci’s ncifwànyìne kunsànkisha.”

⁴⁵⁰ Nwamònu’s, s’bidi bishintuluka byùmuka ku dinanga dyà filèò bìya ku dyà àgàpaò. Nwamònu’s, n’Dinanga ditàmbe kutumbuka. Nwamònu anyi? Nènku cintu pààci nè mmulùme nè mukàjèndè kaciyenamù to, bu mùdi . . . nè kukolesha kwà bàna. Byònsò abi mbiyè, mubidi wà—wà bulùme nè wà bukàji awu. Tujilujilu twònsò atu tùdi . . . Twònsò tùdi mwomùmwè mwàmwa. Nwamònu anyi? Nànsha cimwè cyà ku byòbi abi, kaciyènakù kàbidi to. Nwamònu’s, kamwèna byà tujilujilu twa mubidi wà bulùme anyi bukàji abi to, nànsha kakesè. Nwamònu anyi? Nwènu nudi ànu . . . Èyowà’s, mukalenge. Anji elà ànu meeji bwà wèwè mwinè kùyi nè kajilijilu kàà mubidi wà bulùme anyi wà bukàji. Twòto atu twàkatèèkiibwa mu mibidi yètù bùvwa mbwà kuuja buloba, nudi numòna’s. Kàdi, Mwàmwa, kakwàkwikalakù nànsha kàmwè Mwàmwa to. Kamwàkwikalakù kajilujilu ní nkàà mubidi wà bulùme ní nkàà mubidi wà bukàji nànsha. To.

⁴⁵¹ Kàdi cipidi cyà dipiluka dyà Nzambi ndiikalàmu. Ncyà bushùwà menemene. Kàdi netwikalè bulelèlè ànu bashùwashùwàlè. Ka—kakùyi byà filèò to, nànsha kakesè; byònsò ànu àgàpaò. Nwamònu anyi? Ki bwà cinyi, mukàj’a muntu neikalè ànu cintu kampànda cyà cilenga cidi—cidi cyèbè wèwè, nè yèyè . . . Nudi ewu wa ewu ewu wa ewu. Kakwènakù cintu pààci nè . . . To, to, kakwènakù nànsha . . . Nwamònu’s, luseke lwà filèò alu kalwènakù mene to nànsha kakesè. Nwamònu’s, kakwènakù mwà kwikala cintu pààci nè mmukàwù to; kakwèna cintu nànsha cimwè cyà kuumvwila

mukàwù to. Cintu bu nàнку kacyènamù nànsha. Kacya kanùyiku numanya cintu bu nàнку awu to. Nwamònu anyi? Nènku ànu nsongààlùmè mulenga nè nsongààkàjì, bwà kwikala nè mwoyi.

Nènku pashiishe, paanyimà, yèyè kwamba nè: “Ngäcyũmvù mpindyewu, Bill.”

Mémè kwamba nè: “Èyowà.”

⁴⁵² Ndi muswè kunùlondela kaacintu kakesè kàdi kenzèke. Eci cìvwa ncilòòtà. Mvwa mulààle tulù. Nè mémè kacya ncitukù mwanjì kulonda cyòci eci kwònsò eku munkaci mwà bantu to. Mvwa mucilondèlè ndambù wa bantu, kàdi kacyà kí mmunkaci mwà bantu to, bwà ku dyànyì dimanya.

⁴⁵³ Mémè—mémè kulòòta, bu ngondo mujimà nàнку paanyimà pàà cyòci aci nè, mvwa mwimàne, dīngà ditukù, nè mvwa munkaci mwà kubandila cikondo cyà dicyònkómoka cìvwa. . . Mpindyewu, kaciyi cilumbulwidi to. Ncyèna mémè ngiitabuujà nè Èkèleeziyà neàpicilè ku, (ndi njinga kwamba, Mukàjì-musèla), ùya ku cilumbulwidi to. Kàdi, mvwapù pàvwàbo bàfila bifulu byà butùmbi, nwamònus. Nè Nkwasa wa butùmbi munène—munène mutèeka *apa*. Nè Yesù nè Mwanjèlò mufùndi wa ménà, nè bònsò, bàvwa biimàne mwaba awu. Nè kùvwa bidyacilu byà cibàndilu, bu nàнку's, bipwekè mùshindù *ewu*, byenza byà mubanga mutòoke; bipwekè, byenzè cijèngù, byenzè mmwènekeli wa kacya ànu byàya mùshindù *ewu*, nè bipàtùke pambèlu, mu mùshindù wà nè cilwilu cyònsò cinène cìvwa ciimàne eci cìvwa mwà kumòna cìvwa munkaci mwà kwenzeka aci.

⁴⁵⁴ Nè mémè mvwa mwimànyine lwà paanyimà apu, mu ntàntà mule ku luseke kampànda. Nènku mvwa ànu kacya ngìmana mwaba awu, nciyìku nè cingènyingenyi cyà nè bìvwa bikèngela bwà mémè kubàndila pa bibàndilu abi nànsha. Mvwa mwimàne mwaba awu. Mvwa mwà kumòna. . .

⁴⁵⁵ Mwanjèlò mufùndi awu ùvwa ùbìikila dīnà kampànda; nè mémè mvwa mwà kumanya, kujingulula dīnà adi. Ngàkatàngila, nènku lwà kule kwàka, ke mwanèètù wa balùme kampànda ulwàlwa wàwa, wènda wènda nè mwanèètù wa bakàjì kampànda, bàseemena too nè paùdi apu, mùshindù ewu. Mwanjèlò mufùndi wa ménà awu mwimàne mwaba awu ku luseke lwà Kilistò, (cidi ànu ncilòòtà cyanàànà mpindyewu's), nè mwikàle ùkenketa. Nè dīnà dyàbò dīvwa dīfundamù, dīvwa disanganyiibwa mu Mukànda wà Mwoyi awu; Ùvwa ùbàtàngila, wàmba nè: “Udi mwenzè—udi mwenzè bìmpè, musadidi wanyì mwìmpè nè wa lulamatu. Mpindyewu bwelààku.”

⁴⁵⁶ Mémè kutàngila paanyimà, kùvwàbo bàya aku. Kùvwa buloba bupyabùpyà, nè masànka. Nènku wàkamba nè: “Bwelà mu masànkà à Mukalenge, àtù—àtù bwèbè wèwè kacya ku difùkà dyà dyulu nè buloba.” Nwamònu anyi? Nènku,

kaa, mêmè kudyàmbidila... Bâvwa bàkòsolola bàya kwàka, nè bàkatwilangana muntu nè mukwèndè, nè biikàle ànu bàcyònkomoka, nè bàya dyàmwàmwà dyà mikùnà nè mu mwaba munène menemene.

457 Kàdi mêmè kudyàmbidila nè: “Kaa, abi kí mbilenga bilayà anyi! Butùmbi’s wè! Àlèluuyàh!” Mwikàle ànu ntùpika nya muulu ngaalukila’s!

458 Pashiishe mvwa mwà kuumvwa bàbiikila dikwàbò dìnà. Mêmè kudyàmbidila nè: “Kaa, awu’s ndi mumumanyè. Awu’s ndi mumumanyè. Ndi... Nyèyè wàwa, nyèyè uyàya wàwa, wàwa.” Mmutàngila mùshindù ewu.

“Bwela mu masànkà à Mukalenge, Wanyì mwîmpè nè... ”

“Kaa,” mûmvwà mwà kwamba, “Nzambi àtumbishiibwè’s wè! Nzambi àtumbishiibwè’s wè!”

Wàmba ànu, cileejilu, mùvwàbo bàfwànyine kwamba nè: “Orman Neville,” nwamònu’s.

459 Nè pashiishe mvwa mufwànyine kwamba nè: “Awu’s m’Mwanèètù Neville mukùlumpè. S’nyèyè wàwa.” Nwamònu anyi? Nènku ke yèyè ulwàlwa ewu, ùpàtukila mu musumbà awu, ùbànda.

460 Mpindyewu Yèyè kwamba nè: “Bwela mu masànkà à Mukalenge, àdi makulongolwela kacya kumpàlà kwà difùkà dyà dyulu nè buloba. Bwelààku.” Nènku Mwanèètù Neville mukùlumpe mmufwànyine ànu kushintuluka cyanàànà, nè mufwànyine ànu kwalukila mwómò amu, mwikàle ànu wènda wèla mbilà mikolè nè ùtuuta mikòbolo.

461 Balùmyànà, mêmè’s mvwa ngeela mbilà ngàmba nè: “Butùmbi kùdi Nzambi’s wè!” Mwimanè apa pàà nkààyaanyi, mwikàle mpìcisha cikondo cyà dicyònkomoka, ntàngila mùdi bânà bèètù bàbwela.

462 Nènku Mwanjèlò mufundi ùvwa mwimàne mwaba awu, nè kwambayè nè: “William Branham.”

463 Kacya ncivwakù mêmè ndyàmbidila nè bìvwa bifwànyine kunkèngela bwà kwenda nàнку awu to. Nàнку dībā adi mêmè kuumvwa bwòwà. Mêmè kudyàmbidila nè: “Kaa, ekèlekèlè! Nebikengelè bwà mêmè kwenza nàнку anyi?” Kì pa nàнку mêmè kuya ngènda mpweka mutàngilekù. Ke bantu bwònsò kubangabò ànu kuntuuta tuumapì pa—pa... [Mwanèètù Branham ùdi ùdìtuuta tuumapì misangu yàbùngì—Muf.] “Wetwàwu, Mwanèètù Branham! Nzambi àkubènèshè, Mwanèètù Branham!” Bantuuta tuumapì pàndi ngenda mpìcila, mu musumbà munènè wà bantu awu apu. Nè bwòbò bwònsò bòòlola byanza bantuuta tuumapì mùshindù awu. “Nzambi àkubènèshè, mwanèètù! Nzambi àkubènèshè, mwanèètù!”

464 Mvwa ngènda nya. Mémè kwamba nè: “Twasàkidila. Twasàkidila. Twasàkidila.” Byenzè mùtù kupàtuka kwà mu disangisha amu, anyì cintu kampànda, nudi bamanyè’s.

465 Nènku bìvwa bikèngela bwà mémè kwendela pa bidyacilu binène menemene byà mubanga ebi. Mémè kubanga ngènda mbànda mpìcilamù. Nènku ndi mwenzè ànu ngèèla cidya cyà kumpàla aci anyi, mémè kwimana. Ki mémè kudyàmbidila. . . Mémè kuMutàngila kwìsù. Mémè kudyàmbidila nè: “Ndi muswè mMutàpèku dísù bímpè mu nùnkù ewu.” Ki mémè kwimana.

466 Mvwa mwenzè byanza byànyì mùshindù ewu. Mémè kuumvwa cintu kampànda cimfiita cimbwela mu dibòkò emu. Divwa ndibòkò dyà muntu kampànda mu kwàbò. Mémè kukènzakana, ki Hope ewu mwimàne mwaba awu; mèsù manène mafìke awu, nè nsukì mifìke ayi mimupwekèle paanyimà, muvwàle mùzàbì mutòòke; mwambùle mèsù muntàngile mùshindù ewu. Mémè kwamba nè: “Hope!”

467 Mémè kumvwa cintu kampànda cituuta ku *edi* dibòkò. Nkènzakana nùnkù anyì, ki Meda awu; mèsù mafìke awu mambulula matàngile, nè nsukì mifìke ayi mipwekè, muvwàle mùzàbì mutòòke. Ki mémè kwamba nè: “Meda!”

468 Ki kutàngilanganabò muntu nè mukwèndè, nudi bamanyè’s, nùnkù ewu. Bàvwa. . . Mvwa naabò mu mabòkò àànyì, nènku ki twètù bàyaayà aba, twenda batàngile Kumbèlu.

469 Mémè kutàbuluka. Kaa, mémè kutàbuluka. Ki mémè—mémè kajuuka è kusòmbela mu nkwasà, è kwasa mwadi, nudi bamanyè’s. Mémè kudyàmbidila nè: “Éyì Nzambì, ndi ntèkemena nè aci cidi cìlwa mùshindù awu.” Bwònsò bàbidì bàtu baswikàkàne naanyì mu nsòmbelu, nè mu dilelè bânà, nè bikwàbò byà mùshindù awu; nènku’s ki twètù aba, tubwela mu buloba bupyabùpyà, kaa, ekèlekèle, mùdì bupwàngàne nè byònsò. To, cintu nànsha cimwè. . .

470 Kaa, necìikalè cintu cilenga be! Kacinùpicikù to. Kacinùpicikù to. Ku ngàsà wa Nzambì, enzaàyi cyònsò cinùdì mwà kwenza aci, nènku aci necìikale citàngile Nzambì bwà kukùba bìdì bishàale abi dîbà adi.

Ndi muMunange, ndi muMunange
Bwalu Yèyè wàkannanga kumpàla
Nè wàakampetela lupàndu
Ku Kàlvariyo. . .

471 Tùwìmbàayi cyàkàbidì, nè mwoyi wètù wònsò. Mpindyewu twàmbùlulààyàku mèsù ètù kùdì Nzambì.

Ndi muMunange

[Mwanèètù Branham ùdì ùmuka mu cyambilu bwà kusambidila mwanèètù wa bakàjì kampànda, méyì èndè kaèna ùmvwika to—Muf.]

. . .muMunange

Bwalu Yèyè wàkannanga kumpàlà
 Nè wàkampetela lupàndù
 Ku mucì wà Kàlvariyo.

⁴⁷² Èyo, mpindyewu. Kabivwa bitèkemena nè yèyè neikale nè mwoyi too ne ku ndekeelu kwa disangisha edi to. Ncyà bushùwà. Ki yèyè awu's, nè byanza byònsò bìbìdì byela muulu, ùtùmbisha Nzambi. Ke bwà cinyì mwva njàngulukila kaaba aka ntàntà mule, nè ndi nzwàmbila cìndì ngènta: Mwva mwakùle bwà Meda nè bakwàbò, nè mûmwà mwindile, bwà kumòna cìvwà. . . Mwva mutùngùnùke ànu nè kumòna Bukènkè abu munkaci mwà kunyùnguluka bùtwa kumpàla bupinga, kàdi buya bukalembelèla kumutù kwèndè. Mémè kudyàmbidila nè: "S'ki cyôci aci." Kaa, kî mbilenga bilayà anyi?

Ndi muMunange, ndi muMunange
 Bwalu Yèyè wàkannanga kumpàla
 Nè wakampetela lupàndù
 Ku mucì wà Kàlvariyo.

⁴⁷³ Mpindyewu, nè mwoyi yètù. . . [Mwanèètù Branham ùdi wimbila mu matàma *Ndi MuMunangè*—Muf.] Anjì elààyìbì meeji ku bwìmpè Bwèndè nè luse's.

. . . ndi muMunange (Amen!)
 . . . Yèyè wàkananga kumpàla . . .

⁴⁷⁴ Mpindyewu udi umòna mùdici citàmbe bwìmpè anyi? Amen! Ki cyôci aci's. Mpindyewu. . . ? . . . Ndààku ùsangale. Amen! Ngàsà wa Nzambi mmukumwènèkèle, bwà kukusàngaja. Amen.


. . . ku mucì wà Kàlvariyo.

Kaa, butùmbì kùdi Nzambi's wè!

Ndi muMunange, . . .

Èyo, mpaasàtà wenù.

Ndi . . .

⁴⁷⁵ [Muntu kampàndà ùdi wàmba nè: "Mwanèètù Branham, mààlabà ùdi ùbanga pa dìbà citèemà nè tusunsa makùmi àsàtù anyi?"—Muf.] Dìbà citèemà too nè pa dìbà citèemà nè tusunsa makùmi àsàtù. Pa dìbà citèemà jaajaaja, mu mwaba kampànda amu. ["Paanyimà pàà didyà dyà dindà anyi? Pa dìbà citèemà jaajaaja anyi?"] Nudi nubanga pa dìbà citèemà. Mémè nèmbangilè pa dìbà citèemà nè tusunsa makùmi àsàtù. 

63-0323 Citampì Ciisambòmbò
Branham Tabernacle
Jeffersonville, Indiana États-Unis

CILUBA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org